

L I T E R Æ

~~600.0.18.~~

Pſendo-Senatus Anglicani,

CROMWELLI,

Reliquorumque Perduellium
nomine ac jussu con-
scriptæ

A

JOANNE MILTONO.



Impressæ Anno 1676.



7. Ha.

7. I. a

AD LECTOREM.

Cum primum ad manus nostras hæ chartæ pervenerunt, dubitavi diu utrum illas prælo potius aut flammis committerem, donec memores misericordiæ istius quæ Authori olim quantumvis in Sacram Majestatem fœdissimè delinquenti ignoverat, stultissimam fore inclementiam judicavimus perituris ejus operibus non pepercisse. Equissimum enim plebisque semper visum est ut Principis cujuscunque monitis & imperio parere debemus, illius etiam facta imitemur. Non autem hic tibi quidvis propinamus quo Juniorum mores & ingenia corrumpere, aut aliorum seditiosam & impotentem regnandi libidinem palpare satagimus. Id solum rerum scriptarum ornatum, & Latini sermonis elegantiam tibi commendatam volumus: est enim forsân dignissimus qui ab omnibus legeretur Miltonus, nisi styli sui facundiam & puritatem turpissimis moribus inquinasset. Cum autem ex hisce Literis possis forsân nonnulla excerpere quæ temporis istius quo scriptæ sunt Annales illustrare: Et

AD LECTOREM.

pervicacem Rebellium istorum malignitatem detegere & explicare poteris, nos illas eo nomine in lucem edi curavimus. Videas interim post Reges exactos, quam ornate pelle. Leoninâ indutus sit Asinus; & dum Legationes designant perduelles, mittunt Internuncios, moliuntur bella, reliquaque Regiæ Majestatis assumunt insignia, potestatem illam quam inique vindicaverant sibi debitam & ritè commissam esse arbitrantur. Habeas tibi, Lector, & his in tui commodum & malorum hominum perniciem perfruare.

LITERÆ PARLAMENTI nomine Scriptæ.

Senatus Populusque Anglicanus
Amplissimo Civitatis Hambur-
gensis Senatui,

SALUTEM.

QUàm diù, quàmque multis de causis
instituta à majoribus nostris cum am-
plissimâ vestra civitate amicitia in hunc
usque diem permanserit, & vobiscum
unâ libenter agnoscimus, & sæpiùs etiam reco-
lere non est molestum. De eo autem quod ex
literis vestris 25. Junii datis intelligimus, homi-
nes quosdam nostros non ea qua soliti sunt fide
ac probitate in suis apud vos negotiis versari, nos
quidem ad certos ejusmodi rerum peritos statim
retulimus, ut in lanarios, cæterosque panni
opifices acriùs inquirerent; eamque porro ope-
ram daturos nos esse pollicemur, ut & æqui bo-
nique studium apud nos, & nostra omnia erga
vos officia constare sentiatis. Verùm & quid-
dam est quod etiam a vobis vicissim non nos
duntaxat, sed ipsum jus & fas omne postulat;
ut nostræ gentis mercatoribus, vestris hospiti-
bus & sua privilegia conservare, & eorum vi-
tam,

tam, atque fortunas, prout eâ civitate dignum
 est, vestris opibus defendere velitis. Quod, ut
 prioribus literis enixè petivimus, ita nunc etiam
 ut vehementiùs efflagitemus, faciunt quotidiana
 mercatorum querelæ, quas ad nos deferunt;
 suam nimirum salutem atque rem omnem rur-
 sùs apud vos in dubio esse. Quamvis enim litera-
 rum nostrarum quas pridem ad vos dedimus
 fructum aliquem ad tempus percepisse se fatean-
 tur, & ab injuriis nefariorum hominum aliquan-
 tùm respirasse, nunc tamen post adventum
Cochrani illius in urbem vestram (de quo etiam
 priùs questi sumus) qui mandatam jam sibi à
Carolo defuncti nuper Regis filio Legationem
 nescio quam Prædicat, se omnibus contumeliis,
 minis, armis etiam Sicariorum petitos solitâ ve-
 strâ defensione atque tutelâ caruisse. Adeò ut
 cum unus atque alter è mercatoribus cum ipso
 etiam Societatis Præfecto, in navem quandam
 prædatoriam per insidias abducti essent, cæteri-
 que vestram fidem implorarent, à vobis tamen
 nullum auxilium impetrare potuerint, donec
 ipsi suo Marte mercatores, non sine magno
 suorum discrimine captos in eo flumine, cujus
 vestra urbs domina est, ex latronum manibus
 eripere cogerentur. Quos cum illi bonis auspiciis
 domum reduxissent, & ab indignâ servitute
 veluti manu asseruissent, captos etiam piratas
 ipsos in custodiam dedissent, *Cochranum* illum
 perfugam & perduellem eò audaciæ processisse
 accipimus, ut & prædatores dimitti liberos, &
 mercatores tradi sibi vinctos postulet. Vos au-
 tem

tem etiam atque etiam hortamur & obtestamur, si pactiones, & fœdera, & pervetustum utriusque gentis commercium, id quod petitis, inviolatè servari studeatis, ut nostri certum aliquod atque firmum sibi præsidium in vestrà fide, prudentiâ, autoritate collocare demum possint; Vos autem uti eos his de rebus benignè audiat; tam de *Cochrano*, cæterisque scæleris, illius fociis, quàm de iis qui nuper in Concionatorem, impunè adhuc, impetum fecerunt supplicium fumere velitis, aut è finibus exire jubeatis. Neque pulsos atque exules *Tarquinius* amicitia atque opibus *Populi Anglicani* anteferendos existimetis. Si enim per vos non steterit quo minùs Reipub. nostræ hostes quidvis licere sibi contra nos in urbe vestrà confidant, quàm non tuta aut honesta amplius nostrorum ibi commoratio sit, vos cum animis vestris cogitate. Hæc vestræ prudentiæ & æquitati; Vos ipsos Divino Numini commendatos volumus. Valete.

Westmonasterio. Dat. August. 10. 1649.

Senatui Hamburgensi.

PERspecta nobis æquanimitas vestra dubiis in rebus nostris, facit nunc ut sanè prosperis, ac benè gestis, de vestrà voluntate, & amico in nos animo nequaquam dubitemus. Nos quidem, confecto jam pœnè bello, & profligatis ubique patriæ hostibus, nihil æquius, aut ad pacem, Remque publicam stabiliendam firmius

mius use duximus, quam ut illi qui vel liberta-
 tum, ductore semper Deo, per nos adepti sunt,
 vel vitam atque fortunas post belli civilis facino-
 ra, nostro dono atque gratiâ receperunt, nobis
 vicissim suis Magistratibus fidem & officium,
 solenni, si opus esset, more testarentur, atque
 præstarent. Præsertim cum tot homines inquieti
 & inimici, semel atque iterum in fidem accepti,
 nullum neque domi neque foris perfidiosè agen-
 di, novasque turbas excitandi finem faciant.
 Itaque formulam quamdam sponfionis perscri-
 bendam curavimus, quâ omnes qui aut munus
 aliquod in Repub. sustinerent, aut legum præ-
 sidio muniti incolumitate, otio, cæterisque
 vitæ commodis fruerentur, conceptis verbis se
 obstringerent. Hanc etiam per omnes Colonias
 & quacunque gentium nostri cives negotiandi
 causâ agerent, mittendam censuimus; ut eo-
 rum quibus præficimur, fidem, prout decet
 atque necesse est, exploratam & cognitam ha-
 beamus. Quo magis mirari subit quod ex urbe
 vestra mercatores nostri scribunt, sibi mandata
 nostra per unum atque alterum vestri ordinis
 exequi non licere. Sanè quod *potentissimæ Fæ-*
deratorum in Belgio Provinciæ, suarum rerum
 & rationum consultissimæ, nihil ad se pertinere
 existimaverunt, si peregrini scilicet *Angli* de-
 bitam suis domi magistratibus in hæc vel illa
 verba fidem astringant, id quo pacto vestræ
 Civitati suspectum aut molestum esse possit, sa-
 lemur planè nos nescire. Verum hoc à privato
 quorundam sive studio sive formidine profe-
 ctum

ctum, quos errabundi quidam & pulsi patria
Scoti, minis dicuntur impulisse, ut mercatores
 nostros a fide sua nobis obliganda deterrent,
 Civitati non imputamus. Interea tamen summo
 vos opere hortamur atque etiam rogamus (non
 enim mercatura jam, sed Respub. ipsa agitur)
 ut ne quenquam apud vos patiamini, cujus hoc
 nihil potest interesse, authoritati quam nos in
 nostros populares, non Exterorum arbitrio aut
 iudicio, sed jure Patrio obtinemus, suam quam-
 cunque authoritatem interponere. Quis enim
 non ægrè ferat, si nos vestris hîc *Hamburgensi-*
bus sua erga vos fide interdiceremus. Valete.

Dat. Jan. 4. 1649.

Serenissimo ac Potentissimo Principi

PHILIPPO QUARTO

Hispaniarum Regi.

Parlamentum Reipub. Angliæ,

SALUTEM.

Antonium Ascamum Virum probum, eru-
 ditum, & luculentâ familiâ ortum, de re-
 bus in commune, tam *Hispanorum*, quam *An-*
glorum genti, ut spes est, valde utilibus, ad
 Majestatem Vestram legamus. Quamobrem ut
 ei honestum iter, atque tutum in Urbem Re-
 giam, sicut moris est, necnon & reditum con-

cedere, & præstare velis, parem referre gratiam parati, officiosè petimus. Sin id minùs placuerit, ut quæ vestra hac in parte sit voluntas, ei quam primùm significetur, utque tutò quo volet abeundi potestas fiat.

Dat. Feb. 4. 1649.

Serenissimo ac Potentissimo Principi
PHILIPPO QUARTO
 Hispaniarum Regi.

Parlamentum Reipub. Angliæ,

SALUTEM.

QUis rerum nostrarum status sit, quamque atrocibus injuriis subacti, sumptis tandem armis, capeffendæ libertatis consilium ceperimus, constitutâ quâ nunc utimur Reipublicæ formâ, neque *Majestatem Vestram* potest latere, neque alium quemvis, qui evulgata super hac re scripta nostra æquo animo perlegerit. Nobis pro-
 fecto fidem nostram, æquitatem, patientiam, testatam cunctis & probatam reddere, auctoritatem etiam, honorem, & Decus nostrum adversus infames exulum & perfugarum linguas tueri, apud idoneos rerum æstimatores difficile non debet esse. Nunc quod exterarum nationum magis interest, deletis, aut depressis Patriæ hostibus, Deo nempe mirificè adjuti, ad
 pacem

pacem & amicitiam omni imperio potiore
cum vicinis gentibus habendam, paratos nos esse
palam atque ex animo profiteamur. Has ob cau-
sas spectatæ solertiæ & probitatis Virum *Anto-
nium Aschamum* in *Hispaniam* ad *Majestatem Vestrâ*
misimus; qui de amicitia deque solito in-
ter utramque gentem commercio cum *Majestate*
Vestrâ agat; vel etiam ad novas pactiones, si ita
visum fuerit, de integro sanciendo viam muniat.
Huic igitur *Vestræ Majestatis* adeundi copiam ut
faciatis, ejusque incolumitati, necnon etiam
honori, quoad isto apud vos munere perfun-
cturus est, velit prospicere rogamus: ut &
ea quæ a nobis mandata habet, utrique genti,
ut speramus, profutura, liberè exponat; &
mentis *Vestræ* qui sensus his de rebus sit, nos
quam primùm certiores faciat.

Westmonasterio dat. Feb. 4. 1649.

Serenissimo Principi

JOANNI QUARTO

Lusitanix Regi.

Parlamentum Reipub. Angliæ,

SALUTEM.

Multa nos & infidæ pacis, & intestini belli
mala ultima perpeffos, eò demùm loci
redactos fuisse, ut si salvam Rempubl. velle-
mus,

mus, ejus administrandi ratio magna ex parte immutanda esset, ex iis quæ à nobis hac de re scripta publicè & declarata sunt, *Majestati Vestrae* jam pridem notum esse arbitramur, Quibus, ut par est, si fides potius haberetur, quàm improbiissimis perditorum hominum calumniis, sanè qui foris de rebus nostris pessimè jam sentiunt, iis fortasse multò æquioribus uteremur. Nam quod nos jure nostro, proque gentilitiâ *Anglorum* libertate, rectè & majorum more fortiter fecisse contendimus, de eo pravas & obstinatas nequissimorum hominum opiniones ex animis evellere, humanæ opis aut ingenii certè non est. Nunc autem quod nobis cum nationibus externis commune, & in rem utrinque magis existit, amicitiam & commercium quod nostris hominibus, cum vicina quacumque gente consuevit esse, non imminutum, sed auctum atque ratum magnoperè cupimus. Cumque vestro in regno populares nostri permagna & per utrique genti quæstiosa habeant negotia, iis ne impedimentum aliquod aut incommodum afferatur, quantum in nobis est, curabimus. Id verò prædicimus frustra fore, dum piratis & defecto-ribus nostris perfugium sibi vestris in portubus reperire, & onerariis *Anglorum* navibus, vi captis atque direptis, bona civium nostrorum sub hasta vendere Olissipone, ut nuntiatur, permissum est. Huic malo quo maturiùs occurratur, & de ea, quam petimus, amicitia clariùs ut constet, Nobilissimum Virum *Carolus Vane*, Oratoris munere præditum, cum mandatis atque

atque diplomate, cominissi sibi muneris teste, ad *Majestatem Vestram* legavimus: Eum itaque benignè audire, fidem ei adhibere, ejus denique incolumitati atque honori, per omnes regni vestri fines, ut velis consulere obtestamur. Hæc omnia & nobis pergrata, & *Majestati Vestræ*, si fortè usus venerit, nostra omnium officia mutua fore pollicemur.

Westmonasterio dat. Feb. 4 1649.

Serenissimo Principi

JOANNI QUARTO

Lusitaniæ Regi.

Parlamentum Reipub. Angliæ,

SALUTEM.

Quotidiani ferè, & perquam graves afferuntur ad nos nuntii, Classarios quosdam nostros, & gubernatores, qui abductis per scelus atque proditorem, quibus præerant, navibus, superiore anno a nobis defecerant, elapsos demùm ex eo portu Hiberniæ, in quo æstate ferè totâ obsessi, vix pœnam suis flagitiis dignam effugerant, ad *Lusitaniæ* nunc oram, *Tagique* fluminis ostium se recepisse: Ibi captis atque direptis quæ ad mercaturam ultrò citròque commeant, *Anglorum* navigiis, piraticam strenuè facere; & vicina quæque maria, fretumque omne Gaditanum latrocinis infestum atque in-

fame reddidisse. Cui malo nisi primo quoque tempore obviàm eatur, actum esse de commercio, quod nostris hominibus cum *Lusitanis* per amplum & per utrique genti quæstuosum est, quis non videt? Quamobrem à *Vestra Majestate* etiam atque etiam petimus, ut piratas nostros & defectores, *Portugalliae* finibus exire jubeas; & siqui a *Carolo Stuarto* pseudolegati adsunt, eorum uti rationem ne habere digneris; nosque potius agnoscas, ad quos *Anglicarum* jam summa rerum, Deo planè aspirante, rediit; utque nostræ amicorum Classi, non minus vestris quam *Anglorum* commodis inservienti, *Lusitaniae* portus, atque flumina præcludi ne finas.

* * *

PHILIPPO QUARTO

Hispaniarum Regi.

Q Uàm gravitèr quàmque acerbè tulerit *Majestas Vestra*, nefariam illam *Antonii Aschami* oratoris nostri cædem, & quid in puniendis ejus interfectores hacenus effectum sit cum ex literis vestris, tum ex *Domino Alphonso de Cardenas* legato vestro percepimus. Veruntamen illius facinoris atrocitatem quoties nobiscum reputamus quæ & ipsam vel habendi vel conservandi commercii rationem funditùs tollit si Legatorum jus apud omnes nationes sanctissimum impunè tanto scelere violabitur, non possumus
quin

quin Majestatem vestram summâ instantiâ iterum efflagitemus ut supplicium de illis parricidis primo quoque tempore debitum sumatur, utque justitiam ullâ morâ aut obtentu religionis frustrari diutiùs ne sinat. Et quanquam potentissimi regis amicitiam plurimi certè facimus, tamen ut tam infandi parricidii authores dignas suo scelere poenas persolvant omnem dare operam debemus. Humanitatem quidem illam quam jussu vestro in *Hispaniæ* portubus nostri homines persensere, præclaram etiam vestræ Majestatis in nos voluntatem quam uper amplissimus verbis vestro nomine Legatus nobis exposuit grato animo agnoscimus, neque non voluptati nobis erit eadem pariter officia, si quis usus venerit *Vestræ Majestatis & Hispanorum* genti reddere. At nisi justitiæ sine mora latissiat quod jamdiu petimus, quo niti fundamento amicitia sincera ac diuturna possit non videmus, cujus tamen conservandæ a nobis quidem nulla honesta occasio facile omittetur, cui etiam fini præsentiam Legati apud nos vestri conducere existimamus.

Legato Hispanico.

Excellentissime Domine,

Concilium Status, quam primùm per gravissima Reipub. negotia licuit, in *Parlamentum* attulit quatuor illa scripta quæ visum

est *Excellentia Vestra* unde vigesimo proximi Decembris cum Concilio communicare, *Concilium* à *Parlamento* in Mandatis habet, quod ad primum scriptorum illorum caput, de nuperi scilicet *Residentis* sui *Dom. Aschami* nefariis interfectores, Responsum hoc reddere:

Parlamentum tamdiu, toties, tamque meritò, debitum eorum supplicium postulâsse ut ampliùs dicere opus non sit in re tanta ubi (ut *Excellentia Vestra* pulchrè meminit) *Regiæ Majestatis* ipsa agitur *Authoritas*: Et sine qua re omnis ratio *Societatis humanæ* & conservandæ inter gentes amicitia tolli necesse erit. Neque sane ullo *Religione* petito argumento intelligere possumus, innocentium sanguinem sceleratissimâ cæde effusum non esse vindicandum, Etiamnum itaque instat *Parlamentum* & ab *Regia Majestate* expectat ut, juxta priora sua postulata, satisfactio sibi re ipsa atque effectu detur.

Serenissimo Principi

LEOPOLDO AUSTRIÆ

*Archiduci Provinciarum in Belgio
sub Philippo Rege Præsidi.*

UT primùm ad nos non sine gravissimâ querelâ prelatum est, *Janam Puccherin-*
gam illustri & opulentâ Familiâ puellam hære-
dem,

dem , cum adhuc propter ætatem sub Tutoribus
 esset , haud procul eâ domo , in qua tum fortè
Grenovici agebat fuissè , & parato ad id navigio
 multarum raptam fuissè , & parato ad id navigio
 in *Flandriam* subitò deportatam , *Walcii* cujus-
 dam insidiis , qui per fas & nefas omnia molitus
 est , ut pupillam locupletem , vel ostenso mor-
 tis metu , ad nubendum sibi adigeret , huic tam
 atroci tamque inaudito sceleri primo quoque
 tempore occurrendum esse rati , dedimus qui-
 busdam negotium , ut cum præfectis Neoporti
 & Ostendæ (nam in ea fortè loca infelix illa
 dicebatur appulsâ) agerent de ingenua raptoris
 manibus eripienda. Qui utrique pro sua singu-
 lari humanitate & honesti studio , captivæ ,
 perque latrocinium domo abductæ opem liben-
 tètulerunt ; illa verò ut prædatorum vim quo-
 quo modo effugeret , in Cœnobium votarum
 virginum veluti sequestrò deposita est. Quam
 ut ille *Walcius* inde abduceret , actionem in foro
 ecclesiastico *Iprensis Episcopi* de contracto secum
 matrimonio instituit. Veruntamen , cum &
 raptor & rapta nostrates omninò sint , ipsum
 etiam facinus in nostra ditioe perpetratum ,
 quod juratis testibus abundè liquet , hæreditas
 denique tam lauta , quam illum imprimus in-
 hiasse constat , in nostra potestate sit , hujus
 propterea causæ cognitionem totam , atque ju-
 dicium ad nos duntaxat pertinere arbitramur.
 Veniat huc igitur qui se sponsum nominat , suam
 hîc litem instruat , quamque jure suam conten-
 dit esse uxorem , tradi sibi postulet. Hoc interim

à Vœstra Celsitudine vehementer petimus, quod
& per nostrum internuntium Bruxellis commo-
rantem jam aliquoties petivimus, ut afflictam
& indignis modis habitam puellam, honestis
parentibus ortam, suâ ex Patriâ prædatorium
in modum abductam, quoad potes, liberam
& incolumem redire domum finas. Hoc abs te
non nos tantum, siquam Vœstræ Celsitudini
parem a nobis gratiam, parque beneficium red-
di posse acciderit, sed ipsa etiam humanitas,
ipse pudor qui ad tuendum sexus illius honorem
& pudicitiam viris bonis atque fortibus inesse
debet, junctis unâ precibus efflagitare viden-
tur. Vale.

Westmonasterio Martii 28. 1650.

Serenissimo Principi

JOANNI QUARTO

Lusitaniæ Regi.

QUod Oratorem nostrum & honorificè acce-
perit *Majestas Vœstra*, & benignè statim au-
dierit, nullam interponendam esse moram sta-
tuimus, quin alteris quam primùm literis no-
stris intelligeres, gratissimum id nobis accidisse;
nosque nihil sanctius decrevisse, quàm pacem,
amicitiam, commercium, quod nobis cum Na-
tionibus plerisque exteris, & inter eas cum *Lu-*
sitanis jam diù est, nullo nostro dicto aut facto,

NON

non prius laceffiti, violare; nec aliâ mente aut confilio classẽ *Anglicanã*, *Tagi* fluminis ad ostium misisse, quàm hostes jam totiẽs fugatos persequendi, resque nostras repetendi, quas per vim & proditiõem suis dominis ablatas, coluvies ista perfugarum vestras in oras, ipsamque etiam *Olissiponem*, tanquam ad certissimas latrocinii sui nundinas, asportavit. Verũ isti homines cujus audaciæ, furoris, & insanix sint, ex ipsorum moribus flagitiosissimis omnes jam penè *Lusitanos* abundè perspexisse arbitramur. Quo facilius à *Majestate Vestra* impetraturos nos esse confidimus, primũ ut *Illustrissimo Viro Odoardo Poppamo*, quem huic novæ classi præfecimus, quibus potes rebus ad prædatores hosce debellandos, adjumento esse velis, utque eos cum duce suo, non hospites, sed piratas, non mercatores, sed commercii pestes, jurisque gentium violatores, intra regni vestri portus, & munimenta diutiùs consistere ne finas, sed quã patent *Lusitaniæ* fines, terrã marique pelli jubeas: sin hoc minùs, ut nobis saltem pace vestrã liceat defectores nostros, & præpones propriis duntaxat viribus aggredi, & si Deus dederit, in nostram potestatem redigere. Hoc ut prioribus literis vehementer petivimus, sic jam idem studio maximo atque opere ab *Majestate Vestra* contendimus. Hac sive æquitate, sive beneficio, non justitiæ solũ tuæ famam per omnes gentes benè moratas adauxeris, sed & nos imprimis, populumque *Anglicanum Lusitanis* jam antea minimè adversum,

Tibi

Tibi tuoque populo majorem in modum devinxeris. Vale.

Westmonasterio. Dat. 27. Aprilis. 1650.

Hamburgensibus.

DE controversiis mercatorum, nonnullis etiam aliis de rebus quæ Reipubl: nostræ dignitatem aliquanto propiùs attingere videntur, scriptum inter nos haud semel, atque responsum est. Cum verò istiusmodi negotia solis literis confici vix posse intelligamus, esse autem à *Carolo Stuardo* immisos in urbem vestram seditiosos quosdam, nulla re magis quam scelere atque audacia instructos, qui id agunt, ut nostrorum hominum, quorum præsertim fides in patriam perspectior sit, commercium tam vetustum in civitate vestra funditus tollant, idcirco virum nobilem & spectatissimum *Richardum Bradshaw* nostrum apud vos Internuntium esse iussimus: qui secundum ea quæ à nobis mandata habet, de rebus iis atque negotiis quæ cum utriusque Reipub: utilitatibus conjuncta sunt, vobiscum uberius communicare, & transigere possit. Hunc igitur ut benevolè quam primùm audiatis rogamus; utque ei per omnia fides ea, isque honos habeatur, qui hujusmodi munus rectè obeuntibus ubique gentium haberi solet. Valete.

Westmonasterio. Dat. 2. April. 1650.

Hamb^a

Hamburgensibus.

*Amplissimi, Magnifici, & Spectabiles
Viri, Amici charissimi,*

STudia vestra quibus venientem ad vos Residentem nostrum accepistis, tam propensa, tamque egregia extitisse, & libenter intelligimus, & in eadem erga nos voluntate atque animo perseverare velitis magnoperè hortamur. Idque eò vehementiùs, quòd perlatum ad nos est, exules illos nostros, de quibus jam sæpe scripsimus, efferre se solito insolentiùs in urbe vestra, nec contumelias solùm, sed & minas quasdam atrocissimas in Oratorem nostrum palàm projicere. Hujus itaque salutem atque etiam debitum honorem hisce rursùs literis commendatissimum vobis esse volumus. In illos autem perfugas & sicarios, tam veteres quàm recentes, si maturiùs animadvertetis, & nobis gratissimum, & autoritate vestra atque prudentia dignum feceritis. Valete.

Westmonasterio. Dat. 31. May. 1650.

P H I L I P P O Q U A R T O

Hispaniarum Regi.

A*Ntonium Ascamum* à nobis ad Majestatem Vestram nuper missum Oratorem, eoque nomine à Præfectis vestris perhumaniter & publice

blicè acceptum, post itineris pericula tam longinqui, primo statim adventu in urbem Regiam, omni præsidio nudatum, tam fædo parricidio confossum in diversorio quodam, & cum *Joanne Baptista de Ripa* ejus interprete constat esse, magno sanè cum dolore accepimus. De illis autem parricidis jam comprehensis, ut fertur, & in custodiam datis, qui non nos duntaxat per illius latera, sed vestram quoque fidem atque honorem consauciare ac pænè transfigere sunt ausi, deque eorum quibuscunque hortatoribus ac sociis ut supplicium tanto scelere dignum primo quoque tempore sumatur, opere quam maximò à *Majestate Vestra* petimus. Quanquam id nihilo minus factum iri, quod petimus, utpote à Rege sua sponte pio atque justo, etiamsi nemo peteret, non dubitamus. Quod reliquum est, ut corpus exanime amicis suis atque famulis in patriam deportandum tradatur, utque eorum saluti qui supersunt eâ, quâ par est, ratione consultum atque provisum tantisper sit rogamus, donec responso ad hæc literas, si fieri potest, secum ablato, vestræ pietatis atque justitiæ testes ad nos quam primùm redierint.

Westmonasterio. Dat. 28. Junii. 1650.

Excellentissimo Domino

ANTONIO JOANNI LUDOVICO
de la Cerda Medinæ Celi Duci,
Andalitiæ Præfidi.

*Consilium Statûs Parlamenti Angliæ
authoritate constitutum,*

SALUTEM.

Accipimus ab Ornatissimis Viris quos nuper in Portugalliam ad persequendos proditores, resque nostras repetendas cum classe misimus, se ab *Amplitudine Vestra*, quoties contigit ut *Galliciæ* oram legerent, quæ prefectura vestra est, & perhumaniter illis portubus exceptos fuisse, & iis rebus omnibus adjutos, quæ navigantibus usui solent esse. Et vestra humanitas, cum pergrata nobis omni tempore fuisset, tum est nunc præcipuè, cum aliorum iniquum in nos animum nullo merito nostro aliquibus in locis experimur. Petimus itaque abs te *Illustrissime Domine* ut in eadem erga nos voluntate ac benevolentia permanere velis: utque nostris hominibus, quoties ad ea littora naves appulerint pro solita humanitate tua favere & adiumento esse pergas: tibi que persuades nihil nos beneficii loco abs te petere quod non eodem studio vel Tibi vel tuis reddere, si quando similis occasio nobis dabitur, parati erimus.

Westmonasterio. Dat. 7. Novemb. 1650.

Signat. Consilii sigillo:

JO. BRADSHAWE PRÆSES.

ILLU.

ILLUSTRI & MAGNIFICO

Civitatis Gedanensis Senatui.

Magnifici atque Amplissimi Domini Amici Charissimi.

FRequentes ad nos literæ mercatorum nostrorum, qui Borussiae per oram negotiantur, allatae sunt, quibus tributum grave quoddam & insolitum nuper in magno *Polonorum* Concilio imponi sibi queruntur; ut decimam scilicet facultatum suarum omnium partem sublevando *Scotorum* regi, nostro hosti, suppeditarent. Quod cum juri Gentium contrarium planè sit, tractari hunc in modum hospites & mercatores, iniquissimum etiam, ut cujus tyrannide sint domi, divina ope, liberati, iidem in aliena Republica stipendia persolvere cogerentur, non dubitamus quin pro illa libertate, qua frui vos intelligimus, tam grave onus mercatoribus imperari in urbe vestra pati nolitis; in qua amicitiam & commercium, nec sine magno vestrae civitatis emolumento, per tot annos habuere. Si est igitur ut nostrorum hominum apud vos mercaturam facientium tutelam suscipere velitis, quod quidem cum ab æquitate & prudentia vestra, tum etiam à dignitate splendidissimæ urbis haud dubitanter expectamus, eam operam dabimus, ut gratissimum id esse nobis omni tempore sentiat; quoties in ditione nostra

Geda-

Gedanensis vel negotia habuerint , vel naves quod sæpè fit , ad portus nostros appulerint.

Westmonasterio. Dat 6. Feb: 1655.

INTERNUNCTIO PORTUGALLICO.

Illustris Domine ,

L Iteras tuas hujus mēsis quinto decimo *Hamptonâ* ad nos datas accepimus. In quibus significas te à rege *Portugalliae* ad *Parlamentum Reipub: Angliæ* missum esse : quo autem muneris titulo , sive Legati sive Agentis , sive Internuntii non dicis ; id quod ex literis quas à rege habes commendatitias sive credentiales intelligere velimus ; quarum exemplar , ad nos poteris quam primum mittere ; simul & illud scire , satisne plena potestate instructus venias ad eas injurias expiandas , damnaque ea resarcienda quæ à Rege vestro illata huic *Reipub:* sunt : dum hostem nostrum tota æstate proxima suis portibus tutatus *Classem Anglicanam* in rebelles & perfugas quos eò usque insecute erat , impetum facere parantem cohibuit , hostem ab invadendis nostris non cohibuit. De his omnibus ut satisfacias , si ampla & libera mandata accepisse te scripseris , & illarum quas diximus literarum exemplar una miseris , deinceps curabimus , ut ad nos fide publica primo quoque tempore tutò com̄meare possis : ubi cum regis literæ perlectæ fuerint , tibi , quæ mandata porrò attulisti , ea liberè exponendi facultas dabitur.

Par-

Parlamentum

R E I P U B. A N G L I Æ

*Serenissimo Principi D. Ferdinando
Secundo, Magno Duci Etruriæ &c.*

S A L U T E M.

L Iteras Celsitudinis Vestræ 22. Aprilis 1651.
Florentiæ datas & à Residente Vestro *Domi-
no Almerico Salvetti* nobis redditas accepimus, in
quibus *Anglico* nomini quantoperè faveat *Celsti-
tudo vestra*, Gentemque eam quanti faciat faci-
lè perspicimus, id quod non solum Mercatores
nostri, qui in portubus vestris multos jam annos
negotiantur, Verùm etiam Adolescentes qui-
que nostræ nationis nobilissimi atque honestissi-
mi, qui vestras per urbes aut iter fecêre, aut
excolendi ingenii causâ commorati sunt, testan-
tur atque confirmant, quæ cum nobis pergrata
sanè sint, & acceptissima, tum hoc etiam at-
que etiam petimus, ut quo animo, quoque
studio in nostros mercatores, aliosque nostræ
Reipub: Cives *Hetruscam* ditionem peragrantes,
Serenitas Vestra consuevit esse, in eò velit perse-
verare: nosque vicissim pollicemur atque reci-
pimus, quod ad *Parlamentum* attinet, nihil de-
futurum, quod & commercio & amicitiaë mu-
tuæ, quæ inter utramque Gentem jam diù in-
veteravit, firmandæ ac stabiliendæ possit con-
ducere;

ducere; quam quidem omnibus utrinque humanitatis officiis, mutuâque observantiâ, in perpetuum conservari cupimus, atque optamus.

Westmonasterio. 20. Januarii 1651.

Subscripsit & Parlamenti sigillum apponi fecit

GULIELMUS LENTHALL.

Prolocutor

Parlamenti Reipub. Angliæ.

Parlamentum

REIPUB. ANGLIÆ

Illustri & magnifico Civitatis Hamburgensis Senatui.

SALUTEM.

*Amplissimi magnifici & spectabiles viri,
Amici charissimi.*

Parlamentum Reipub. Angliæ, cum antiquam amicitiam, mutuumque commercium, quæ inter gentem Anglicam Vestramque civitatem est, continuatum magnoperè vellet & conservatum, haud ita pridem Richardum Bradshaw armigerum Residentis Munere præditum illuc misit, eique inter alia mandata eò spectantia difertis

sertis verbis mandavit, ut contra quosdam vestrae ditionis iustitiam efflagitaret, qui Societatis *Angliae* Concionatorem interficere sunt conati, quique Deputato Illius Societatis impias manus injecere, & mercatoribus quibusdam ejus Societatis praecipuis impias manus injecere, eosque in navem praedatoriam abduxerant, & quamvis praedictus *Residens* cum exciperetur primum & audiretur, accepta ab hac *Republica* mandata illa figillatim vobis nota fecerit, quibus iustitiae vestrae exemplum in maleficos illos edendum expectabatur, tamen cum expectationi nostrae responsum non esse intelligeremus, illud nobiscum cogitantes quanto in periculo & nostri homines & illorum facultates versarentur, si de incolumitate illorum & tutelâ adversus hostium malitiam & iniquos oppugnatores non satis provisum esset, rursus praedicto *Residenti* in mandatis dedimus, ut nostrum ejus rei sensum representaret: Utque hujus *Reipub.* nomine Vos ut amicitiam & necessitudinem inter hanc *Rempub* vestramque civitatem initam magnumque usum qui huic *Reipub.* cum vestra civitate intercedit conservare, adeoque mercatores nostros cum eorum privilegiis sine ulla violatione protegere velitis hortaretur; utque nominatim in quemdam cui nomen *Garmes* est qui se in hanc *Rempub.* Contumeliosè gessit, certosque ex societate mercatorum *Anglica*, *Vestra* in urbe commorantes, ad contumeliam hujus *Reipub.* magnamque nostrorum mercatorum molestiam,

in

in *Spirensē* Cameram publicē citavit : quare reparationem ejusmodi expectamus quæ æquitati & justitiæ consentanea est.

De hisce capitibus & si quid amplius ad hujus Reipub. cum vestra civitate amicitiam pertinuerit, prædictum *Residentem* hujus Reipub. nomine ad vos jussimus accedere ; cui, ut fidem amplam in iis quæ huc spectantia proposuerit habeatis, rogamus.

Westmonasterio. Dat.

12. Martii. 1651.

Subscripsit & Parlamenti sigillum impriment-
dum curavit

Prolocutor &c.

Parlamentum Reipub. Angliæ,

Serenissima

C H R I S T I A N Æ,

*Suecorum, Gothorum Vandalorum-
que Regina &c.*

SALUTEM.

Serenissima Regina,

M Ajestatis Vestræ Literas ad Parlamentum Reipub. Angliæ 26 proximè elapsi Septembris *Stockholmâ* datas per *Petrum Spiering Silvercroon* accepimus, & perlegimus : & veterem quidem amicitiam nec non commercium

B

mag-

magnumque usum qui *Anglis* cum *Suecorum* gente antiquitus intercedit permanere atque indies augere vehementer atque ex animo cupimus: Neque dubitamus quin Legatus à Majestate Vestra ampliter instructus venerit ad ea maximè proponenda quæ in rem atque decus Genti utrique futura imprimis fuissent, quæque nos audire ex eo paratissimi fuissetus & quod utrinque potissimum salubre atque utile videretur, id primo quoque tempore effectum reddidisse: Verùm summo rerum Moderatori DEO ita visum est, ut is antequam audiri se petisset de iis quæ *Parlamento* exponenda ab Majestate Vestra in mandatis habebat, evenit ut ex hac vita excederet (cujus quidem desiderium ita ægrè atque acerbè tulimus, ut qui simul in divina voluntate acquiescere debeamus) unde & Majestatis Vestræ quæ mens esset adhuc scire nequeamus, ejusque rei progressibus in præsens injecta mora sit: Quocircà optimum nobis visum est hisce literis quas, misso hac ipsa de re nuntio nostro, dedimus, significare Vestræ Majestati quam gratæ Literæ vestræ quamque acceptus vester publicus Minister *Parlamento Reipub. Angliæ* fuerit; simulque Vestræ Majestatis amicitiam quantoperè expectamus; quàmque etiam, ut par est, tantæ principis amicitiam plurimi faciemus: deque illo quod inter hanc Rempub. & Majestatis Vestræ Regnum est commercio exaugendo, ita existimabimus quemadmodum de re maximi utrobique momenti existimare debemus: quod & ea de causa

causa Parlamento Reipub. Angliæ acceptissimum
erit. Adeoque Vestram Majestatem divinæ tutelæ
recommendare volumus: Quorum nomine &
Autoritate

*Datis Westmonasterio die
Martis ann. Dom. 1651.*

Subscripsit & Parlamenti Sigillum
imprimendum curavit.

*Prolocutor Parlamenti Reipub.
Angliæ.*

Parlamentum Reipublicæ Angliæ

Serenissimo Principi

F E R D I N A N D O S E C U N D O

Hetruriæ Magno Duci,

S A L U T E M.

L Iteras Celsitudinis Vestræ 22. Aprilis 1651.
Florentiâ datas, Et a Residente Vestro Do-
mino *Almerico Salvetti* nobis redditas accepi-
mus; in quibus Anglico nomini quantopere fa-
veat Celsitudo Vestra, gentemque eam quanti
faciat, facile perspicimus: Id quod non solum
Mercatores nostri qui in portubus vestris multos
jam annos negotiantur, verum etiam Adolef-
centes quique nostræ nationis nobilissimi atque
honestissimi qui vestras per urbes aut iter fecere
aut excolendi ingenii causâ compiorati sunt,

testantur .atque confirmant. Quæ cum nobis pergrata sane sunt & acceptissima, tum hoc etiam atque etiam petimus, ut quo animo quoque studio in nostros mercatores, aliosque nostræ reipublicæ cives Hetruscam ditionem peragrantes Serenitas Vestra consuevit esse, in eo velit perseverare: nosque vicissim pollicemur atque recipimus, quod ad Parlamentum attinet, nihil defuturum, quod & Commercio & amicitiaæ mutuaæ, quæ inter utramque rempub. tam diu inveteravit, firmandæ ac stabiliendæ possit conducere; quam quidam omnibus utrinque humanitatis officiis mutuâque observantiâ in perpetuum conservari cupimus atque optamus.

Westmonasterio May 22.

1651.

Parlamentum Reipublicæ Angliæ
Serenissimo ac Potentissimo Principi
PHILIPPO QUARTO
 Hispaniarum Regi.
 SALUTEM.

PERMagnas nobis querelas deferunt hujus Reipub. mercatores qui in ditionibus *Vestræ Majestatis* mercaturam faciunt, de vi multa atque injuriis sibi allatis, deque novis etiam tributis sibi impositis à præfectis aliisque officialibus vestrorum portuum & locorum ubi negotia habent

bent, & nominatim in insulis *Canariis*, idque contra foederis articulos quos commercii causa utraque natio inter se sanxit. Quas eorum querelas veras esse jurejurando confirmavere. Nobisque demonstrant, nisi jus suum obtinere possint, suaeque damna refarciantur, nisi denique contra vim istiusmodi atque injurias praesidium aliquod certum, atque tutelam & sibi & fortunis suis habituri sint, non posse se amplius iis in locis negociari. Quibus eorum querelis graviter a nobis prepenfis, cumque facta illorum ministrorum iniqua, aut non omnino aut secus quam res se habet ad notitiam *Vestrae Majestatis* pervenisse existimemus, visum est nobis ipsas eorum querelas cum hisce litteris ad *Majestatem Vestram* unam mittere; nec dubitamus quin *Majestas Vestra* cum ipsius justitiae amore tum etiam commercii causam quod vestris haud minus quam nostris hominibus fructuosum est, suis praecipere velit ut ab iniquis illis nostrorum vexationibus abstineant, utque hujus Gentis mercatores expeditam justitiam obtinere queant, necnon debitam earum injuriarum reparationem, quae à Domino *Petro de Carillo de Guzman*, atque aliis illatae sibi sunt, contra praedictos foederis articulos, utque perficere velit *Majestas Vestra* ut praedicti Mercatores fructum illorum articulorum percipere queant, in eaque vestra tutela sint, ut tam ipsi quam fortunae suae ab omni injuria liberae & incolumes esse possint. Hoc autem magnam ex parte consecuturos se esse putant si ademptam sibi illam de judice conserva-

tore schedulam qui eos a novo quodam Confu-
latu in se quidem iniquiore defendat, *Majestas*
Vestra rursus concefferit; ne si nullum ab injuria
refugium sibi detur, abrumpi illud commercium
quod utrique genti commoda haud parva attu-
lit, violatis hunc in modum foederis articulis,
neceffe sit.

Westmonasterio.

Augusti 1651.

Serenissimo Principi Venetiarum
Duci, Senatuique Celsissimo

Concilium Status Parlamenti
Reipub. Angliae Authori-
tate constitutum

SALUTEM.

Serenissime Princeps, Celsissime Senatus, Amici
Charissimi,

Mercatores quidam nostri, quorum alteri
Joannes Dickons, alteri *Job Throck-morton*
nomen est, simulque alii apud nos questi
sunt, quòd cum Novembris octavo & vigessi-
mo 1651. ex jure & autoritate Curiae nostrae
Ammiralatùs occupassent in navi *Hirundine*
vulgo nuncupatâ, cui in Dunis consistenti *Isa-*
cus Taylor Magister erat, centum dolia Caveari
vulgò dicti, quae sua propria bona essent, inque
finu

finu Moscovitico Archangeli dicto eandem in navem imposita ; atque in eâ Curia , prout lege agitur , decretum obtinuissent quo dicta Caveari dolia sibi traderentur , fide sua prius interposita ; se in illius Curiae sententia acquieturos ; quodque eadem Curia , quo lis illa ad exitum perduceretur , cum pro more scripsisset ad Magistratus Judicesque Venetos , literas , quibus petebant uti *Joannem Piattum* (Veneta sub ditione degentem , qui Cavearum illum sibi vendicat) citarent quo re per procuratorem in Ammiralatus curia Anglicam se sisteret , ubi lis ista pendet , jusque suum probaret , tamen idem *Piattus* , & quidam *David Rutts* Hollandus , dum causa hæc in nostro hic foro pendet , multum supradicto *Joanni Dickons* aliisque illis mercatoribus de Cavearo isthoc negotium facessit ; eorumque bona & facultates nexu occupandas Venetiis curat : quæ omnia singulatim , & quid hæcenus in prædicta nostra curia sit actum in literis illis requisitoriis fusiùs exponitur , quas postquam à nobis inspectæ essent , ad serenissimam Venetiarum Rempub. , ut Mercatoribus in hac causa adjumento esse possint , transmittendas censuimus ; atque ab ea vehementer petimus ut non solum illæ literæ vim suam atque pondus illic habere queant , Sed etiam ut bona illa & facultates Mercatorum , quas prædictus *Piattus* & *David Rutts* nexu illigandas curarunt , liberentur ; Dictique rei ad nostram hic curiam remittantur , quid sui sit juris in hoc Cavearo sibi vendicando lege

experturi. Qua in te Celsitudo vestra & Sere-
nissima Respub. fecerit & quod æquissimum in
se est, & quod illibatâ utriusque Reipub. ami-
citiâ est dignum, quod denique, oblatâ quâvis
occasione, pari hujus Reipub. benevolentia
atque officiis compensabitur.

Datis ab Albâ Aulâ die

Feb. 1652.

Subscripuit & Concilii Sigillum
imprimendum curavit

Concilii Præses.

Ad Legatum Hispanicum.

Excellentissime Domine,

Concilium Status cum ex mandato Parla-
menti secundo die mensis *Martii* accepto
de charta Excellentia Vestra 17 *Feb.* Commis-
sariis hujus Concilii Exhibita deliberationem
seriam habuerit, in qua Excellentia Vestra vi-
sum est proponere, uti duobus capitibus illic
nominatis quasi præviis responderetur, re-
sponsum hoc Excellentia Vestra reddendum
censet.

Parlamentum, ubi ad ea respondit quæ ab
Excellentia Vestra cum primum audiretur pro-
posita sunt, tum etiam in iis literis quas ad Sere-
nissimum Hispaniarum Regem scripsit, quàm
sibi grata quamque accepta illa fuerit amicitia,
ususque mutuus qui & ab illius Regia Majestate
& à

& à vobis ejus nomine oblatus est, quam denique deliberatum sibi fuerit parem amicitiam quod ad se attinet pariaque officia reddere uberiorius declaravit.

Exinde visum Vestrae Excellentiae cum primum audita in Concilio est Decembris 19 styli veteris, huic Concilio proponere, veluti rationem quandam auspiciandae arctioris hujus Amicitiae, cujus facta tum à vobis mentio erat, uti certi ex suo corpore nominarentur qui ea quae attulisset Excellentia Vestra audirent, iis perpenſis de eorum utilitate ad Concilium referre quam primum possint, Cui vestro postulato ut satisfaceret certos ex suo numero Concilium nominavit, qui Excellentiam Vestram convenirent, quod & proinde factum est eorumque loco quae proponenda expectabantur, Chartam illam supradictam congressio ea protulit, ad quam responsum hoc Concilii est.

Cum Parlamentum ea declaraverit, Vestraque Excellentia progressum eum fecerit qui supradictus est, paratos nos esse, cum Excellentia Vestra in colloquium venire iis de rebus quas Domini regis Vestri nomine proposueritis, tam de amicitia jam pridem inita, quam de arctiore ineunda, aut si quid à nobis hujus Reipub. nomine in medium proferetur; cumque ad singula ventum erit, ita respondebimus, ut par est, naturaque rei postulabit.

Alba Aula. Martii 21. 1652.

Parlamentum Reipub. Angliæ;
Serenissimo Principi
FREDERICO TERTIO
 Daniæ Regi &c.

SALUTEM.

Serenissime & Potentissime Rex,

L Iteras Vestræ Majestatis undevigesimo proximi Decembris ad Parlamentum Reipub. Angliæ ab arce regia Haphniæ datas per virum nobilem *Henricum Willemssen Rosenwing de Lysacker* accepimus, eoque animi affectu quem res illic propositæ merentur libentissimè perlegimus, Vestræque Majestati persuasum hoc esse cupimus, eundem animum, eadem veteris amicitiae commercii, ac necessitudinis quæ Angliæ cum Dania per tot annos intercessit continuandæ & conservandæ studia quæ in Majestate Vestra sunt in nobis quoque esse; haud nescientes, quamvis divinæ Providentiæ visum sit gentem hanc tam benignè & placidè respicienti receptam apud nos prioris regiminis formam in melius mutare, easdem tamen utrinque rationes, eadem in commune commoda, eundem mutuò usum atque liberum commercium, quæ pactiões priores & foedera inter utramque nationem pepererunt, etiamnum durare vimque
 prio-

priorem obtinere, utrasque etiam obligare ut communem dent Operam Fœdera illa quàm utilissima sibi mutuo reddendo ut amicitiam quoque propriorem ac stabiliorem indies reddant ; Cumque Vestræ Majestati placuerit ea persequi consilia quæ in literis vestris regiis scripta sunt, Parlamentum eadem amplecti cum alacritate omni ac fide paratum erit, eaque omnia pro virili suâ parte conferre quæ illum ad finem conducere arbitrabuntur ; Sibi que persuadent, Majestatem Vestram hac de causa, ea itidem consilia capturum esse ad hanc Rempub. spectantia (cui etiam provisum pactis prioribus est ;) quæ ad hasce res facere possint ab Majestate Vestra nobis tam cupientibus propositas. Parlamentum interea Majestati Vestræ ac populo fœlicitatem prosperaque omnia precatur.

*Datis Westmonasterio die
Aprilis anno Dom. 1652.*

Sub Sigillo Parlamenti subscripsit ejus
nōmine atque authoritate

Procurator Parlamenti Reipub. Angliæ.

Parlamentum Reipub. Angliæ

Illustribus & magnificis

Hanseaticarum Civitatum Pro-
consulibus ac Senatoribus,

SALUTEM.

*Amplissimi magnifici & spectabiles Viri,
amici charissimi,*

Parlamentum Reipubl. Angliæ literas vestras sexto decimo *Januarii* proximè elapsi datas, perque vestrum publicum Ministrum *Leonem ab Aisema* allatas accepit atque perlegit, cumque ex earum authoritate audivit, qui & vestrarum Civitatum erga hanc Rempub. propensum & amicum animum exposuit & antiqua illa inter easdem amicitia ut porro maneat petivit. *Parlamentum* itaque pro se testatur atque confirmat pergratum sibi esse, pristinam illam amicitiam ac necessitudinem quæ huic Genti cum illis Civitatibus intercessit & renovari ratamque permanere, seque fore paratum quâvis occasione commodum oblatâ quod verbis in se recipit id reipsâ solidè præstare, eâdemque fide & integritate antiqui illi amici & foederati sui ut secum agant expectat: quæ autem prætereâ Residens vester speciatim in mandatis habuit, cum ea ad *Concilium Statûs* integra à nobis remissa

missa fuerint, quæque proposuisset ibidem consultata, Responsum illic atque transactum cum eo ita fuit, prout quidque maximè cum æqualitate & ratione consentire visum est, quod & Residens Vester renunciare ad vos poterit: ejus prudentia & spectata probitas collata in eum à vobis publici muneris notâ dignum prædicat.

*Datis Westmonasterio die
Aprilis ann. Dom. 1652.*

Sub Sigillo Parlamenti subscripsi ejusque
nomine & Authoritate

Prolocutor Parlamenti Reipub. Angliæ.

Parlamentum

R E I P U B. A N G L I Æ

*Illustri & Magnifico Civitatis
Hamburgensis Senatui*

S A L U T E M.

*Amplissimi Magnifici & Spectabiles Viri,
Amici charissimi.*

Parlamentum Reipub. Angliæ, literas vestras quinto decimo Januarii proxime elapsi Hamburgo datas, perque nobilem Virum Dominum Leonem ab Aisema vestrum & cæterarum civitatum Hanſaticarum Residentem allatas
B 7 accepit

accepit atque perlegit, eumque ex earum auctoritate audivit, & quæ amplius ab vestra Civitate mandata speciatim habuit, de iis ad *Concilium Status* remisit, quibus ut exciperent quæ ab eo proponerentur, deque iis quæ justa & æqua viderentur, cum eo quàm primum transigerent, authores fuimus; quod etiam exinde factum est. Utque Parlamentum earum rerum quæ à vobis afferentur debitam rationem semper se esse habiturum ostendit, suumque erga vestram civitatem singulare studium, misso illuc Residente suo, ibique manere jussu, testatum reddidit; ita vicissim expectat & meritò quidem postulat à vobis æqua reddi iis in rebus quæ hujus Reipub. ex usu, ab suo dicto Residente suoque nomine vestræ civitati, antiquitùs amicæ nobis & foederatæ, vel jam exposita vel in posterum exponenda erunt.

*Westmonasterio. Dat. die
Aprilis anno Dom. 1652.*

Sub figillo Parlamenti subscripsit ejus
nomine atque auctoritate

Prolocutor Parlamenti Reipub. Anglia.

Concilium Status Reipublicæ Angliæ

Serenissimo Principi

D. FERDINANDO SECUNDO

Magno Duci Hetururiæ

SALUTEM.

CONCILIIUM Status cum à *Carolo Long-*
lando qui in Portu Celsitudinis Vestræ *Li-*
burnensi, mercatorum Anglicorum negotia
 procurat, certius per literas fieret quatuor-
 decim Naves præfidiarias Fœderatorum *Belga-*
rum in eum Portum nuper venisse, qui naves
 Anglorum in ipso Portu vestro aut incensuros se
 esse aut depressuros minati palam sunt, Ve-
 stramque Serenitatem cujus fidem atque opem
 Angliæ Mercatores ibi commorantes implora-
 verant, *Liburnensis* Præsidii præfecto man-
 dasse, uti illis Anglorum navibus auxilio esset,
 sui muneris atque officii judicavit esse, uti Cel-
 situdinem Vestram certiores faceret, quàm
 huic Reipublicæ gratissima sit benevolentia illa
 atque tutela quam mercatoribus Anglis tam
 benignè præbuisstis, Vestræque Celsitudini pro-
 mittit atque in se recipit mansuram apud se in
 omne tempus hujus benè meriti gratiam, pa-
 ratumque se omni occasione fore parem amici-
 tiam pariaque officia vestro Populo reipsa præ-
 stare, omniaque facere quæ conservandæ inter
 hanc:

hanc Gentem atque Vestram solitæ benevolentiae, atque commercio possint conducere. Cumque naves Foederatarum *Belgii* Provinciarum inter ipsa de Foedere Colloquia à semetipsis oblata in Classẽ nostram summa cum perfidia non solum in ipsius Stationibus hostilia inceptaverint (quo in facinore DEUS, tanquam arbiter iustissimus, adversum se illis atque infensum ostendit) verum etiam in exteriorum portubus naves mercatorum nostrorum capere aut demergere conatae sint, necessarium etiam censuimus Scriptum hoc Parlamenti Republicae Angliae ad Celsitudinem Vestram unamittere; cujus emittendi occasionem dedere Controversiae inter hanc Rempub. & *Belgii* Provincias in praesentia coortae. Ex quo Celsitudo Vestra facile perspiciat, quam iniqua, quam contra fas omne atque jus Gentium facta villius Populi in hanc Rempub. extiterint, & quam ex animo Parlamentum studuerit publicae Pacis causam amicitiam eorum & societatem pristinam retinuisse.

Datis ab Alba Aula

Julii 29. 1652.

Subscripsit Concilii Nomine atque
Auctoritate

Concilii Praeses.

AD LEGATUM HISPANICUM.

Excellentissime Domine,

Concilium Status, deliberatione habitâ de illa chartula quam ^{27 May} 1652. ab Excellentia Vestra accepit, tum etiam de illa quam in ^{6 Juny} Concilio Status cum audiretur ¹⁶ hujus mensis Vestra exhibuit Excellentia, ad binas illas chartulas Responsum hoc reddit, Parlamentum Reipubl. Angliæ firmam amicitiam bonamque pacem, quæ huic Reipub. est cum Hispaniarum Regia Majestate conservandi percupidum, ex quo idem primùm Regis prædicti animum eodem inclinare Excellentia Vestra significavit, paratum semper fuisse eam utriusque gentis bono quam maximè firmare ac stabilire. Idque Concilium Status Parlamenti nomine atque mandato suis chartulis aliquoties Excellentiaestræ demonstravit; & speciatim, prout Excellentia Vestra petiverat, Commissarios delegit, quæ & Excellentiam Vestram convenirent, ab eaque acciperent, quæ ad prædictum finem conducentia proponerentur; quo in conventu eorum loco proponendorum visum est vobis generatim quædam, quasi futuro prævia colloquio, exhibere, de quibus Concilio videbatur, Parlamentum qui suus esset sensus chartis prioribus planum fecisse: tamen quo cumulatius satisfaceret, utque Excellentiaestræ nequa dubitatio restaret iis de rebus quæ tum proposuerat, Concilium in ea chartula quæ

quæ ^{31 Martii}_{10 Aprilis} data est paratum se esse ostendit cum Excellentia Vestra in Colloquium venire iis de rebus quæ à parte Regiæ Majestatis prædictæ in mandatis haberet tam de pristina amicitia quàm de actione futura, de iis etiam quæ à nobis hujus Reipub. nomine exhiberentur; cumque ad singula veniretur ea, quæ par esset, resque postularet, responsa dare: ad quæ visum est Excellentia Vestræ nihilum respondere neque per duos pene menses in ea re ulterius progredi. Vestramque chartulam ^{27 Maii}_{6 Junii}

1652. datam Concilium ex eo tempore primam ab Excellentia Vestra accepit, in eaque hoc solum proponitis, uti pacis atque fœderis articuli inter *Carolus Regem* nuperum vestrumque Dominum ⁶₁₆ *Novembris* 1630. pacti denuò

percurrantur, utque ejus capita quæque vel amplificentur vel immutentur pro temporum & rerum alio nunc Statu, necnon regendæ Reipublicæ formâ immutata, quod cum nihil amplius esset, quàm quod & nos in prædicta nostrâ chartula ^{31 Martii}_{10 Aprilis} summam atque dilu-

cidè significaveramus, expectabat Concilium quosdam speciatim articulos ex eo fœdere ab Excellentia Vestra propositum iri cum ea amplificatione iisque mutationibus quarum facitis mentionem, cum alioqui nobis impossibile sit ullum aliud responsum hac de re dare quàm quod jam dedimus. Verùm cum Excellentia Vestra ex charta sua novissima dilationem in
nos

nos conferre videatur, Concilium idcirco chartulam Vestram prædictam ^{27 May} datam quod-
^{6 Juny}

que in ea propositum erat denuò inspexit, seque de eo quod illic est propositum, priore illâ chartulâ Excellentiaë Vestraë plenè satisfecisse arbitratur, cui & hoc solum potest adjicere, se, cum Excellentiaë Vestraë videbitur, vel ex fœderibus jam factis vel alio quovis modo ejusmodi ferre conditiones quæ ad præsentem rerum ac temporum Statum erunt accommodatæ, quibus à parte Vestra fundari amicitiam vultis, ea vobis responsa exinde redditurum quæ ab se ad ea reddi æquum erit, quæque Parlamentum in eodem perseverare studio testentur, illibatam atque firmam cum rege vestro Domino amicitiam conservandis. Eaque ut auge scat etiam, Parlamentum omnem honestam seque dignam operam pro se quidem dabit.

Concilium præterea sui officii ducit esse, Excellentiam Vestram illius nostræ chartulæ Januarii 30. 1651. ad vos datæ admoneri, cui cum Excellentia Vestra responsum nondum dederit, instamus proinde atque expectamus ut Parlamento, de qua illic re facta mentio est, satisfactio detur.

Respon-

*Responsum Concilii Status ad Re-
plicatorum Dominorum Legatorum
Extraordinariorum serenissimi Regis
Daniæ & Norwegiæ Commissariis
Concilii traditam ad Responsum illud
quod reddidit Concilium ad quatuordecim
eorum postulationes.*

PRædictis Dominis Legatis ut satisfiat de responsa Concilii ad quintum, sextum, septimum, octavum, & nonum articulum, assentitur Concilium huic sequenti clausulæ suo responsum fine adjiciendæ. Videlicet, Præter illas Colonias, insulas, portus & loca in partis alterutrius ditione, ad quæ loca ne quis negotiandi aut commercii habendi causa accedat, lege cautum est, nisi impetrata prius ejus partis Licentia speciali ad quam illa Colonia, Insula, portus, aut loca pertinuerint.

Receptio cujusquam in navem quæ in flumina, portus, aut sinus alterutrius partis compulsa erit navem illam ulli exhibendæ molestiæ aut perscrutationi ex responso Concilii ad articulum undecimum obnoxiam non faciet, quemadmodum prædicti Domini Legati in replicatione sua videntur intellexisse, præterquam ubi illa receptio contra Leges, Statuta, aut morem illius loci est, in quo illa navis portum capefferit, qua in re videtur Concilio
nihil

nihil statui quod durius sit, sed quod utriusque Reipub. Saluti sit æquè conducibile.

Quod ad probandum cujusnam propriè naves & bona illa erunt quæ in naufragio ejici acciderint, Concilium existimat necesse esse jurandum dari in illis curiis quæ ad hujusmodi causas aut jam sunt constitutæ aut erunt constituendæ, ubi qui illa sibi vendicant audiri singuli possint & cujusque jus cognosci ac dijudicari, quod scriptis testimoniis, quæ vulgo *Certificata* nuncupantur, tam clarè atque distinctè fieri non potest, unde multi scrupuli ac dubitationes existere poterunt, multæ etiam fraudes ac doli in illud genus probationis irrepere, quod ne eveniat utriusque partis interest. providere. Concilium etiam æquum esse arbitratur, definiri certum tempus ante quod tempus qui justum earum rerum dominum se esse non probaverit, excludetur ad evitandas sine fine lites. Quod autem ad modum venundandi ea bona quæ ejecta in naufragio facile corrumpuntur, visum est Concilio eum modum proponere qui ad lucernam dicitur, ut qui sit modus maximè probabilis verum bonorum pretium eliciendi ad dominorum emolumentum; tamen si prædicti Domini Legati inventam aliam rationem attulerint quæ huic fini magis conducere videbitur, per Concilium non stabit quo minus id fiat quod æquum erit: neque intelligitur ob hanc rem huic Tractationi moram afferendi occasio ulla præbeatur.

Quod autem ad eorum supplicium qui propositum

positum foedus ruperint , Concilium id adjecit ,
cujus in responso suo ad articulum quartum de-
cimum fit mentio ad majorem ejus articuli effi-
cacia[m] ipsumque foedus eò firmitus atque diu-
turnius reddendum.

Ad clausulam Articuli quarti decimi extre-
mam quod attinet respondere , non expedire
censemus illis foederibus ac Societatibus , qua-
rum in prædictis responsis facta est mentio ,
quæque generatim duntaxat proponuntur as-
sensum nostrum exhibere antequam quales illæ
sint , exploratius nobis fuerit , de quibus cum
Excellentiis Vestris visum erit Concilium cer-
tius facere , responsum expressus ad id reddere
poterimus.

*Replicatio Concilii Status ad re-
sponsum prædictorum Dominorum Lega-
torum quod ad senos articulos à prædicto
Concilio nomine Reipub. Angliæ exhibi-
tos est redditum.*

Concilium, inspectis prædictorum domi-
norum Legatorum diplomatis quibus collata
in eos potestas est transigendi cum *Parlamento*
aut ejus Commissariis de iis omnibus quæ tran-
sigi expediverit foederaque vetusta renovandi
novaque jungendi , existimabat quidem præ-
dictos dominos Legatos ea autoritate esse præ-
ditos ut & responsa dare possent , & omnia
transigere tam quæ à parte hujus Reipub. quam
quæ

quæ à parte *Regis Daniae & Norwegiae* ferrentur, adeoque responsa quæ prædictis Dominis Legatis ad primam, secundam, tertiam & quintam Concilii postulationem dare libuit haud expectabat, quo factum erit ut huic præsentì tractationi necessario more afferatur cum & in se æquissimum sit & in Concilio deliberatum fœdus integrum tractando simul complecti tam de iis quæ ad hanc *Rempub.* quam quæ ad Regna *Daniae & Norwegiae* spectant. Quapropter Concilium enixè flagitat ut Excellentiae Vestrae respondere ad prædictum nostrum primum, secundum, tertium, & quintum postulatum velint.

Ad quartum articulum de portoriis *Gluckstadii* cum ea jam antiquata sint, quemadmodum Excellentiae Vestrae in responso meminerunt, instat Concilium uti eorum illa antiquatio etiam per hoc fœdus rata habeatur, ne forte in posterum revocentur.

Quod ad sextum articulum, qui de pyratice est, eum quidem inseruit Concilium ut qui ad utriusque commoda æquè pertineret & ad commercium in commune stabiliendum quod à pyratibus atque prædonibus perquam turbatur utque interrumpitur; cumque responsum Dominorum Legatorum de hoc articulo ad hostes tantum referatur, mentionem Piratarum nullam faciat, Concilium idcirco expressius responsum ad id petit.

Cumque prædicti Domini Legati in sua replicatione ad responsum Concilii & decimum
suum

suum articulum, & ad eum Concilii responsum prætermiserint, Concilio necessarium visum est prioribus suis postulatis sequentem hunc articulum adjungere.

Populum & incolas Reipub. Angliæ qui negotia aut commercium per ulla regna, regiones, aut ditionem *Regis Daniae & Norwegiae* habuerint portorii, tributi, census, vectigalis aut stipendii cujusvis plus in posterum non solvere aut alio quovis modo atque populus foederatarum *Belgii* Provinciarum, aliave quævis natio externa minimum illic solvens mercaturamque faciens, si solvit aut solutura est, parique frui & æquè amplâ libertate privilegiis & immunitatibus, cum in adventu, tum in reditu & quamdiu illic commorabuntur, in piscatu etiam, mercatura, atque alio quocunque modo, quo ullius exteræ gentis populus in prædictis regnis totaque ditione dicti *Regis Daniae & Norwegiae* fruitur aut frui queat; quibus itidem privilegiis populares *Regis Daniae & Norwegiae* per omnes Provincias ac ditionem *Reipublicae Angliæ* pariter fruuntur.

Concilium Status Reipub. Angliæ

*Serenissimo Principi*D^o. FERDINANDO SECUNDO,
Magno Duci Hetruriæ,

SALUTEM.

Serenissime Princeps, Amice Charissime,

Concilium Status, cognito tam per Oratorem Celsitudinis Vestræ hîc commorantem, quam per *Carolus Longlandum* Mercatorum Anglicorum negotia *Liburni* procurantem, quanta cum benevolentia ac fide Celsitudo Vestra navium Anglicarum in *Liburnensem* portum se recipientium tutelam suscepit, contra *Belgarum* naves prædatorias exitium illis atque direptionem minitantes, literis undetrigesimo Julii datis (quas ad Celsitudinem Vestram, jamdudum pervenisse sperat) significavit quàm id sibi gratum acceptumque accidisset, eodemque tempore scriptum Parlamenti Reipublicæ Angliæ de controversiis inter hanc *Rempub.* & *Fœderatas Belgii Provincias* in præsentia exortis ad Serenitatem vestram unâ misit. Cumque rursus per eundem *Carolus Longlandum* Concilium intellexerit, quæ ulterius mandata dederit Celsitudo Vestra de incolumitate atque tutela navibus *Anglicis* præstanda, etiam *Belgis*, ne id fieret, importunè contra nitentibus, ne

C

hanc

hanc quidem occasionem pretereundam esse censuit, significandi rursus Celsitudini Vestrae se vestram justitiam & singularem in tutandis navibus suis constantiam cum plurimi facere tum sibi etiam gratissimam habere. Quod cum solidæ amicitiaë studiique vestri in hanc rempub. haud leve inducium sit, persuadere sibi poterit Celsitudo Vestra paria officia atque studia in nobis erga Vestram Celsitudinem nunquam se esse desideraturam. Quæque declarare possint quàm nobis deliberatum sit eam amicitiam quæ huic Reipub. cum Vestra Serenitate est, quam constantissimè atque diutissimè pro virili nostra parte conservare. Nos Interim navibus nostris omnibus, quæ vestros portus intraverint disertis verbis mandavimus, ut salutationes explosione tormentorum consuetas, omnemque honorem debitum vestrae Celsitudini exhibere meminerint.

Datis Alba Aula Septemb. 1652.

Et Concilii Sigillo deinde consignandis
subscripsit

Concilii Præses.

Ad Legatum Hispanicum

ALPHONSUM de CARDENAS.

Excellentissime Domine,

L Iteræ Excellentiaë Vestrae *Novemb. 1652.*
datæ, & à Secretatio vestro *Novemb. 8.*
redditaë unà cum duobus libellis supplicibus
simul

simul involutis in Concilio recitatæ sunt de navibus nimirum *Samfone* & *San Salvatore* vulgò nominatis, ad quas Concilium responsum hoc reddit, Navem Anglicam præfidiariam, cum in prædictas naves non in *Dunis*, ut scribit Excellentia Vestra, sed in alto incidisset, tanquam hostium navem prædæ habitam in portum adduxisse; curiamque Ammiralatûs ad quam propriè de causis hujusmodi attinet cognoscere illius causæ cognitionem pro jure sibi sumpsisse; ubi singuli partis utriusque quorum id interest ampliter & liberè audientur, jusque suum quisque obtinebit: vestræ porrò Excellentiae rogatum ad illius Curiae judices misimus quo certius intelligamus quousque iis de navibus in judicio processerint. Quod simul ac nobis compertum erit ea dari mandata hæc de re curabimus quæ & æquum erit, & eâ dignum amicitia quæ huic Reipublicæ cum Rege vestro intercedit, nec minùs confidimus Regiam ejus Majestatem minimè passurum esse hujus Reipublicæ hostium bona sub nomine ejus subjectorum elabi aut delitescere.

Subscripsit & Concilii Sigillum
apponendum curavit

GUILLIELMUS MASHAM.
Concilii Præses.

Datis ab Albâ Aulâ 11. Novemb.

An. Dom. 1652.

L E G A T O H I S P A N I E N S I

Excellentissime Domine,

A Llatum nuper ad Concilium est ab Navarcho nostro *Badileo* navium hujus Reipub. ad *Gaditanum* mare Præfecto, se cum tribus aliis navibus præfidiariis postquam undecim Belgarum impetum continuato bidui certamine sustinuisset, ad portum *Longonem* vulgò dictum ad sarcienda quædam in eo prælio accepta incommoda, easque res comparandas quæ sibi ad pugnam opus essent, in portum *Longonem* vulgò dictum se recepisse, ubi ejus loci Præfectus in eum cæterasque sub ejus ductu naves omnia & justissimi & humanissimi simul Viri officia implevit; cumque is locus in ditione Serenissimi Regis Hispaniarum sit, Concilium certè singularem præsidii illius singularem humanitatem reipsâ cognitam arctioris amicitiae mutuae tam auspiciatò cœptæ fructum uberem esse existimat; sui que adeò officii ducit esse, ob acceptum tam opportunò beneficium ejus *Majestati* gratias agere, vestramque rogat Excellentiam ut hoc *Regi suo* serenissimo velit primo quoque tempore significare, ei que persuasum reddere *Parlamentum Reipub. Angliæ* paratum semper fore paria amicitiae atque humanitatis

manitatis officia oblatâ quâvis occasione referre.

Dat. Westmonasterio 11. Novemb.

An. Dom. 1652.

Subscripsit & Concilii Sigillum
apponendum curavit

GUILIELMUS MASHAM

Concilii Præses.

Parlamentum Reipublicæ Angliæ,

Serenissimo Principi

D^o FERDINANDO SECUNDO

Magno Duci Hetruviæ,

SALUTEM.

Serenissime Princeps Amice Charissime,

Parlamentum Reipub. Angliæ literas vestræ
Celsitudinis *Augusti* septimo decimo, Flo-
rentiâ datas accepit: in quibus de restitutione
navis cujusdam agitur oryzâ onustæ, quæ na-
vis à capitaneo *Cardio Liburniensi* vendicatur.
Et quamvis in nostrâ Ammiralatûs curiâ contra
prædictum *Cardium* in ea causa sententia Judi-
cum lata jam sit, & apud Delegatos provocatio
tum penderet, tamen cum hoc Celsitudo vestra
petat, Parlamentum, quo tam amici Principis
benevolentiam ac necessitudinem quanti faciat

testificari possit , mandavit quibus curæ ea res est , ut navis illa cum oryzâ , vel saltem ejus justum pretium prædicto Capitaneo *Cardio* reddatur ; cujus mandati fructum procurator ejus apud nos re ipsâ jam percepit. Et quemadmodum Celsitudo vestra suum navibus Anglorum in portu *Liburniensi* patrocinium atque tutelam benignè præbendo Parlamentum sibi magnoperè devinxit (cujus rei gestæ narratio tam ab Oratore hîc vestro , quàm à *Carolo Longland* mercatorum nostrorum illic procuratore , delata nuper ad nos est) ita Parlamentum summo vicissim studio dabit operam , quotiescunque occasio dabitur , ut sua omnia sinceræ amicitiae atque benevolentiae officia in Celsitudinem vestram solidè constare possint ; quam adeò divinæ benignitati atque tutelæ commendatissimam vult esse.

*Datis Westmonasterie die
Novemb. 1652.*

Subscripsit & Sigillum Reipub.
apponendum curavit

*Prolocutor Parlamenti Reipub.
Angliæ.*

Parlamentum Reipub. Angliæ

Serenissimo & potentissimo Principi

D A N I Æ R E G I &c.

Serenissimo & potentissimo Rex,

Parlamentum Reipub. Anglia postquam accepit ab illius Classis Præfecto quæ nuper ad *Hafniam* Majestatis Vestræ portum missa est, ut navibus Mercatorum nostrorum inde redeuntibus domum præsidio esset; prædictis navibus permissum non esse secum discedere; verum illic Majestatis Vestræ jussu retineri; productis etiam ab eo literis Regis vestram ea in re sententiam declarantibus, negat explicatas in iis literis rationes cur naves illæ retineantur ulla in parte sibi satisfacere; ut igitur in re tanti planè momenti quæque ad prosperum utriusque Gentis Statum tantoperè conducit sequuturo fortasse majori cûpiam incommodo maturiùs occurratur, misit *Parlamentum* Virum illustrissimum & spectatæ fidei *Richardum Bradshaw Armigerum*, *Hamburgi* Oratorem, qui itidem ad Majestatem Vestram Oratoris munus impleat, cum iis disertè mandatis, ut de prædicto Negotio agat: Vestramque adeò rogamus Majestatem eidem velit Viro & aurem benignam & fidem amplam perhibere, quicquid super hoc negotio Vestræ Majestati nostro nomine proposuerit.

fuerit : quam Nos divinæ Tutelæ & Providen-
tiæ commendatam volumus.

*Datis Westmonasterio 6. die
Novemb. An. Dom. 1652.*

Sub Sigillo Parlamenti ejusque Nomine
atque Authoritate subscripsit

*Prolocutor Parlamenti Reipublicæ
Angliæ.*

Parlamentum Reipub. Angliæ

Serenissimo Principi

VENETIARUM DUCI

SALUTEM.

Parlamentum Reipub. Angliæ literas Celsitudi-
nis vestræ primo Junii 1652. datas per *Lau-
rentium Palutium* accepit, ex quibus cum &
vestrum, & Senatus propensum in hanc Rem-
publicam animum prospiciat, occasionem hanc
suum vicissim erga Serenissimam Rempublicam
Venetam singulare studium ac benevolentiam
declarandi, libentèr arripuit, quam & re ipsa
idque ex animo, demonstrare quoties usus ve-
nerit, haudquaquam gravabitur, cui & omnes
vel conservandæ vel etiam augendæ amicitiae
ususque mutui rationes in medium allatæ erunt
itidem acceptissimæ, vestræque adeò Celsitudini
& Rei-

& Reipublicæ Serenissimæ fausta omnia ac prospera exoptat atque præcatur.

Datis Westmonasterio die

Decemb. An. Dom. 1652.

• Subscripsit & Parlamenti Sigillum
imponendum curavit

*Prolocutor Parlamenti Reipub.
Angliæ.*

Parlamentum Reipub. Angliæ

Serenissimo Principi

FERDINANDO SECUNDO

Hetruriæ Magno Duci,

SALUTEM.

CUM *Parlamentum Reipub. Angliæ* antehac
suis Navarchiis atque Præfectis navium ad
loca sub vestræ Celsitudinis ditione appellenti-
bus, etiam atque etiam mandaverit, ut se pa-
catè atque modestè gererent, eaque qua decet
observantia erga Principem Serenissimum cujus
hæc Respub. & conservare amicitiam tantoperè
studeat, & tantis beneficiis affecta sit, prorsus
inopinatum sibi quidem accidit, quod à Navar-
cho *Appletono* in *Liburnensi* portu intolentiùs
factum esse accepit; eum nimirum ab eo vigili-
dum in molestationem ageret, vim attulisse,
idque tum contra fidem atque obsequium huic

Reipublicæ ab eo debitum, tum contra obli-
 vantiam atque honorem qui vestræ Celsitudini
 suâ in ditione jure optimo debetur: quam rem
 totam sicuti gesta est, ex literis vestris 7. & 9.
Decembris Florentiâ datis Parlamentum intel-
 lexit; uberius etiam spectatissimum virum
Almericum Salvettum, vestrum hic Residen-
 tem; Atque vestræ Celsitudinis honorem qui
 hâc in re agi videtur, usque adeo sibi commen-
 datum habet, ut Concilio Status id negotii de-
 derit, uti literas Navarcho *Appletono* quam pri-
 mum scribendas curaret, quibus is terrestri
 itinere confestim huc advolare juberetur, inso-
 liti hujus facti & extraordinarii rationem red-
 diturus (quarum exemplum literarum his in-
 clusum unâ mittitur) qui ubi advenerit & facti
 postulabitur, de eo id statutum iri pollicemur,
 quod testificari possit se vestri juris violationem
 haud minùs moleste ferre, quam si ipsum jus
 suum violaretur. Quid etiam de nave dictâ
Phœnice Liburni recuperata consultatione ha-
 bita, quæ res à Celsitudine vestra nec non ab
 Oratore suo narratur atque urgetur, contra da-
 tam à Navarcho *Appletono* fidem fuisse, quâ
 obstrictus erat ne *Hollandos* intra conspectum
 portus aut laternæ adoriretur, vestramque Cel-
 situdinem ea fiducia nixam, *Hollandis* fide datâ
 de incolumitate promississe, debere proinde
 eorum satisfactioni prospicere, quibus vestrâ
 sub fide damnum datum est, Parlamentum ab
 Excellentia vestrâ petit, ut hoc sibi persuasum
 habeat, hanc rem, quemadmodum sine suo

—con—

consilio aut mandato est gesta, ita hoc etiam ab suâ voluntate ac mente longissimè abesse ut Celsitudo vestra ullo incommodo aut honoris imminutione ex illo facto afficiatur : quin imò se operam daturum, ut vobis satisfaciendi aliqua ratio ineatur, prout sibi quæstione habitâdere tota constiterit : quam ut plenius intelligere possit, ipsum Navarchum *Appletonum* ab se audiri necessarium esse judicat ; qui & eâdem fide obstrictus erat, & ab Excellentia vestrâ creditur, ejusdem violationi saltèm assensisse ; præsertim cum is tam brevi sit ad nos reversurus, atque illum postquam Parlamentum audiverit, & cum dicto Oratore vestro rationes amplius contulerit, hâc de re haud exigui sanè momenti eam sententiam feret, quæ & æqua erit, summæque benevolentia quâ celsitudinem vestram prosequitur consentanea, collatis denique à vobis in se beneficiis haud indigna. De quâ ne interim dubitaret Celsitudo vestra literis per eundem hunc tabellarium statim missis certior factam primo quoque tempore volebat ; seque nullam occasionem esse prætermisurum, qua possit re ipsa testari, vestram amicitiam quanti faciat.

Datis Westmonasterio 14. die

Decembris An. Dom. 1652.

Subscripsit & Parlamenti Sigillum
imprimendum curavit

*Prolocutor Parlamenti Reipub^l
Angliae.*

Concilium Status Reip. Anglicanæ

*Serenissimo Principi***FREDERICO Hæredi Norwegiæ***Duci Slesvici, Holsatiæ, Star-
marciæ, Ditmarsiciæ, Comiti in
Oldenburgh & Delmenhorst*

SALUTEM.

Quanquam sapientissimo Deo visum est rerum omnium Moderatori clementissimo præter illud onus quod nobis cum maioribus nostris commune imposuit, ut pro libertate nostra contra tyrannos honestissima bella gereremus, iis nos etiam auspiciis eaque divina ope præ illis insigniter adjuvare, ut non solum civile bellum restinguere sed & causas ejus in futurum præcideret, nec non & hostium externorum inopinatos impetus propulsare valuerimus, eundem tamen supremi numinis in nos favorem ac benignitatem gratissimis quantum possumus animis agnoscentes, non ita rerumstrarum successibus efferimur, ut non singularem potius Dei justitiam ac providentiam edocti, atque nosmet largiter experti; & bellum omne quantum licet aversemur, & pacem cum omnibus cupidissimè amplectamur. Quemadmodum igitur quæ amicitia, quæque foederum jura nobis cum.

eum populis quibuscunque ac Principibus antiqua intercessere, ea hactenus cuiquam nec violavimus priores, nec violata volumus, ita & Celsitudo vestra pro vetusta sua cum *Anglis* & à majoribus accepta amicitia poterit certissima animi persuasione de nobis aqua omnia atque amica, & sibi & suis polliceri. Denique ut delata à Celsitudine vestra nobis sua studia atque officia plurimi ut par est facimus, ita operam dabimus ut neque nostra ullo tempore vel sibi vel suis deesse sentiat: Vestramque adeò Celsitudinem Omnipotentiae numinique Dei Omnipotentis quàm maximè commendatam cupimus.

Datis in Alba Aula die

Julii Ann. 1653.

Subscripsit & Concilii Sigillum
imprimendum curavit

Concilii Praeses

COMITI OLDENBURGICO.

Illustrissime Domine,

Parlamentum Reipub. *Angliae* plurimam salutem ab Amplitudine vestra officiosissimè atque humanissimè sibi dictam, per *Hermannum Mylium*, Jurisconsultum Deputatum & Consiliarium vestrum accepit: qui & fausta omnia Parlamento reique *Angliae* vestro nomine precatus est, & hujus Reipub. amicitiam ut

vobis facta tecta permaneret simul expetivi: literas etiam liberi com meatus, quibus vestrae conditionis populus eo tutius negotiaretur, navigaret, & commercia exerceret, nec non & nostra ad Publicos foris Ministros mandata uti Amplitudini vestrae rebusque vestris, suis officiis atque consiliis opitularentur, idem à nobis petivit. Nos & petitis hisce libenter annuimus, & cum amicitiam, tum etiam literas illas expetitas, illaque ad Ministros Publicos mandata sub Parlamenti sigillo concessimus. Et quamquam aliquot jam menses abierunt, ex quo Vester Publicus Minister ad nos primum accessit, ea tamen dilatio neque ex eo orta est, quo nos petitioni, Amplitudinis Vestrae nomine factae, assentiri gravaremur, neque quo Vester Depu- tatus nos assidue sollicitare, ullo tempore desti- terit, (qui certe omni cum diligentia, nec non officiosa simul instantia, ut confecto negotio, compos voti dimitteretur, quotidie nos effla- gitavit) verum ex eo solum accidit, quod maxima quidem & gravissima Reipub. nego- tia, quaeque ad eam vehementer pertinere aut agitarentur per hoc totum fere tempus, aut transfigerentur. Qua de re dignitatem vestram Illustriss: certiore facendam esse censuimus, ut ne quis dilationem hanc secus interpretando, gravatim aut aegrè impetratum hoc esse existi- met, quod à Parlamento Reipub. *Angliae* liben- tissimè concessum est. Cujus nomine consignare hæc iussus est

HENRICUS SCOBELL *Clericus Parlam.*
Par-

Parlamentum Reipub. Angliæ

*Illustribus & Amplissimis Consulibus ,
Scultetis , Landam. & Senatoribus Can-
tonum Helvetiæ Evangelicorum , Tigurini ,
Bernensis , Glaronensis , Basileensis , Schaf-
fusiensis , Abbatiscellani , nec non ejusdem
Religionis Confœderatorum in Rhætia , Ge-
nevæ , Sanctogalli , Multusii & Biennæ ,
Amicis nostris charissimis*

SALUTEM.

L Iteras vestras, *Illustres Domini atque Amici*
Charissimi, Decembris 24. 1652. ad Nos datas
accepimus, omni humanitate, benevolentia,
studioque erga nos nostramque Rempub. egre-
gio reſertas: quodque nobis semper majus &
antiquius debet esse, charitatem fraternam &
verè christianam spirantes. Deoque imprimis
Optimo Maximo gratias agimus, qui vos totque
vestras *Civitates* nobilissimas, non tam illis
montium claustris quàm insita vestra fortitu-
dine, pietate, & prudentissimâ æquissimâque
rerum civilium administratione, mutuâ de-
nique foederum fide circumvallatas atque mu-
nitas, firmissimum universis orthodoxis præsi-
dium illis in locis excitavit atque constituit: vos
deinde, qui par omnem Europam primi fere
mortalium post inſectas ab Aquilone Barbaro-
rum

rum Regum tyrannidos , Deo vestram virtutem prosperante , libertatem vobis peperistis , partam haud minore prudentiâ ac moderatione , tot per annos , illibatam conservastis ; de nobis nostrâque libertate nuper vindicatâ tam præclare sentire , tamque sinceros Evangelii cultores de nostro in orthodoxam fidem amore ac studio , tam constanter persuaderi , id quidem longè nobis gratissimum est. Quod autem ad pacem nos piè sanè & affectu , ut nobis est persuasissimum , verè christiano adhortamini , permagnum certè pondus apud nos ea adhortatio habere debet ; cum propter ipsam rem , quam suadetis , maximè expetendam , tum propter summam etiam auctoritatem , quæ Vobis præ cæteris hâc in parte meritò tribuenda est , qui inter maximos circumquaque bellorum tumultus , & ipsi summam pacem domi forisque tandiu colitis , & aliis omnibus pacis colendæ simul hortatores & exemplum optimum extitistis ; cum id denique suadeatis , quod nos deditâ operâ , idque haud semel , non tam nostris rationibus , quàm universæ rei Evangelicæ prospicientes , per Legatos aliosque publicos Ministros petivimus , amicitiam nimirum & arctissimum fædus cum fœderatis *Belgarum Provinciis* ferendum. Verùm illi (sive illa perpetuò nobis infesta , regiis addicta partibus , tyrannidis & ipsa apud suos affectatæ comperta *Arausiana* factio potius dicenda est) quo pacto Legatos nostros , non de pace , sed de fraternâ amicitia ac fœdere arctissimo venientes acceperint .

rint, quas postea belli causas præbuerint, ut nos, inter ipsa Legatorum suorum de fœdere colloquia, instructâ classè nihil tale cogitantes, in ipsis navium stationibus nostris, ultrò laceraverint, ex illo à nobis eâ de re publicè scripto, & nunc unâ cum hisce literis ad vos misso, abundè intelligetis. Nos autem in id sedulò incumbimus, Deo benè juvante, quamvis re hætenùs, tam prosperè gestâ, ut neque nostris quicquam viribus aut copiis tribuamus, sed Uni Omnia Deo, neque successibus insolentèr efferamur: Eundemque animum retinemus conficiendæ justæ atque honestæ pacis omnes occasiones amplecti paratissimum. Vos interim, *Illustres ac præstantissimi Domini*, quibus pium atque præclarum hoc studium est, solo Evangelico amore impulsis, fratres inter se certantes componere atque conciliare, & omni apud homines laude digni, cœlestis illius pacificorum præmii apud Deum haud dubiè compotes futuri, cujus summæ benignitati atque gratiæ vos vestrosque omnes ex animo commendatos volumus, si qua in re vobis usui esse possumus, ad omnia cum amicorum tum fratrum officia promptissimi.

Datis Westmonasterio die Octobris

An. Dom. 1653.

Subscripsit & Parlamenti Sigillum
imprimendum curavit.

*Prolocutor Parlamenti Reipub.
Angliæ.*

Le-

Legato Hispanico.

Illustrissime Domine,

CUm graves ad nos allatæ essent querelæ *Philippi Noelli*, *Joannis Godalli*, & societatis mercatorum in Anglia *Foiensium*, Navem quandam suam *Annam Foyensem* dictam, navem *Anglicum* à sese instructam, suis mercibus onustam, cum domum suam ad portum *Foyensem*, cursum teneret circa Festum *Michaelis Archangeli*, à nave quâdam prædialiariâ *Ostendensi*, cui præfuit *Erasmus Bruerus*, oppressam injustè & sine causa captam fuisse, inque ea nautas indignè & barbarè tractatos, Consilium Status ea de re ad *Marchionem Ledæ* scripsit, (quarum literarum exemplar Amplitudini vestræ unâ cum his mittemus) Expectabatque ab eo sine mora mandatum iri ut ex jure & æquo ista in re quam primum ageretur. Verùm cum denuò prædictus *Noëllus* unâ cum illa societate graviter queratur; quamvis literæ nostræ *Marchioni* redditæ fuerint, & mercatores illi, ab eo tempore se *Brugas* ad maritimarum causarum curiam contulerint, ibique jus suum suæque causæ veritatem probaverint, justitiam tamen sibi denegari, tamque iniquè secum agi ut quamvis per tres amplius menses cognitioni matura res fuerit, tamen ab illa curia se impetrare non posse ut sententiam tandem ferat; quin navis
eorum

eorum & bona nihilominus retineantur, seque par hanc moram in persequendo jure suo magnos sumptus fecisse. Non ignora *Amplitudo Vestra* & juri Gentium & commercii & amicitiae, quae inter Anglos & Flandros est, contrarium esse, ut navis aliqua *Ostendensis* navem aliquam *Anglicam* caperet, si quidem mercibus *Anglicis* onusta *Angliam* petat, quaque ab illo Praefecto in nautas *Anglicos* inhumaniter ac barbarè commissa sunt poenam gravem mereri. *Concilium* itaque hanc rem *Amplitudini* vestrae commendat, petitque ut de ea in *Flandriam* scribere velitis, eamque operam primo quoque tempore dare ut ne hoc negotium diutius extrahatur sed uti ea justitia fiat, ut praedicta navis & bona, unà cum damnis, sumptibus & foenore quae *Angli* isti propter illam injustam interceptionem sustinuerunt, *Authoritate* Curiae maritimae *Brugensis*, aut alio modo bono iis reddantur, utque curetur nequa ejusmodi interceptio deinceps fiat, quin amicitia quae nostris hominibus cum *Flandris* intercedit sine ullâ violatione conservetur.

*Obsignatum nomine & jussu Concilii Status
Parlamenti auctoritate constituti.*

Mar-

Marchioni Ledæ.

Illustrissime Domine ,

GRaves ad nos allatæ sunt querelæ , à *Philippo Noëlo* , & *Joanni Godallo* , & Societate mercatorum *Foyensium* , de nave quadam sua , cui nomen *Anna Foyensis* , quæ cum esset Navis Anglica , ab illis instructa , & ipsorum solummodo mercibus onusta , circiter festum *Michaëlis Archangeli* ad portum suum renavigans , à nave præfidiaria quæ ad *Ostendam* pertinebat , cujus erat præfectus *Erasmus Bruerus* ; de improvise capta fuit. Nuntiatum porrò est , *Ostendenses* , cum in sua potestate navis esset , nautas omnes nimis inhumaniter tractasse , accenso fune digitis admoto , & navis magistrum undis immeruisse , atque pœne suffocasse , ut minimè veram ab ipso confessionem extorquerent , de navi atque mercimoniis illis , quasi Gallorum essent. Quod tametsi Magister ille cæterique socii navis firmiter pernegabant , *Ostendenses* tamen , & navim & mercedes in portum suum abduxerunt. Hæc in *Curia Navali Angliæ* , inquisitione factâ , testibusque adhibitis vera esse apparuere , ut ex autographis testimoniorum quæ cum his literis simul misimus manifesto liquebit. Cum itaque illa Navis , *Anna Foyensis* dicta , atque mercimonia omnia peculiariter verè ac propriè ad *Anglos* pertineant ,

neant, adeo ut nulla causa appareat cur *Ostendenses* vel illam vel ea vi caperent, multò minùs auferrent navis Magistrum, aut societatem tam durè tractarent; cumque secundùm leges Nationum arque amicitiam inter *Anglos Flandrosque*, navim illam atque mercimonia reddi oporteat, magnoperè petimus ab Excellentia vestra, ut jus suum *Anglicani* maturè obtineant, atque illis satisfiat qui damnum acceperunt, utque commercium, & Amicitia quæ inter *Anglos Flandrosque* est, diù atque firmitè conservetur.

Legato Hispanico.

Parlamentum Reipub. Angliæ cum intelligat, plurimos ex populo in hac urbe tam Excellentia vestra, quàm aliorum Legatorum & ministrorum ab exteris regionibus publicorum hic versantium domos *Missæ* audiendæ causâ frequentare, Concilio Status mandavit, uti Excellentia vestra significaret, cum hoc gentis hujus legibus damnatum, ac in hac nostrâ Republica mali admodum exempli sit, offensivis plenum, censere se, sui planè officii esse, ne quid tale dehinc fiat providere; coetusque ejusmodi in futurum prorsus interdicere. Quâ de re Excellentiam vestram admonitam nunc esse cupimus, ut ne quem ex populo hujus Reipublicæ *Missæ* audiendæ causâ suam in domum posthac velit admittere. Et quemadmodum *Parlamentum* diligenter curabit ut Legati
jus

jus & privilegia quæque vestræ Excellentię in-
violata servantur, ita hoc sibi persuasissimum
habet, *Excellentiam* vestram, quandiu hęc
commoratur, leges hujus Reipub. per se suosve
nolle ullo modo violatas.

*Summarium damnorum singulorum &
haud fictorum, quibus Societas Anglicana
multis Orientalis Indiæ Locis à Belgica
Societate affecta est.*

1. **D**Amna illa sedecim Articulis comprehensa & pridem exhibita, quorum summa est 298555. *Regiorum* & quæ est monetæ nostræ. } L. s. d. 74628:15:00

2. De *Pularonis* Insulæ fructibus satisfactionem dari postulamus ab anno 1622. ad hoc usque tempus ducentes millenum *Regiorum* & præter dispendium futurum donec jus ditionis in illam Insulam nobis restituatur eo rerum statu in quo fuit cum erepta nobis est, prout foedere sancitum erat: quod est nostræ monetæ. } 50000:00:00

3. Satisfactionem postulamus de omnibus illis mercimoniis ci-

L. s. d.

bariis & apparatus, qui ab
Agentibus Societatis *Belgiæ* apud
Indos ablati sunt, aut iis traditi,
aut ulli ex eorum navibus eo cur-
sum tenentibus aut inde redeun-
tibus, quorum summa est 80635.
Regiorum: nostræ monetæ

20158:00:00

4. Satisfactionem postulamus
ob portiora *Mercium Belgicarum*
quæ in *Perside*, aut navibus impo-
sitæ sunt, aut in terram expositæ
ab anno 1624. prout nobis à Rege
Persarum concessum erat; quæ
minoris æstimare non possumus
quam Octogies millenis *Regiis*.

20000:00:00

5. Satisfactionem postulamus
ob quatuor ædes malitiosissimè &
iniquissimè *Joccatræ* incensas, unà
cum mercium Apothecis repofi-
toriis & apparatus, cui rei Prætor
illic *Belgicus* occasionem dedit, de
quibus omnibus ex eo ipso loco
certiores postea facti sumus quam
piores quærelas exhibueramus;
cujus damni summa est ducen-
tius millenum *Regiorum*

50000:00:00

6. Satisfactionem postulamus
ob 32899 *Libras piperis* ex nave
Endimione vi ablatas anno 1649.
cujus damni summa est

6000:00:00

220796:15:00

Sum-

Summarium Damnorum aliquot particularium quibus etiam à Belgica Orientalis Indiæ Societate affecti sumus.

1. **P**ropter damna quæ per eos fecimus qui *Bantamum* obsederunt, unde factum est ut per sex annos continuos eo commercio exclusi simus & consequenter occasione sexcenties mille Regios in coëmendo pipere locandi pro rata nostra portione, quo multas naves nostras in reditu onerare potuissemus, quo onere cum carerent passim per *Indiæ* littora cariem traxere: interea fors nostra apud *Indos* quæ vel pecuniæ vel bonorum erat stipendio nautico com meatu alioque apparatu imminuta & exhausta est; adeo ut prædictæ Jacturæ haud minoris æstimari queant vicies centies & quater millenis Regiis id est nostræ monetæ.

2. Plura etiam propter damna ex amissa parte nostra debita fructuum in *Insulis Molucci, Banda & Amboyna* ex quo tempore per

L. f. d:

600000:00:00

cædem

cædem nostrorum ibi factam
pulsi inde sumus ad usque illud
tempus quo de jactura hac atque
dispendio nobis satisfiat, quod
spatium temporis ab anno 1622.
ad hunc annum Præsentem 1650
pro-reditu anno 25000. *Libra-*
rum, annis 28 Summam conficit.

3. Reparationem insuper po-
stulamus centies & bis milenum
nongentorum quinquaginaa no-
vem *Regiorum Surattæ* à Populo
Mogulli nobis ablatorum, quos
Belgæ eum in modum tutati sunt
ut neque ex pecuniis neque ex
bonis ejus populi quæ in ipsorum
Funcis seu Navibus erant damna
nostra resarcire possemus, quod
quidem perficere & conati su-
mus & in manu nostra situm e-
rat, nisi eos *Belgæ* iniquissimè de-
tendissent, quæ pecunia amissa
ad impensas faciendas jamdu-
dum in Europa triplum peper-
isset: quod Nos æstimamus

4. Ob portoria *Presidis* quo-
rum dimidia pars ab Rege *Persa-*
rum Anglis concessa est A. 1624
quæ usque ad Annum 1629. sup-
putata æstimatur octies mille-
nis *Regiis*, quemadmodum prius
exponitur qua ratione subducta

D

L S 3

700000:00:00

77020:00:00

qua.

(74)

quatuor mille Librarum in annos singulos præbere tenentur ab anno 1629. à quo unus & viginti anni sunt, atque inde summa conficietur

84000:00:00

Ab altera Pagina

120976:15:00

Summa totalis

1681996:15:00

Locus Figuræ
Regiæ



*Debitum ab eo tempore fœnus Sortem
ipsam longè superabit.*

LIT:

L I T T E R Æ
 O L I V E R I I
 P R O T E C T O R I S
 Nomine Scriptæ.

COMITI OLDENBURGICO

Illustrissime Domine,

PEr literas vestras *Januarii de vigesima*
 1654. datas certior sum factus, nobilem
 virum *Fridericum Matthiam Wolisogum*
 Secretarium vestrum, & *Christophorum Gri-*
phiandrum cum certis mandatis ab illustrissimâ
 dignitate vestra in *Angliam* missos fuisse. Quæ
 cum ad nos accessissent, & susceptam *Anglicanæ*
Reipublicæ administrationem nobis vestro no-
 mine gratulati sunt, & uti vos vestraque ditio
 in hanc pacem, quam cum *Fæderatis Belgis*
Ordinibus proxime fecimus, assumeremini: ut
 denique *Salvam-Guardiam* illam quam vulgò
 vocant, à *Parlamento* nuper vobis concessam
 nostrâ nunc authoritate confirmaremus, peti-
 verunt: ob istam itaque gratulationem tam
 amicam maximas, ut æquum est, gratias agi-
 mus: & illa duo postulata libenter concessi-
 mus; nulli etiam occasione in posterum defu-
 turi,

turi, quæ studium in vos nostrum poterit ullo tempore declarare, idque ex supradictis Oratoribus vestris plenius vos arbitror intelleguros; quorum fides, ad deligentia in hoc vestro apud nos negotio præclarè constitit. Quod reliquum est, vobis, rebus vestris felicitatem, atque ex voto pacem omnem exopto.

Westmonasterio. Jun. 27.

1654.

Illustrissimæ Dignitatis vestræ
studiofissimus

*Oliverius Angliæ, Scotiæ, Hybernæ, &c.
Protector.*

Comiti Oldenburgico.

Illustrissime Domine,

Literas vestras *Maii* secundo die *Olbenburg* datas accepi haud uno nomine gratissimas; cùm quòd essent ipsæ singulari erga me humanitate ac benevolentia refertæ; tum quod illustrissimi Domini Comitis *Antonii* perdilecti Filii vestri manu redditæ. Id quod eò magis honorificum mihi duco, ex quo illius virtutes tantâ stirpe dignas, moresque eximios, studium denique in me egregium, non tam acceptum ab aliis quàm re ipsâ cognitum atque perspectum jam habeo. Neque dubium esse potest, quin eandem quoque suis domi spem faciat, fore
se

se Patris optimi præstantissimique similium ;
 cujus præclara virtus atque prudentia perfecit ,
 ut toto illa ditio Oldenburgica permultis ab an-
 nis , & summâ pace trui , & pacis commoda
 percipere inter sævissimos undique circumstre-
 pentium bellorum tumultus potuerit. Talem
 itaque amicitiam quidni ego quamplurimi
 facerem , quæ potest inimicitias omnium tam
 sapienter ac providè cavere. Pro munere deni-
 que illo magnifico est , *Illustrissime Domine* ,
 quòd gratias habeo , pro jure est ac merito tuo ,
 quòd ex animo sum.

Illustrissimæ dignitatis vestræ studiosissimus

OLIVERIUS Angliæ , Scotiæ , Hiber-
 niæ , &c. Protector.

Westmonasterio die

29. Jun. 1654.

Illustrissimo Domino

ANTONIO GUNTHERO,
 Comiti in Oldenburgh ; &
 Delmenhorst , Domino in
 Fehruern, & Kuiphausen.

OLIVERIUS Protector Reipub.
Angliæ, Scotiæ, Hybernæ, &c.

Serenissimo Principi

CAROLO GUSTAVO

*Suecorum, Gothorum, Vandalorumque
Regi, Magno Principi Finlandiæ, Duci
Esthoniæ, Careliæ, Brema, Verda,
Stetini Pomeraniæ, Cassubiæ & Vanda-
liæ, Principi Rugiæ, Domino Ingriæ,
Vvissmaræ, necnon Comiti Palatino
Rheni, Baviariæ, Jul. Cliviæ & Mon-
tium Duci &c.*

SALUTEM.

Serenissime Rex.

CUM Suecorum Regnum per hosce dies
summæ populi studiis, omniumque ordi-
num suffragiis liberrimus translatus ad vos esse,
toto orbe terrarum percrebuerit, id maluisse
Majestatem Vestram suis literis amicissimis,
quàm vulgatâ famâ nos intelligere, & hummæ
benevolentia erga nos vestra, & honoris inter-
primos attributi argumentum haud leve esse du-
cimus. Illam itaque vestris meritis egregiis ac-
cessionem dignitatis, præmiumque virtute tantâ
signi-

dignissimum, & sponte, & jure vobis gratulamur: idque ut *Majestati* vestræ, *Suecorumque* Genti, reique toti *Christianæ* bonum atque faustum sit, quod & vobis maximè in votis est, junctis precibus Deum oramus. Quòd autem fœderis inter hanc Rempublicam, *Sueciæque* Regnum recens iñti conservationem *Majestas* vestra, quod ad se attinet integerrimam, usque eò curæ sibi fore confirmat, ut quæ nunc intercedit amicitia, non permanere solum, sed, si id fieri potest, augefcere etiam indies possit, id vel in dubium vocare nefas esset, tuâ tanti Principis fide interpositâ, cujus eximia virtus non solum in peregrinâ terrâ Regnum tibi hæreditarium peperit, sed tantum etiam potuit, ut augustissima Regina, *Gustavi* filia, cui parem omni laude Heroïnâ multa retrò læcula non tulêre, possessione imperii justissimâ inopinanti tibi ac nolenti ultrò cederet. Vestram denique tam singulare erga nos studium, tamque præclaram animi significationem nobis esse gratissimam omni ratione persuasum esse vobis cupimus; nullumque nobis pulchrius certamen fore, quàm ut vestram humanitatem nostris officiis nullo tempore defuturis, si id potest fieri; vincamus.

Majestatis Vestræ Studiosissimus

OLIVERIUS, Reipub. Angliæ,
Scotiæ, Hybernæ, &c. Protector.

Westmonasterio. die

4. Julii 1654.

Illustrissimo Domino,

LUDOVICO MENDEZIO
DE HARO

QUod accepi ex literis tuis, *Illustrissime Domine*, constitutum ac nominatum jam esse ab Serenissimo *Hispaniarum* Rege Legatum, qui de suscepta à me *Anglicana* Republica gratulatum huc primo quoque tempore veniret; cum est meritò per se gratum; tum tu id, qui ex te inprimis hoc me cognoscere voluisti, ut esset mihi aliquanto gratius atque jucundius, singulari tuo studio atque officii celeritate effecisti. Sic enim diligi atque probari me abs te, qui virtute tua atque prudentia tantam apud Regem tuum authoritatem tibi conciliasti, ut vel maximis illius Regni negotiis par animo praelis, haud minori profectò mihi voluptati debet esse, quàm iudicium, præstantissimi viri ornamento mihi intelligo fore. De meo autem in Serenissimum *Hispaniarum* Regem propenso animo, & amicitiam cum isto Regno conservandam, atque etiam indies exaugendam promptissimo, & huic qui nunc adest Legato satisfecisse me spero, & alteri, cum advenerit, cumulatè satisfacturum. De cætero, *Illustrissime Domine*, qua nunc flores apud Regem tuum dignitate ac gratia, eam tibi perpetuam

ex

exopto, quasque res geris bono publico & da-
ministras, volo tibi prosperè feliciter que eve-
nire.

*Amplitudinis tuæ Illustrissimæ
Studiofissimus.*

OLIVERIUS, Protector Reip.
Angliæ, Scotiæ, Hybernæ &c.

*Albâ Aulâ Septembris
die 1654.*

Serenissimo Principi

CAROLO GUSTAVO ADOLPHO
Suecorum, Gothorum, Vandalorumque Regi, &c.

CUM de voluntate vestra Majestatis in me
singulari ex vestris sim nuper literis persua-
sus, quibus & ipse pari studio rescripserim, vi-
deor mihi ex ratione prorsus amicitiae nostrae
deinceps facturum, si quemadmodum quæ grata
acciderint ad lætitiâ mutua communicem,
ita quæ contraria, de iis vobis tanquam ami-
cissimis, animi mei sensum doloremque ape-
riam. De me equidem sic existimo, eo me in
loco Reipub. jam esse constitutum, ut communi
Protestantium, paci inprimis & quantum in
me est consulere debeam. Quo gravius necesse
est feram quæ de *Bremensium & Suecorum præ-*

liis mutujsque cladibus ad nos perferuntur. Illud primum doleo, amicos utrosque nostros tam atrociter tamque protestantium rationibus periculosè inter se decertare; pacem deinde illam Monasteriensem quæ Reformatis omnibus summo præsidio credebatur fore, ejusmodi peperisse infoelix bellum: ut nunc arma *Suecorum* in eos conversa sint quos inter cæteros paulo ante religionis causâ acerrimè defenderent: idque potissimum hoc tempore fieri; cum Pontificii per totam fere Germaniam Reformatos ubique rursus opprimere, & ad intermissas paulisper injurias vimque pristinam redire palam dicantur. Cum itaque intelligerem dierum aliquot inducias ad *Bremam* urbem jam esse factas, non potui sane quin Majestati vestræ, occasione hac datâ, significarem quam cupiam ex animo quamque enixe Deum pacis orem, uti istæ induciæ utrique parti feliciter cedat; utque in pacem firmissimam ex compositione utrinque commoda possint desinere. quam ad rem si meam operam conferre quicquam aut usui fore Majestas vestra judicaverit, eam vobis libentissimè ut in re Divino Numini procul dubio acceptissimâ polliceor atque defero, Interea Majestatis vestræ consilia omnia ut ad communem *Christianæ* rei salutem dirigat Deus atque gubernet, quod idem non dubito, quin & vos maximè velitis, animitùs exopto.

Majestatis vestræ Studiosissimus

OLIVERIUS, Prot. Reip. Angliæ, &c.

Albâ Aulâ Oct. 26. 1654.

Magni-

Magnificis Amplissimisque

Consulibus ac Senatoribus Civitatis *Bremensis*.

Ex literis vestris per Oratorem vestrum *Henricum Oldenbergum* ad nos datis, coortum civitati vestræ cum vicino potentissimo diffidium, quasque exinde ad angustias redacti sitis, eò majore cum molestiâ ac dolore intelligo, quo magis *Bremensem* Civitatem præter cæteras Orthodoxâ religione præstantem diligo atque amplector; neque in votis quicquam habeo antiquius, quam ut universum Protestantium nomen fraterno consensu atque concordia in unum tandem coalescat. Lætari interim communem Reformatorum hostem hisce nostris contentionibus & ferocius passim instare certissimum est. Ipsa autem controversia, cum decisionis nostræ non sit quæ vos jam nunc exercet. Deum itaque oro ut quæ coeptæ sunt induciæ possint foelicem exitum fortiri. Equidem quod petistis ad *Suecorum* Regem ea de re scripsi suavor pacis atque concordie, Deo nimirum inprimis gratæ, meamque operam ut in re tam pia libens detuli, vos uti æquum animum, neque ab ullis pacis conditionibus, honestis quidem illis, abhorrentem suadeo gratis;

vestramque civitatem divinæ tutelæ ac providentiæ commendo.

Ampli udinis Vestra Studiosissimus

OLIVERIUS Protector Reipub.
Angliæ, &c.

Albâ Aulâ Octob. 26.

1654.

OLIVERIUS Protector Reip.
Angliæ,

Illustrissimo Principi Tarentino.

S. P. D.

PERspectus ex literis tuis ad me datis Religio-
nis amor tuus, & in *Ecclesias Reformatas*
pietas eximia, studiumque singulare, in istâ præ-
sertim generis nobilitate ac splendore, eoque sub
Regno in quo deficientibus ab Orthodoxâ fide
tot sunt nobilissimis quibusque spes uberes pro-
positæ, tot firmioribus incommoda subeunda,
permagno me planè gaudio ac voluptate affecit.
Nec minus gratum erat placuisse me tibi eo ipso
Religionis nomine, quo tu mihi dilectus atque
charus inprimis esse debes. Deum autem ob-
testor ut quam de me spem Ecclesiarum & ex-
pectationem esse ostendis, possim ei aliquando
vel satisfacere, si opus erit, vel demonstrare
omnibus, quàm cupiam non deesse. Nullum
equidem fructum laborum meorum, nullum
hujus

hujus quam obtineo in Repub. meâ sive digni-
tatis sive muneris nec ampliore existimarem,
nec jucundiorē, quàm ut idoneus sim, qui
Ecclesiæ Reformatæ vel amplificationi vel in-
columitati, vel, quod maximum est, paci
serviam. Te vero hortor magnopere ut religio-
nem Orthodoxam qua pietate ac studio à
majoribus acceptam profiteris, eâdem animi
firmitate atque constantiâ ad extremum usque
retineas. Nec sanâ quicquam erit te fuisse Pa-
rentibus religiosissimis dignius, nec quod pro
tuis in me meritis, quanquam tuâ causâ cupio
omnia, optare tibi melius, aut præclarius
queam, quàm si sic te pares atque instituas,
ut Ecclesiæ, præsertim patriæ, quarum in
disciplina tam felici indole tamque illustri loco
natus es, quanto cæteris præluces, tanto fir-
mius in te præsidium suis rebus constitutum esse
sentiant. Vale.

Albâ Aula die Aprilis 1655.

O L I V E R I U S Protector Reip.
Angliæ,

*Serenissimo Principi Immanueli
Subaudiæ Duci Pedemontii
Principi.*

S A L U T E M.

Serenissime Princeps.

R Edditæ sunt nobis *Geneva*, nec non ex *Del-*
phinatu aliisque multis ex locis ditione ve-
stræ
D. 7

stræ finitimis literæ, quibus certiores facti fu-
 mus, Regalis vestræ Celsitudinis subditis *Re-*
formatam Religionem profitentibus, vestro
 Edicto atque autoritate imperatum nuper esse,
 uti triduo quàm hoc edictum promulgatum erit
 suis sedibus atque agris excedant poenâ capitis,
 & fortunarum omnium amissione proposita,
 nisi fidem fecerint derelictâ religione suâ,
 intra dies viginti *Catholicam* Religionem am-
 plexuros: Cumque se supplices ad Celsitudinem
 vestram Regalem contulissent, petentes uti
 edictum illud revocetur, utque ipsi pristinam
 in gratiam recepti, concessæ à Serenissimis Ma-
 joribus vestris libertati restituantur, partem ta-
 men exercitus vestri in eos impetum fecisse mul-
 tos crudelissime trucidasse, alios vinculis man-
 dasse, reliquos in deserta loca montesque niv-
 bus coëptos expulisse, ubi familiarum aliquot
 centuriæ, eo loci rediguntur ut fit mutuendum
 ne frigore & fame, brevi sint miserè omnes pe-
 rituræ. Hæc cum ad nos perlata essent, haud
 sane potuimus quin, hujus afflictissimi populi
 tanta calamitate auditâ, summo dolore ac mi-
 seratione commoveremur. Cum autem non
 humanitatis modo sed ejusdem religionis com-
 munionem, adeoque fraternâ penitus necessitudine
 cum iis conjunctos nos esse fateamur, satisfieri
 à nobis neque nostro erga Deum officio, neque
 fraternæ charitati, neque religionis ejusdem pro-
 fessione posse existimavimus, si in hac fratrum
 nostrorum calamitate ac miseria solo sensu do-
 loris afficeremur, nisi etiam ad sublevanda
 eorum

eorum tot mala inopinate, quantum in nobis
 est situm, omnem operam nostram contera-
 mus, Itaque à vestra inprimis Celsitudine Re-
 gali majorem in modum enixè petimus & ob-
 testamur ut ad instituta Serenissimorum Majo-
 rum suorum concessamque ab iis omni tempore
 & confirmatam subditis suis *Vallensibus* liberta-
 tem velit animum referre. In quâ concedendâ
 atque confirmandâ, quemadmodum id præsti-
 terunt, quod Deo per se gratissimum procul-
 dubio est, qui conscientiaë jus inviolabile ac po-
 testatem penes se unum esse voluit, ita dubium
 non est quin Subditorum etiam suorum meri-
 tam rationem habuerint, quos & in bello itre-
 nuos ac fidelissimos & in pace dicto semper au-
 dientes experti fuissent. Utque Serenitas Vestra
 Regalis in cæteris omnibus & benignè & glo-
 riosè factis Avorum suorum vestigiis optimè in-
 sistit, ita in hoc nolit ab iisdem discedere etiam
 atque etiam obsecramus; sed & hoc edictum,
 & si quod aliud inquietandis *Reformatæ* Reli-
 gionis causâ subditis suis rogatum sit, abro-
 get; ipsos patriis sedibus atque bonis restituat;
 concessa jura ac libertatem pristinam ratam iis
 faciat; accepta damna sarciri, & eorum vexa-
 tionibus finem imponi jubeat. Quod si fecerit
 Regalis Celsitudo vestra, & rem Deo acceptis-
 simam fecerit, miseros illos & calamitosos
 erexerit & recrearit, & à suis omnibus vici-
 nis, quotquot *Reformatam* Religionem colunt,
 maximam gratiam inierit; nobisque potissi-
 mum, qui vestram in illos benignitatem atque
 cle-

clementiam obtestationis nostræ fructum arbitramur. Quod & ad omnes officiorum reddendas vices nos obligaverit ; nec stabiliendæ solùm verumetiam augendæ inter hanc Remp. Vestramque ditionem necessitudinis & amicitiae fundamenta firmissima jecerit. Neque verò hoc minus ab justitia vestra & moderatione animi nobis pollicemur : quam in partem Deum Opt. Max. oramus uti mentem vestram & cogitationes flectat : vobisque adeo vestroque populo pacem ac veritatem & successus rerum omnium felices ex animo precamur.

Albâ Aulâ. May. 1655.

O L I V E R I U S Protector Reip.
Angliæ, &c.

Serenissimo Principi Transylvania,

S A L U T E M.

Serenissime Princeps ;

EX literis vestris *sexto decimo Novembris 1654.* ad nos datis singularem erga nos benevolentiam vestram atque studium perspeximus ; & Internuntius vester qui illas nobis literas dedit de contrahenda nobiscum societate & amicitia voluntatem vestram ampliùs coram exposuit. Nos certè occasionem hanc esse datam, unde nostrum quoque erga vos animum, & quanti Celsitudinem vestram meritò faciamus declarare

rare atque ostendere possimus, haud mediocriter sanè gaudemus. Cum autem Vestra in Rempublicam Christianam præclara merita laboresque suscepti ad nos usque tanta pervenerint & hæc omnia certiùs, & quæ amplius rei *Christiane* vel defendendæ vel promovendæ causâ in animo habeatis Celsitudo vestra suis literis communicata nobis amicissimè voluerit, ea uberiores insuper lætandi materiam nobis attulere: Deum nempe iis in regionibus excitasse sibi tam potentem atque egregium suæ gloriæ ac providentiæ ministrum; qui, cum virtute atque armis tantum possit, de re religione communi *Protestantium* tuendâ cui nunc indique malè & dictum & factum est, nobiscum unâ sociare consilia cupiat. Deus autem qui utrisque nobis tametsi locorum intervallo tam longè disjunctis, eundem Religionis Orthodoxæ defendendæ studium aique animum iniecit, dubium non est quin earum præcipue rationum author nobis futurus sit, unde & nobis & inter nos & Reformatorem reliquis principibus ac civitatibus hac in re maximo esse adjumento atque usui possimus, occasionibus certè omnibus intenti, si quas Deus obtulerit, iis quod ad nos attinet, eodem Deo benè juvante, non deerimus. Interea Celsitudini Vestræ sine summo dolore commemorare non possumus quanta inclementia Dux *Allobrogum* subditos suos *Alpinarum* quarundam Vallium incolas Orthodoxam Religionem retinentes persequutus sit. Quos non solum severissimo Edicto quotquot Romanam

Reli-

Religionem suscipere recusarunt sedes avitas, bona que omnia relinquere coëgit; verum etiam suo exercitu adortus est, qui multos crudelissime concidit, alios barbarè per exquisitos cruciatus necavit, partem verò maximam in montes expulit fama & frigore absumendam, exustis domibus, & siqua eorum bona ab illis carnificibus non sint direpta. Hæc ut ad vos jamdudum nuntiata sunt & Celsitudini Vestræ tantam crudelitatem graviter displicuisse, & vestram opem atque auxilium, quantum in vobis est, illis miserrimis, siqui tot cædibus atque miseriis adhuc supersunt, non futurum, nobis facile persuadetur. Nos literas Duci *Sabaudie* ad deprecandum ejus infensum in suos animum jam scripsimus; sicut & Gallorum Regi, idem ut is etiam velit facere: vicinis denique Reformatæ Religione Principibus uti de illa sævitia tam immani quid nos sentiamus intelligere possint: quæ quanquam in illos inopes primum cœpta est, idem tamen omnibus eandem religionem profitentibus minatur: eo-que majorem illis prospiciendi sibi in commune suisque omnibus consulendi necessitatem imponit: quam & nos eandem rationem, prout Deus nobis in animum induxerit, semper sequemur. Id quod Celsitudo vestra persuadere sibi poterit quemadmodum & de singulari nostro erga se studio atque affectu, quod prosperos rerum omnium successus vobis animitus exoptamus; & vestra incepta omnia atque conatus, quibus Evangelii cultorumque ejus

liber-

libertati studetis foelicem exitum fortiri volumus

Albâ Aulâ. May 1655.

O L I V E R I U S P.

Serenissimo Principi

C A R O L O G U S T A V O A D O L P H O

Suecorum Regi,

S A L U T E M.

PErvenisse nuper in regna vestra illius Edicti acerbissimi famam quo dux *Sabaudiae* subiectos sibi Alpinos incolas, *Reformatam* Religionem profitentes, funditus afflixit, & nisi religione *Romanâ* suam mutare fidem à Majoribus acceptam intra dies viginti velint, patriis sedibus exterminari iussit, unde multis interfectis, cæteri spoliati, & ad interitum certissimum expositi, per incultissimos montes, hyememque perpetuam fame & frigore confecti cum conjugibus ac parvulis jam nunc aberrant & hæc graviter tulisse Majestatem vestram nobis persuassimum est. Nam Protestantium nomen atque causam, tametsi inter se de rebus non maximis dissentiunt, communem tamen & penè unam esse, adversariorum par in omnes *Protestantes* odium facile demonstrat. Et *Suecorum* Reges, suam cum *Reformatis* conjunxisse semper causam illatis etiam in Germaniam armis

mis ad *Protestantium* religionem sine discrimine
 tuendam nemo est qui ignoret: petimus inprimis
 igitur, idque majorem in modum, à Majestate
 vestra (nisi id jam fecerit, quod & Reforma-
 torum aliæ Respublicæ & nos fecimus) ut cum
Subaudiæ Duce per literas velit agere; suaque
 auctoritate interpositâ & hanc tantam edicti
 atrocitatem ab hominibus cum innocuis tum re-
 ligiosis deprecando, si fieri potest, avertere
 conetur: etenim hæc initia tam sæva quo
 spectent, quid nobis omnibus minentur, ad-
 monere vestram Majestatem supervacuum esse
 arbitramur. Quod si is iræ suæ, quam nostris
 omnium precibus auscultare maluerit: Nobis
 profecto, si quod est vinculum, si qua religionis
 charitas aut communio credenda atque colenda
 est, communicato prius vestra cum Majestate
 cæterisque Reformationum primoribus consilio
 alia quamprimùm ineunda ratio erit, quâ pro-
 videri maturè possit, ne tanta innocentissimo-
 rum fratrum nostrorum multitudo omni ope
 destituta miserrimè pereat. Quod idem quin
 Majestati vestræ visum jam sit atque decretum
 cum nullo modo dubitemus, nihil consultius,
 ut nostra quidem fert sententia, esse poterit
 quam ut gratiam, auctoritatem, consilia, opes,
 & siquid aliud necesse est in hanc rem primo
 quoque tempore conferamus. Interea Majesta-
 tem vestram Deo Opt. Max. commendatam ex
 animo volumus.

OLIVERIUS Protector Reip.
Angliæ, &c.

Excelsis & Præpotentibus Do-
minis,

Fœderati Belgii Ordinibus.

Edictum *Duci Sabaudia* nuperrimum in sub-
jectos sibi *Alpinos* incolas, Orthodoxam
Religionem antiquitus profitentes, quo illi edi-
cto, ni intra dies viginti fidem *Romanam* am-
plectantur, exuti fortunis omnibus, patriæ
quoque sedes relinquere jubentur, & quantâ
crudelitate in homines innoxios atque inopes
nostrosque, quod maximè refert, in *Christo*
fratres illius edicti auctoritas grassata sit, occisis
permultis ab exercitûs parte contra eos missâ,
direptis reliquis atque domo expulsis, unde illi
cum conjugibus ac liberis fama & frigore con-
flictari inter asperrimos montes, nivelsque per-
petuas jamdiu coacti sunt, rumore & vicinis
undique ex locis creberrimis literis ac nuntiis
cognovisse vos jamdudum existimamus. Qua
autem animi commotione, quo sensu fraternæ
calamitatis hæc vos affecerint facilè ex dolore
nostro qui certe est gravissimus intelligere vide-
mur. Qui enim eodem religionis vinculo, con-
juncti sumus, quidni iisdem plane affectibus in
tam gravi atque indigna fratrum nostrarum
commo-

commoveremur. Et vestram quidem in Orthodoxos ubicunque locorum disiectos atque oppressos spectata pietas atque in multis Ecclesiarum difficultatibus & adversis rebus jam sæpe cognita est. Ego certe, nisi me fallit animus, quavis in re potius, quàm studio & charitate erga fratres religionis causâ violatos atque afflictos vinci sustineam : quandoquidem Ecclesiarum salutem atque pacem incolumiti etiam propriæ libens prætulero. Quod igitur hætenus potuimus, ad *Sabaudie Ducem* scripsimus; suppliciter penè rogantes ut in hos homines innocentissimos & subditos & supplices suos placatiorem animum ac voluntatem suscipiat, suas sedes atque fortunas miseris reddat, pristinam etiam in religione libertatem concedat. Scripsimus præterea ad summos *Prot. stantium* Principes & Magistratus, ad quod hæc maximè pertinere iudicavimus, ut in *Sabaudie Duce* exorando suam conferre operam nobiscum unâ velint. Hæc eadem, & plura forsitan vos quoque fecistis. Nam exemplum hoc tam periculosum, instaurata nuper in Reformatos tanta crudelitas si auctoribus benè cedat, quantum in discrimen adducta religio si vestram commonefacere prudentiam nihil attinet. Et is quidem si flecti nostris omnium precibus & exorari se passus erit prædarum nos atque uberem suscepti huius laboris fructum ac præmium reportabimus. Sin ea in sententia perstiterit, ut apud quos nostra Religio vel ab ipsis Evangelii primis Doctoribus tradita per manus & incorruptè ser-

servata , vel multo antè quàm apud cæteras Gentes sinceritati pristinæ restituta est , eos ad summam desperationem redactos , deletos funditùs ac perditos velit , paratos nos esse commune aliquod vobiscum cæterisque *Reformatis* Fratribus ac sociis consilium capere , quo & saluti pereuntium justorum consulere commodissimè queamus , & is demum sentiat Orthodoxorum injurias atque misérias tam graves non posse nos negligere. *Valete.*

Civitatibus Helvetiorum Evangelicis.

NON dubitamus quin ad aures vestras aliquanto citius quam ad nostra illa nuper calamitas pervenerit *Alpinorum* hominum religionem nostram profitentium , qui *Sabaudie Ducis* in fide ac ditione cùm sint , sui Principis edicto patriis sedibus emigrare jussi ni intra tri-
dium satisdedissent , se *Romanam* Religionem suscepturos , mox armis petiti & ab exercitu *Ducis* sui occisis , etiam permultis in exilium ejecti , nunc sine lare , sine tecto , nudi , spoliati , afflicti , fame & frigore moribundi , per montes desertos atque nives cum conjugibus ac liberis miserrimè vagantur. Multo est minus cur dubitemus quin hæc , ut primum vobis nuntiata sunt pauci atque nos tantarum misèriarum seniu eoque fortasse graviore quo illorum finibus propiores estis , dolore affecerint. Vestrum
enim

enim in primis Orthodoxæ fidei studium egregium summamque in eâ cum retinendâ constantiam tum defendendâ fortitudinem abundè novimus. Cum itaque religionis arctissimâ communione Fratres, vel potius unum corpus cum his miseris vos pariter nobiscum sitis, cujus membrum nullum affligi sine sensu, sine dolore, sine detrimento atque periculo reliquorum potest, scribendum ad vos hac de re & significandum censuimus quanti nostrum omnium interesse arbitremur, ut Fratres nostros ejectos atque inopes comuni ope atque auxilio, quoad fieri potest juvemus & consolemur; nec eorum tantummodo malis & miseriis removendis, verum etiam nequid serpat latius, nequid periculi exemplo atque eventu vel nobis omnibus creari possit, maturè prospiciamus. Literas nos quidem ad *Sabaudie Ducem* scripsimus, quibus uti cum Subditis suis fidelissimis pro clementiâ suâ leniùs agat, eosque jam probre perditos suis sedibus ac bonis restituat, vehementer petivimus. Et his quidem nostris vel nostrum potius omnium conjunctis precibus, exoratum iri Principem Serenissimum quodque ab eo tanto opere petivimus, facile concessurum speramus. Sin illi in mentem secùs venerit, communicare vobiscum consilia parati sumus, qua potissimum ratione oppressos tot injuriis atque vexatos innocentissimos homines, nobisque charissimos in *Christo* fratres sublevare atque erigere, & ab interitu cerarissimo atque indignissimo conservare possimus.

Quo-

Quorum salutem atque incolumitatem pro vestra pietate vobis quam maxime cordi esse confido: Ego eam certe vel gravissimis meis rationibus, immò incolumitati propria potiore habendam esse existimem. Valete.

Westmonasterio, May 1655.

O. P.

Superscript.

Illustribus atque Amplissimis Dominis, Helveticorum Pagorum Protestantium & Confederatarum Civitatum Consulibus ac Senatoribus,

SALUTEM.

Serenissimo Potentissimoque Principi

L U D O V I C O

Galliæ Regi.

Serenissime Potentissimeque Rex,

EX Literis Majestatis Vestræ, quibus illa ad meas *quinto & vigesimo Maii* proximi datas rescribit, facilè intelligo nequaquam fefellisse me eam opinionem, quâ mihi quidem persuasum erat, cædes illas immanissimas, barbaramque eorum hominum stragem, qui Religio-

E

nem

nem Reformatam in *Sabaudia* profitentur , à co-
 hortibus quibusdam vestris factam , neque jussu
 vestro neque mandato accidisse , Quæ quantum
 Majestati vestræ displicuerit , id vos vestris
 militum Tribunis , que hæc tam inhumana suo
 solo impetu injussi perpetraverant , ita maturè
 significasse , deque tanta crudelitate *Ducem*
 ipsum *Sabaudie* monuisse , pro reducendis de-
 nique istis miseris exulibus unde pulsi sunt , ve-
 stram omnem gratiam , necessitudinem , autho-
 ritatem tanta cum fide atque humanitate inter-
 posuisse , majorem equidem in modum sum
 lætatus. Ea nempe spes erat , illum Principem
 voluntati ac precibus Majestatis vestræ aliquid
 saltem hac in re fuisse concessurum. Verùm cum
 neque vestro , neque aliorum Principum rogatu
 atque instantiâ in Miserorum causa quicquam
 esse impetratum perspiciam , haud alienum ab
 officio meo duxi , ut hunc nobilem virum ex-
 traordinarii nostri Commissarii munere instru-
 ctum ad *Allebrogum Ducem* mitterem ; qui tantæ
 crudelitatis in ejusdem nobiscum Religionis cul-
 tores idque ipsius Religionis odio adhibitæ , quo
 sensu afficiar , uberius eidem exponat. Atque
 hujus quidem Legationis eo feliciorem exitum
 speravero , si adhibere denuò & adhuc majore
 cum instantiâ suam auctoritatem atque operam
 Majestati Vestræ placuerit ; & quemadmodum
 fideles fore illos inopes dictoque audientes Prin-
 cipi suo ipsa in se recepit , ita velit eorundem
 incolumitati atque salutis cavere , ne quid iis
 hujusmodi injuriæ & calamitatis atrocissimæ
 in-

innocentibus & pacatis deinceps inferatur. Hoc cum in se justum ac verè regium sit, nec non benignitati vestræ atque clementiæ, quæ tot subditos vestros eandem illam Religionem sequentes ubique salvos & incolumes præstat, summè consentaneum, à Majestate Vestra, ut par est, non possumus quin expectemus. Quæ hæc simul operâ, cum universos per sua Regna *Protestantes*, quorum studium erga vos summaque fides maximis in rebus perspecta jam sæpe & cognita est, arctiùs sibi devinxerit, tum exteris etiam omnibus persuasum reddiderit, nihil ad hoc facinus contulisse Regis consilium, quicquid Ministri Regii atque præfecti contulerunt. Præsertim si Majestas Vestra poenas ab iis Ducibus ac Ministros debitas repetiverit, qui authoritate proprio, suaque pro libidine tam immania patrare scelera sunt ausi. Interea cum Majestas Vestra factum hoc inhumanissimum, quo dignum est odio, aversari se restetur, non dubito quin miseris illis atque ærumnosis ad vos confugientibus, tutissimum in Regno suo receptum atque perfugium sit præbitura; nec Subditorum suorum cuiquam, ut contra eos *Duci Allobrogum* auxilio adsit, permittenda. Extremum illud est, Majestatem Vestram, quanti apud me sua amicitia sit, certoriem faciam, Cujus rei neque fidem neque fructum ullo tempore defuturum confirmo

Majestatis Vestræ Studiosissimus

OLIVERIUS Prot. Reip. Angliæ &c.

Albâ Aulâ. Julii 29. 1655.

Eminentissimo Domino

CARDINALI MAZZARINO.

Eminentissime Domine Cardinalis.

CUm nobilem hunc virum cum literis, quarum exemplar hic inclusum est, ad Regem mittere necessarium statuissem, tum ei, ut Eminentiam vestram meo nomine salutaret, simul in mandatis dedi, certasque res vobiscum communicandas ejus fidei commisi: Quibus in rebus Eminentiam rogo vestram, uti summam ei fidem habere velit, utpote in quo Ego summam fiduciam reposuerim.

Eminentiae vestrae studiosissimus.

OLIVERIUS Protector Reipublicæ
Angliæ.

Albâ Aulâ. Julii. 29.
1655.

OLIVERIUS Protector Reip.
Angliæ

Serenissimo Principi

EREDERICO III.
Daniæ, Norwegiæ &c. Regi

SALUTEM.

QUam severo nuper, & inclementi edicto *Allobrogum* Dux *Immanuel* suos ipse Subditos *Alpinarum Vallium* incolas, innoxios homines & religionis cultu purioris jam multis ab sæculis notos ac celebres, religionis causâ finibus patriis exegerit, &, occisis permultis, reliquos per illa desertissima loca malis omnibus & miseriis inopes ac nudos exposuerit, & audisse jamdudum arbitramur Majestatem Vestram, & gravissimum exere, prout tantum *Reformatæ* Fidei Defensorem ac Principem decuit, dolorem percepisse. Siquidem pro institutione *Christianæ Religionis* quæ mala atque miseria pars aliqua nostrorum patitur, earum sensu penitus eodem tangi omnes debemus, & sanè omnibus nobis & universo *Protestantium* nomini hujus facti eventus atque exemplum, quid periculi ostendat, nemo Vestrâ Majestate, si nos ejus pietatem atque prudentiam rectè novimus, melius videt. Scripsimus
E 3 itaque

itaque libenter, ut quem dolorem ob hanc Fratrum innocentissimorum calamitatem, quam sententiam, quod judicium de re totâ vestrum esse speramus, idem planè & nostrum esse significemus. Itaque ad *Ducem Sabaudia* literas dedimus, in quibus uti miseris atque supplicibus parcat, illudque atrox edictum porrò esse ratum ne finat, magnopere ab eo petivimus. Quod si Majestas Vestra, cæterique *Reformatorum* principes fecerint, ut jam fecisse credimus, spes est leniri posse Serenissimi Ducis animum, & hanc iram suam tot saltem vicinorum Principum intercessionibus atque instantiâ condonaturum; sin perseverare in instituto suo maluerit, paratos nos esse testamur cum Majestate Vestra, cæterisque Religionis Reformatæ sociis eam inire rationem quâ tot miserorum hominum subvenire quamprimum inopiæ, providere salutis ac libertati pro virili parte nostra possimus. Vestræ intercess. Majestati bona omnia atque fausta à Deo Opt. Max. precamur.

Westmonasterio. Maii

1655.

OLIVERIUS Protector Reip.
Angliæ, &c.

*Amplissimis Consulibus & Senatoribus
Civitatis Genevensis*

SALUTEM.

SUMMUM dolorem nostrum quem exmaxi-
mis & inauditis *Protestantium* calamitatibus
Valles quasdam *Pedemontanas* incolentium per-
cepimus quos *Allobrogum Dux* tanta crudelitate
persequutus est jampridem vobis exposuissimus,
nisi id magis operam dedissemus ut eodem tem-
pore intelligeretis tantis eorum miseriis non af-
fici nos solum, verum etiam de sublevandis iis
atque solandis, quantum in nobis est prospicerè.
Quapropter *Eleemosynas* per hanc totam *Rem-
publicam* colligendas curavimus: quas ejusmo-
di fore haud immeritò expectamus, quæ nationis
hujus affectum erga fratres suos tam immania
perpeffos demonstrare possint & quemadmo-
dum religionis eadem utrinque communio est,
ita sensum quoque eundem calamitatum esse;
interea dum pecuniæ collectio maturatur, quod
sine spatio temporis fieri nequit, & miserorum
istorum egestas atque inopia pati moram non
potest, necessarium duximus duo millia libra-
rum Anglicarum quanta fieri potuit celeritate

præmittere inter eos distribuenda qui præsentissimâ ope atque solatio indigere maximè videbuntur. Cum autem nescii non simus innocentissimorum hominum miseriæ atque injuriæ quantopere vos affecerint nec vobis quicquam labori aut molestiæ fore quod illis adjumento atque auxilio esse possit, prædictam pecuniæ summam illis calamitosis curandam ac numerandum ad vos transferre non dubitavimus; idque vobis negotii dare, ut pro vestrâ pietate ac prudentiâ providere velitis qua ratione æquissimâ quam primum illa pecunia egentissima quibusque distribui queat, ut quamvis summa sane exigua sit, aliquid tamen sit saltem quo illi inopes recreari ac refici in præsens aliquantum possint, donec uberiores iis copiam suppeditare poterimus: vos hanc vobis datam molestiam æqui bonique consulturos esse cum non dubitemus tum etiam Deum Opt. Max. oramus uti populo suo Religionem orthodoxam profitenti det animum sui in commune defendendi, sibi que mutuò opem ferendi contra hostes suos immanissimos; quâ in re nostram quoque operam Ecclesiæ utcunque usui fore lætaremur.

Valete.

Mille quingentæ Libræ de prædictis bis millibus à Gerardo Hensh Parisiis, quingentæ reliquæ per litteras à Domino Storzio curabuntur.

Junii 8. 1655.

OLIVERIUS Protector Reip.
Angliæ

Serenissimo Principi

VENETIARUM DUCI.

Serenissime Princeps.

CUM rebus vestris omnibus contra hostem præsertim Christiani nominis prospere gestis lætari semper consuevimus, tum & illo navalis prælii novissimo successu nequaquam sanè dolemus, quamvis id aliquo nostrorum cum detrimento accidisse intelligamus. Ostenderunt enim nobis per libellum supplicem Negotiatores quidam nostri *Gulielmus & Daniel Gulielmi* nec non *Edoardus Bealus* navem suam, cui nomen *Princeps magnus, Constantinopolim* ab se commercii causâ missam nuper fuisse; eam navem ab aulæ *Turcicæ* ministris ad com meatum & milites in Cretam insulam deportandos retentam, dum in illa classe *Turcarum* coacta eo navigaret quæ à classe *Venetarum* oppugnata itinere & superata est, captam & *Venetias* abductam, ab maritimarum causarum iudicibus adjudicatam publico fuisse. Cum itaque inscientibus dominis & nullo modo probantibus navis illa *Turcis* operam dare invitissima coacta sit, seque ex eâ pugna explicare militibus referta non potuerit, Serenitatem Vestram magno-

E 5

perè

pere rogamus, ut sententiam illam maritimæ curiæ velit nostræ amicitiae condonare, navemque illam suis dominis, de Vestra Republica nullo suo facto malè meritis, restituendam curare. Quâ in re impetranda nobis præsertim petentibus, cum mercatores ipsos de vestrâ clementiâ benè sperare videamus nos utique de eâ dubitare non debemus: qui & preclara vestra consilia remque *Venetam* terrâ marique maxima uti pergat fortunare Deus omnipotens ex animo optamus.

*Serenitatis vestræ Venetæque Reip.
Studiofissimus*

OLIVERIUS Protector Reipub.
Angliæ, &c.

*Westmonasterio. Decemb.
1655.*

OLIVERIUS Protector Reip.
Angliæ, &c.

Serenissimo Principi

LUDOVICO
Galliarum Regi.

Serenissime Rex,

Mercatores aliquot nostrates, quorum nomina sunt *Samuel Mico, Gulielmus Cocai-*
mus,

nus, *Georgius Poynerus*, aliique complures per libellum supplicem nobis ostenderunt se anno 1650. in navem quandam, cui insigne *Unicornus* erat, permagnas rationes suas contulisse: eam navem bombyce, oleo aliisque mercibus onustam, quæ, plus minus, triginta quatuor milibus librarum nostrarum ab iisdem æstimata sunt, ab nave prætoriâ, & proprætoria *Majestatis Vestræ* in *Mediterraneo Mari Orientali* oppressam atque captam fuisse, nostros autem illa in navi, propterea quod nobis eo tempore cum *Gallis* illibata pax erat, cum contra naves regias vi se defendere noluisissent, promissis *Pauli & Terrerii Navarchorum* inductos, qui velle se nostros dimittere aiebant, prolatis onerum libellis, maritimis legibus paruisse: Mercatores proinde suprâ dictos procuratorem suum, qui navem illam ac bona restituenda sibi peteret, in *Galliam* misisse: ibi post triennium eoque amplius consumptum, cum ad sententiam de restitutione ferendam perventum jam esset, *Cardinalis Mazarini* Eminentiam eorum procuratori *Hugoni Morello* factum mercatoribus istis injuriam agnovisse; datumque iri satisfactionem, ut primùm confirmata pax inter utrumque gentem, fœdusque, quod tum agitabatur, confectum atque ratum esset, in se recepisse: immò recentius *Majestatis Vestræ* apud nos Legatum Excellentiss. Dominum *de Bordeaux* ex mandato vestro vestrique Concilii, disertis verbis confirmasse; hujus navis atque bonorum peculiari exceptione habitum iri rationem,

etiam seorsim ab iis controversiis, de quibus in commune decidendis ex fœdere provisum est: hujuspromissi Legatum ipsum; qui nunc percommodè negotiorum quorundam suorum causâ ad vos transmeavit, testem esse posse locupletem. Quæ cum ita sint, jusque horum mercatorum in repetendis rebus suis tam præclare constet, à Majestate Vestrâ majorem in modum petimus, ut in eo obtinendo nulla iis mora diutiùs afferatur, velitque nostro rogatu has nobis redintegratæ amicitæ & instaurati recens fœderis esse primitias. Quod & fore confidimus, vobisque fausta omnia Vestroque regno à Deo Opt. Max. precamur.

Majestatis Vestræ Studio fîssimus
OLIVERIUS Protector Reip.
Angliæ, &c.

Westmonasterio, Decemb.
1656.

Civitatibus
H E L V E T I O R U M
Euangelicis.

EX vestris ad nos tam actis publicis per Commissarios nostros *Genevâ* transmissis, quam literis 27. *Decembris Tyguri* datis, quo in locores vestræ sint, cum non sint optimo, fatis superque intelligimus: in quo etsi pacem vestram, tamque diuturnum Sociale fœdus ruptum

tum dolemus, tamen cum id vestrâ culpâ nequaquam accidisse appareat, novam hinc vobis ex Adversariorum iniquitate & pertinacia illustrandæ fortitudinis, constantiæ que vestræ in *Evangelicâ* fide jam olim cognitæ parari rursus materiem confidimus. Nam *Suitenses*, qui Religionem nostram siquis amplectatur, Capitale censent, quid moliantur, quibus horatoribus tam hostiles Spiritus in *Orthodoxam Religionem* sulceperint, latere neminem potest, cui modo indignissima illa fratrum nostrorum in *Pedemontio* facta strages animo nondum excidit. Quapropter, Dilectissimi Amici, quod soletis esse, aspirante Deo fortes estote; jura vestra atque fœdera, immo conscientiæ libertatem, Religionemque ipsam idolorum cultoribus obculcandam concedere nolite; vosque ita parate ut non propriæ duntaxat libertatis atque salutis propugnatores esse videamini, sed ut fratribus quoque vicinis, *Pedemontanis* presertim illis ærumnosissimis, quibus potestis rebus, opitulari atque adesse possitis: hoc certò persuasi per illorum corpora ac necesse ad vestra latere illum nuper aditum fuisse patefactum. De me scitote, incolumitatem vestram resque prosperas non minùs mihi curæ ac solitudini esse quàm si in hac nostra Rep. coortum hoc incendium, quam si in nostras cervices expeditæ *Suitensium* secures illæ (sicuti reverà sunt in omnes Reformatos) strictique enses essent. Ut primum itaque à vobis de statu rerum vestrarum, & obstinato Hostium animo certiores facti sumus, adhibitis in Con-

filium viris quibusdam honestissimis & Ecclesiæ aliquot Ministris pietate spectatissimis, de subsidio vobis mittendo, quantum quidem rationes nostræ in præsentia ferre possunt, ea decrevimus, quæ Commissarius noster *Pellus* vobiscum communicabit. De cætero vestra omnia consilia causamque imprimis hanc vestram justissimam sive pace sive Bello tuendam, Deo Opt. Max. fautori commendare non desinimus.

*Vestrarum Amplitudinum ac Dignitatum
Studiofissimus*

OLIVERIUS Protector Reip.
Angliæ, &c.

Westmonasterio.

Jan. 1655.

OLIVERIUS Protector Reip.
Angliæ, &c.

Serenissimo Principi

CAROLO GUSTAVO

Dei Gratia Suecorum, Gothorum,
Vandalorumque Regi, Magno
Principi Finlandiæ &c.

Serenissime Rex,

Cum amicorum inter se mutua omnia, tam
adversa quam prospera, atque communia
de-

debere esse nemo non intelligat, quòd jucundissimam amicitiae partem Majestas Vestra, gaudium nempe suum impertitum nobis per suas literas voluerit, non potest id quidem nobis non esse longè gratissimum, quandoquidem & hoc singularis indicium humanitatis Vereque Regia est, ut nec vivere, ita ne gaudere quidem sibi soli velle nisi amicos quoque & foederatos eadem, quâ se, lætatio affectos esse sentiat. Itaque Regi tam præstanti & natum esse Filium Principem, quem Paternæ virtutis atque gloriæ speremus hæredem, meritò gaudemus, & idem quod Regi olim fortissimo, *Philippo Macedoni* æve felicitatis sive decoris domi simul & foris contigisse gratulamur: Cui eodem tempore & natus *Alexander* filius, & *Illyricorum* gens potentissima subacta memoratur. Nam & *Polonia* Regnum vestris armis ab imperio *Papano* quasi cornu quoddam avulsum & cum *Duce Brandenburgico* pax piorum votis omnium exoptata, freudentibus licet adversariis, facta, quin ad Ecclesiæ pacem atque fructum permagnum sit momentum habitura non dubitamus. Det modò finem Deus tam præclaris initiis dignum; det modò filium, virtute, pietate, rebusque gestis patri similem: id quod & auguramur fanè & à Deo Opt. Max. tam vestris rebus jam antè propitio, ex animo precamur.

Majestatis Vestræ Studiosimus

OLIVERIUS, Prot. Reip. Angliæ, &c.

Westmonasterio. Feb. 1655.

DA

D A N I Æ R E G I

Serenissime ac Potentissime Princeps,

Questi sunt per libellum supplicem suo aliorumque mercatorum *Londinensium* nomine nobis exhibitum *Joannes Fremannus & Philippus Travestius* hujus Reip. cives, se circiter mensem *Octobris 1653.* cum in navem quandam *Sunderburgensem*, cui nomen *Salvatori*, *Nicolaus Weinsinks* magistro, merces varias, pannum laneum, aliamque vestem textilem, ac mercimonia plus tribus millibus librarum æstimata imposuissent, magistro mandasse, ut per *Fretum Balticum* recto curso *Dantiscum* navigaret utque ad *Else-noram* vectigal solveret, eique etiam pecuniam ad eam rem curasse: supradictum tamen magistrum perfidiose, & contrà quàm ipsi à mercatoribus mandatum erat, prætervectum *Else-noram* nullo portorio soluto *Balticum* pernavigasse. Navisque per hanc causam cum toto onere non sine magno mercatorum damno publicata atque retenta est. Quorum in gratiam jampridem ad Legatum Majestatis vestræ *Londini* tunc temporis commorantem scripsimus; qui, ut ipsi ajunt, pollicitus est, ut primum ad Majestatem vestram reddiislet, daturum operam, uti ratio mercatorum haberetur. Verum cum is postea aliis in regionibus à Majestatis Vestræ negotia obiret, & ante discessum ejus & postea frustra se eum adiisse ostendunt: unde procuratorem

torem suum mittere coacti sunt, qui jus suum
Hafniæ persequeretur, navemque illam ac bona
 liberari, sibi que reddi flagitaret: verum exinde
 nullum se fructum percepisse, nisi ut ad damna
 vetera novas impensas, & Sulceptum frustra la-
 borem adjungerent: cum fisco damnata, & re-
 tenta hætenus sint bona, tametsi ex lege *Da-*
nia, quemadmodum ipsi in libello suo demon-
 strant, magister quidem navis ob suum delictum
 est ipse puniendus, navisque, non bona, proscrip-
 tionis sunt obnoxia: eoque gravius accidisse sibi
 hoc malum existimant, quod, sicuti nobis
 perlatum est, vectigal illud quod *Elsenoræ* sol-
 vere debuisset est admodum exiguum. Qua-
 propter, cum mercatores nostri nullam pro-
 scriptioni causam præbuisse videantur, confes-
 susque ipse magister paulo ante obitum sit, suo
 solum delicto illatum hoc mercatoribus detri-
 mentum esse, cumque Pater defuncti jam ma-
 gistri ipse per libellum supplicem Majestati Ve-
 stræ exhibitum, sicuti nos accepimus, culpam
 omnem in filium suum contulerit, mercatores
 absolverit, haud sane potuimus quin navis illius
 bonorumque retentionem iniquissimam esse
 arbitramur, adeoque confidimus, simulatque
 Majestas Vestra hac de re certior facta erit, fore
 ut non modo has ministrorum suorum injurias
 improbet, verum etiam ipsos rationem red-
 dere, bonaque illa suis Dominis eorumve pro-
 curatoribus quamprimùm restitui damnaque
 inde data sarciri jubeat. Quod & nos à Majestate
 vestra majorem in modum petimus, utpote
 rem

rem usque adeo æquam adeo & rationi consentaneam, ut æquiores petere aut expectare in causâ tam justa nostrorum civium non posse videamur, haud minus æqua vestris subditis, quoties data occasio erit, reddituri.

Serenissimo Principi

JOANNI QUARTO

Lusitaniæ, &c Regi.

Serenissime Rex.

QUam pacem & amicitiam cum *Anglicanâ Republicâ* Majestas Vestra, Legatione amplissimâ ac splendidissimâ jampridem ad nos missâ, expetivit, eam à Parlamento, quæ tum potestas rebus præfuit, inchoatam, & à nobis summo semper studio exoptatam, Deo inprimis favente, proque eâ quam accepimus Reipublicæ administratione, feliciter tandem confecimus, & in perpetuum, uti spes est, sanximus. Itaque Legatum Vestrum extraordinarium Dominum *Joannem Rodericum de Sá Meneses*, Comitem *Pennaguiadanum*, virum cum Majestatis Vestræ judicio comprobatum, tum humanitate, ingenio, prudentiâ, fide præstantissimum à nobis repertum, cum expleti muneris egregiâ laude, & reportatâ secum pace, vobis reddimus. Quod autem per literas secundo die *Aprilis Ulyssipone* datas, Majestas Vestra

vestra quanti nos faciat quamque impensè dignitati nostræ faveat, nosque Rempublicam suscepisse gubernandam quantopere lætata sit, haud obscuris indiciis singularis benevolentiae testatur, id vero mihi gratissimum esse, ex meis in Majestatem vestram paratissimis omni tempore officiis, dabo operam ut facilè posthac omnes intelligant. Nequē segniùs interea pro incolumitate vestrâ, vestrique regni felici statu, rerumque prospero suceſſu conceptis ad Deum precibus contendo.

Majestatis Vestrae Studiosissimus

OLIVERIUS Reipub. Angliæ,
Scotiæ, Hybernæ, &c. Protector,

OLIVERIUS Protector Reip.
Angliæ &c.

Excelsis & Præpotentibus

FOEDERATI BELGII
Ordinibus.

S. D.

*Excelsi & Præpotentes Domini, amici
charissimi,*

O Stendunt nobis mercatores quidem, cives nostri *Thomas Busselus, Richardus Bearus* aliique focii navem quandam suam *Edmundi & Ioannis* nomine insignitam dum ab orâ *Brasili-
lianâ*

liana Olyfiponem contenderet ab navi quadam
 prædatoria *Flissingensi* cui nomen *Rubro Leoni*,
 Magister *Lambertus Bartel/onus*, oppugnatam,
 se dedisse; verum ea lege & pacto (id quod
 ipsum *Lamberti* chirographum obsignatum te-
 stabitur) ut navis, & quæcunque in illa fuissent
Anglorum bona, *Flissingæ* restituerentur: eò
 eum appulsum est, navem quidem & nautico-
 rum peculia reddita, mercatorum *Anglicorum*
 bona adempta eorumque auctiōem statim esse
 factam: se mercatores nempe quibus hoc damni
 datum est, cum in foro *Flissingensium* suas res
 repeterent, iniquissima sententia lata, litem
 cum grandibus impenses post quinquennium
 perdidisse, ab iis nimirum iudicibus adjudicatam,
 quorum nonnulli cum in illa navi prædatoria
 suas rationes collatas habuissent; & iudices &
 adversarii & rei simul erant: nihil jam sibi su-
 peresse spei nisi in vestra æquitate & incorrupta
 fide, ad quam nunc demum confugient: eam
 sibi fore propensio-rem existimarunt, si nostra
 commendatio accessisset. Et hominibus condo-
 nandum hoc sane est, si in hac tanta fortuna-
 rum suarum dimicatione omnia timentibus
 quid ad summa auctoritate atque potentia ve-
 stra sibi metuendum, quam quid apud integros
 præsertim iudices de sua causa fit bene speran-
 dum sæpius in mentem veniat: nos quin religio-
 ne, justitiâ, integritate vestrâ potius quam rogatu
 nostro adducti, quod æquum, quod iustum, quod
 vobis denique dignum est iudicaturi sitis, non
 dubitamus. Deus vos vestramque Rempub. ad
 glo-

(117)

gloriam suam, suæque Ecclesiæ præsidium con-
servet.

OLIVERIUS Protector Reip.
Angliæ, &c.

Westmonasterio. April. 1.
1656.

OLIVERIUS Protector Reip.
Angliæ, &c.

Serenissimo Principi

CAROLO GUSTAVO

*Suecorum, Gothorum, Vandalorumque
Regi, Magno Principi Finlandiæ, Duci
Esthonia, Careliæ, Bremæ, Verde,
Stetini Pomerania, Cassubia & Vanda-
liæ, Principi Rugiæ, Domino Ingriæ,
Vvissmarre, necnon Comiti Palatino
Rheni, Bavariæ, Jul. Cliviæ & Mon-
tium Duci &c.*

Serenissimo Princeps,

Perfunctus Legatione suâ apud nos *Petrus
Julius Coictus*, atque ita perfunctus ut suâ
debitâ laude non inornatus à nobis dimittendus
sit, ad Majestatem vestram revertitur. Fuit
enim

enim cum vestro præcipuè nomine, quod jure apud nos plurimi esse debet, nobis gratissimus, tum suo etiam merito, suo nempe munere diligentissimè obito, haud parum acceptus. Quam igitur commendationem vestram de eo accepimus, eam (siquid ad eam accedere testimonio ullo potest) & ab ipso impletam, & à vobis meritissimè datam, libentes utique testamur: quemadmodum & is poterit nostrum erga Majestatem Vestram singulare studium & observantiam, eadem fide atque integritate ad vos referre, verissimique exponere. Extremum illud est ut Majestati vestræ felicitatem omnem victoriarumque cursum contra omnes Hostes Ecclesiæ perpetuum, à Deo Opt. Maximoque optemus.

Majestatis Vestræ Studio sissimus

OLIVERIUS Protector Reip.
Angliæ &c.

*Westmonasterio, April 17.
1656.*

OLIVERTUS Protector Reip.
Angliæ &c.

Serenissimo ac Potentissimi Principi

L U D O V I C O

Galliæ Regi.

S. D.

Serenissime Princeps.

ADierunt ad nos per libellum supplicem,
Joannes Dethic urbis *Londini* in hunc annum
præfectus, & *Gulielmus Wakefield* Mercator,
conquesti, se anno 1649. *calendas* circiter *Octob.*
navem quandam cui nomen *Jonæ Londinensi*,
Jonæ quoque cognomento *Lighthaghe* Magistro
suis mercibus, quæ *Ostendam* mitterentur, on-
rasse: eam navem à prædone quodam *Barkin-*
gensi, cui nomen *White* (is filii Regis *Caroli*
defuncti nomine piraticam faciebat) in ipso
Thamesis ostio oppressam atque inde *Dunkirkam*,
quæ eo tempore in ditione *Gallorum* erat, fuisse
abductam; cum autem edicto Majestatis Ve-
stræ an. 1647. & an rursus 1649. aliquot etiam
consilii Regii decretis, in gratiam *Parlamenti*
Anglicani, cautum esse intelligerent; ne naves
ullæ aut merces, illius belli tempore, quoquo
obtentu *Anglis* creptæ, in Majestatis Vestræ
portus quoscunque asportarentur, venalesve
essent

essent, misisse se statim *Dunkirkam* procuratorem suum *Hugonem Morellum* negotiatorem, qui à Domino *Lestrado* illius oppidi per id tempus Præfecto, reddi sibi suam navem cum mercibus postularet, cum eas præsertim magna ex parte adhuc integras, neque dum permutatas aut divenditas, in ipso oppido deprehendisset: respondit Præfectus, se Regis *Galliae* dono, ob navatam Reipub. operam, præfecturam eam accepisse: curaturum proinde, uti ea sibi pretium operæ sit. Hoc responso frustratus, post magnum cum temporis tum pecuniæ dispendium, procurator domum revertitur. Petitores, quæ restat sibi spes, eam in vestra solo clementia atque justitia repositam esse vident; ad quam per nostras literas faciliorem sibi aditum fore crediderunt: ea ne desit hominibus contra jus omne, & repititâ vestrâ interdictâ spoliatis, rogamus. Quod tamen si impetrabimus, quandoquidem hoc sanè æquissimum videtur, ab insitâ æquitate vestrâ, potius quam rogatu nostro, impetratam id esse statuemus.

Majestatis Vestrae Studiosissimus

OLIVERIUS Protector Reipub.
Angliæ, &c.

Westmonasterio. Maji
1656.

OLIVERIUS Protector Reip:
Angliæ, &c.

Excelsis & Præpotentibus Dominis

F O E D E R A T I B E L G I I
Ordinibus
S. D.

*Excelsi & præpotentes Domini, amici
charissimi,*

DEmonstrarunt nobis per libellum supplicem
Joannes Brunus, Nicolaus Gulielmus, alii-
que *Londinenses*, se, cum in navem, cui *Bonæ
Esperantzæ Londinensi* nomen inditum erat, in
Orientalem Indiam navigaturam, sortem quis-
que suam contulisset procuratori suo nego-
tium dedisse *Februario* mense 1644. ut bis mille
quadringentas libras *Belgicas* ad illius navis pe-
riculum præstandum *Amsterdam* curaret: ea
navis cum in itinere ad oram ipsam *Indiæ* ab
Hollandica quadam, quæ ex navibus *Orientalis*
illius societatis erat, capta esset; qui præstando
periculo se obligaverant, pactam pecuniam nu-
merare recusasse; & sextum jam annum posse
nostris, qui summa cum assiduitate maximisque
impensis jus suum persecuti sunt, dilationibus
variis eludere. Quod cum petitoribus grave ad-
modum atque iniquum videatur, & nonnulli

ex iis qui se obligarunt vel jam diem obierint
vel solvendo non sint, nequid fortè ad priora
damni summi discriminis accedat, magnopere
à vobis petimus, ut per tot annos in foro jacta-
tis ac proprè naufragis istis vestram æquitatem
portum esse atque perfugium velitis; utque de
causa sua, quam illi justissimam esse confidunt,
primo quoque tempore iudicium fiat. Vobis
interim omnia ad Dei gloriam Ecclesiæ que præ-
sidium faustè atque feliciter evenire volumus.

*Excelsarum & præpotentium Domina-
tionum vestrarum Studioissimus.*

OLIVIRIUS Protector Reip.
Angliæ, &c.

*Westmonasterio. Maii
1656.*

OLIVERIUS Protector Reip.
Angliæ, &c.

Excelsis & Præpotentibus Dominis
FOEDERATI BELGII
Ordinibus.

S. D.

*Excelsi & præpotentes Domini, amici
charissimi,*

COnqueruntur apud nos graviter iidem, de
quibus antea circa Idus Septemb. superioris
anni

anni literas ad vos dedimus, *Thomas & Gulielmus Lower* defuncti *Nicolai Lower* hæredes legitimi, se adversariorum suorum sive gratiâ sive opibus oppressos, quamvis causa sua imprimis optima, &, cum id satis non esset, litteris etiam nostris ter deinceps commendati fuissent, impetrare hætenus nullo modo posse ut relictam testamento hæreditatem adire sibi liceat: Ab *Hollandiæ* foro ubi primùm actio instituta erat vestram ad Curiam rejecti, inde in *Zelandiam* transmissi, (quæ tria in loca totidem nostras literas attulerunt) ab *Zelandia* nunc rursus ad vestrum summum iudicium haud inviti remittentur: ubi enim potestas summa est, ibi æquitatem quoque summam esse sperant: si ea spes fallat, elusi atque irriti, post hanc tantam juris obtinendi causâ concursationem suam, quem demum consistendi locum habituri sint, nesciunt: nam de literis nostris, si his jam quartis nos viderint nihil proficere, non est ut in posterum quicquam sibi polliceantur. Nobis certe gratissimum erit si post tot rejectiones, facto sine mora iudicio, hæredes plurimum quidem in æquitate atque justitiâ vestrâ, aliquid etiam in authoritate apud vos nostrâ præsidii sibi fuisse intellexerint. Quorum de altero non dubitamus, alterum vel amicitie nostræ daturos vos esse confidimus.

*Excelsarum & Præpotentum Dominationum
Vestrarum Studiosissimus*

OLIVERIUS, Prot. Reip. Angliæ, &c.
Westmonasterio. Maii 1656.

OLIVERIUS Protector Reip.
Angliæ, &c.

Serenissimo Principi

J O A N N I
Lusitaniæ Regi.

Serenissime Rex,

CUm mercatoribus quibusdam *Anglis* à nonnullis mercatoribus *Lusitanis* ex societate *Brasiliensi* vecturæ commorationisque nomine *An. 1649. & 1650.* grandis pecunia debeatur, quæ pecunia à supradictâ societate jussu Majestatis Vestræ retinetur, expectabant quidem dicti mercatores uti ea pecunia ex conditionibus proximi foederis jampridem sibi numerata esset, Verùm ne amputetur sibi spes omnis ac ratio recuperandi sua debita verentur, ex quo intelligunt statuissse Majestatem Vestram ut quam pecuniam *Brasiliensis* societatis ipsis debuisset, in ærarium vestrum inferretur, utque portorii dimidia pars solvendis iis debitis impenderetur; atque hoc pacto mercatores legitimum duntaxat lucrum, sive fœnus pecuniæ suæ accepturi essent; ipsa sorte interim funditus intereunte. Quod nos nobiscum reputantes quam duram sit, eorumque justissimis precibus victi, has nostras ad Majestatem vestram literas ipsis concessi

cessimus: hoc potissimum à vobis postulantes:
uti præstandum curetis, ut supradicta societas
Brasiliensis hujus *Reipub.* Mercatoribus quam-
primùm satisfaciat tam de summâ pecuniæ cui-
que eorum debitâ, quam de fœnore quinquen-
nali: cum hoc & per se justum sit, & fœderi
nuper vobiscum inito consentaneum: quod &
nos eorum nomine à Majestate Vestræ peramicè
petimus.

Majestatis vestræ Studiosissimus

OLIVERIUS, Protector Reip.
Angliæ, &c.

*Ex Palatio Nostro Westmonasteriq.
die Julii 1656.*

OLIVERIUS Protector Reip.
Angliæ, &c.

Serenissimo Principi

CAROLO GUSTAVO
*Suecorum, Gothorum, Vandalor-
umque Regi, &c.*

Serenissime Rex,

CUM amicitiam Majestatis Vestræ tanti Prin-
cipis, rebusque gestis tam clari meritò plu-
rimi faciamus, tum is cujus operâ fœdus inter
nos arctissimum sancitum est, Illustrissimus Do-

minus *Christiernus Bondus* Legatus Vester Extraordinarius necesse est gratus nobis & commendabilis hoc nomine imprimis fuerit. Hunc itaque hac Legatione laudatissimè perfunctum non sine summa cæterarum etiam virtutum egregiarum laude ad vos dimittendum censuimus: ut qui antea in pretio apud vos atque honore fuit nunc uberiores assiduitas atque prudentiæ suæ fructus ex hac nostra commendatione percepisse se sentiat. Quæ reliqua transigenda sunt, de iis Legationem brevi mittendam ad Majestatem, Vestram decrevimus: quæ interim Deus incolumem defendendæ Ecclesiæ suæ Reique Sueviæ columen conservet.

Majestatis Vestræ Studiosissimus

OLIVERIUS Prot. Reip.
Angliæ &c.

*Ex Palatio nostro Westmonasterii.
die Julij An. Dom. 1656.*

OLIVERIUS Prot. Reip. Angliæ, &c.
Serenissimo Principi

L U D O V I C O
Galliæ Regi.

S. D.

Serenissime Rex, Amice ac Fæderate charissime.

DEtulerunt ad nos per libellum supplicem
Mercatores quidam Londinenses *Richardus
Baker*

Baker ejusque focii, navem quandam Anglicanam ab se conductam cui nomen vernaculum **The Endeavour**/Magister *Gulielmus Foppus*, trecentis atque tredecim vini optimi culeis ex *Tenariffa Insula Londinum* adhevendus onustam, dum inter *Palnam* & supradictam *Insulam* cursum teneret, à quatuor navibus *Gallicis*, in speciem quidem onerariis, sed predatorium in modum armatis, quibus *Ægidius de la Roche* Navarchus erat, primo ac vigesimo Novembris die, An. Dom. 1655. occupatam fuisse, atque in Orientalem *Indiam*, quo is iter sibi esse prædicabat, cum omni onere ac plerisque nauturam abductam; reliquis quatuordecim ad *Guineam Nigritarum* in littus quoddam expositis. Quod eo consilio *Ægidius* fecisse se dictitabat, nequis eorum ex terra tam longinqua & inhumana fortè elapsus testimonio læderet. Fatebatur enim, se neque mandatis instructum, ut *Anglorum* naves caperet, neque alias quas poterat antea cepisse, ut propterea quod inter *Gallos* nostramque *Remp.* per eos ipso s dies convenisse pacem non ignorabat: sed cum in *Portugallia* constitutum sibi esset commeatus accipere, & ab adversis ventis rejectus attingere ea loca non potuisset, coactum se, ad supplendum quæ opus sibi essent, iis ut quæ in ista nave reperisset: credere se proinde illarum navium dominos se damno satisfacturos. Damnum autem constat supra sedecim mille libras Anglicas, id quod ex juratis testibus facile apparebit, Mercatoribus nostris datum. Verum si tam levibus de causis temerare acta

principum religiosissima & quasi Ludibrio habere negotiatoribus quibuscumque ob sua commodum licuerit, concidet profecto omnis posthac fœderum sanctitas, omnis Principum fides atque autoritas obsolescet, proque nihilo habebitur. Quapropter non rogamus tantum, sed Majestatis Vestræ quàm maximè interesse arbitramur, ut qui Regis sui fœdus, jusque jurandum sanctissimum primi omnium tam facile violare sunt ausi, quamprimum dent pœnas tantæ perfidiæ atque audaciæ debitas; utque illarum interea navium Domini de damno, etiam ipso fuorum præjudicio, mercatoribus nostris summam per injuriam illato, satis faciant. Deus Majestatem Vestram diutissimè conserve, Remque *Gallicum* contra communem utriusque nostrum hostem tueatur atque sustineat.

Majestatis Vestræ Studiosissimus

OLIVERIUS Protector Reipub.

Ex Palatio nostro Westmonasterii.

die Augusti An Dom. 1656.

OLIVERIUS Protector Reip.
Angliæ

Eminentissimo Domino

CARDINALI MAZZARINO.

Eminentissime Domine,

Cum dandæ mihi literæ ad Regem essent, eandem quoque ad Eminentiam vestram
scripsit

scribendi occasionem arbitrabar mihi oblatam :
 cujus enim unius viri prudentia singularis *Gallo-*
rum res maximas, summaque Regni negotia
 pari fide, consilio, ac vigilantia moderatur,
 eum celari qua de re scriberem non convenire
 existimabam. Fœdus enim à vobis, quod du-
 bitare nefas esset, sanctissime percussum, eodem
 penè die spretum ac violatum à *Gallo* quodam
Ægidio quatuor navium prefecto ejusque sociis
 nequaquam inscientibus querimur : quemad-
 modum & ex literis nostris ad Regem datis, &
 ex ipsis mercatorum nostrorum postulatis facile
 poterit cognoscere Eminentia vestra ; quam
 præter cæteros non fugit, quanti non magistra-
 tum duntaxat, verum etiam ipsius Regiæ Ma-
 jestatis interfit violatores fœderum primos eos
 severius puniri. Verum illi fortasse, quo tende-
 bant, in *Orientelem Indiam* jam nunc appulsi,
 nostrorum bona contra jus omne atque fidem
 in recentissimo fœdere erepta, veluti prædam
 ab hostibus captam sibi habent. Illud est interea
 quod Eminentiam Vestram rogamus, ut quæ ab
 navium præfecto, tanquam itineri suo ne-
 cessaria, nostris ablata sunt, ea ab illarum
 navium Dominis, id quod ipsi prædatores
 æquum esse censebant restituantur : quâ in re
 Vestram Eminentiam, qua valet autoritate,
 plurimum posse intelligimus.

Eminentiae Vestrae Studiofissimus

OLIVERIUS Prot. Reip. Angliæ, &c.

Ex Palatio nostro Westmonasterii

die Augusti An. Dom. 1656.

F 5

OLIE

OLIVERIUS Protector Reip.
Angliæ, &c.

Excelsis & Præpotentibus Dominis

F O E D E R A T I B E L G I I
Ordinibus

S D.

*Excelsi & Præpotentes Domini, amici ac
Fæderati charissimi,*

Non dubitamus nos quidem quin omnes
testimonium hoc nobis perhibitori sint,
nullas in contrahendis externis amicitii rationes
defendendâ Religionis veritate potiores unquam
nobis fuisse, nec conjungendis eorum animis,
qui *Protestantium* vel amici ac defensores, vel
saltem non hostes essent, antiquius nos quic-
quam habuisse. Quo graviore animi dolore
commovemur, quoties annuntiatum est, *Pro-
testantium* Principes ac Civitatis quæ sibi mutuo
amicissimæ summæque concordæ esse deberent,
suspectos inter se esse & non optimè animatos;
vos præsertim Regemque *Sueciæ*, quibus fortio-
res *Orthodoxa* fides defensores non habet, neque
socios nostrâ *Respub.* sibi conjunctiores, videri
non æquè ac consuevistis vobis invicem confide-
re, immo indicia quædam vel nascentis inter

VOS

vos diffidii, vel vacillantis amicitiae haud obscura apparere. Causae quae fuerint utrinque, & usque quo progressa animorum alienatio fit, ignotum esse nobis profitemur: veruntamen haud potuimus quin gravem sane molestiam animo caperemus ex ipsis initiis vel minimae dissensionis inter fratres coortae, ex qua tantum creari *Protestantium* rebus discrimen necesse fit; quaequae si ingravesceret (quod Deus ne siverit) quantum inde *Reformatis Ecclesiis* periculum impenderet, quanta triumphandi materies inimicis nostris, & *Hispanis* potissimum daretur, latere vestram prudentiam usumque rerum solertissimum non potest. *Hispano* certe, tantum hinc fiducia tantum spiritus accessit, ut non dubitaverit per Legatum suum apud vos comorantem, sua vobis consilia, idque de summa *Reip.* vestrae audacissime obtrudere: & partim injecto renovandi belli metu terrere, partim ostentata utilitatis falsae specie sollicitare vestros animos est ausus, ut relictis ejus hortatu amicis vetustis ac fidelissimis, *Gallo*, *Anglo*, atque *Sueco*, arctissimam cum hoste ac tyranno quondam vestro, pacato nunc scilicet, &, quod maxime metuendum est, blandiente, coire societatem velletis. Sane qui ex hoste inveteratissimo, arrepta tam levi occasione pro consiliario repente vestro se gerit, quid est quod iste sibi non sumeret, quod non audaciae progredetur, si cernere id semel oculis posset quod nunc animo duntaxat concipit atque molitur, discordiam nempe inter *Protestantes* ac bellum intesti-

num. Nescii non sumus, vos, pro sapientia vestra, qui sit *Europæ* universæ status, quæ *Protestantium* præsertim conditio sæpius cum animis vestris cogitare; *Helvetiorum* Pagos *Orthodoxam* fidem sequentes novorum motuum à popularibus suis fidem *Papæ* sequentibus jam jamque ciendorum expectatione suspensos teneri, ex eo vis dum bello emerfos quod Religionis planè causâ ab *Hispano*, qui hostibus eorum & duces dederat & pecuniam suppeditaverat, conflatum est atque accensum; *Vallium Alpinarum* incolis consilia *Hispanorum* eandem rursus machinari cædem atque perniciem quam superiore anno crudelissimè intulerunt; *Protestantes Germanos* sub ditione *Cæsaris* gravissimè vexari, sedesque Patrias ægrè retinere; Regem *Sueciæ* quem Deus, uti speramus, fortissimum religionis *Orthodoxæ* propugnatorem excitavit, cum potentissimis *Reformatæ* fidei hostibus bellum anceps atque asperrimum totis regni viribus gerere; vestris *Provinciis* infesta vicinorum *Papistarum*, quorum Princeps *Hispanus* est, nuper iæta fœdera minitari; nos denique indicto *Hispanorum* Regi bello esse occupatos. In hac rerum inclinatione siqua inter vos *Regemque Sueciæ* discordia existeret, *Reformaturum* tota *Europæ Ecclesiarum* quam miseranda conditio esset quæ immanium hostium crudelitati ac furori objicerentur? Hæc nos cura haud leviter tangit; eundemque vestrum esse sensum confidimus, proque vestro in communi *Protestantium* causa præclare semper studio, utque pax inter fratres eandem

dẽm fidẽm eandẽm spẽm sequẽtes intẽmẽrata
 fervetur, vos, vestrã consilia ad has rationes esse
 accommodaturos, quæ cæteris quibuscunquẽ
 antepontendæ sunt, nec quod paci inter vos *Sua-*
cieque Regem stabiliendæ possit conducere, quic-
 quam esse omisso. Quã in re si nos usus ullius
 esse possumus, quantum apud vos vel authoritate
 vel gratiã valemus, nostram vobis operam liben-
 tissimẽ profitemur, *Sueciæ* quoque Regi ean-
 dem dẽferre paratissimi, ad quem etiam Lega-
 tionem quamprimũ mittere in animo habe-
 mus, quæ hac de re quid nostræ sententiæ sit,
 exponat. Deumque vestros utrinque animos
 ad moderata consilia flexurum esse speramus,
 vosque cohibiturum, nequid ab alterutrã parte
 fiat quod irritare possit, remque ad extrema de-
 ducere: sed ut contrã, pars utraque remove-
 velit quicquid alterutri offensum aut suspicio-
 sum esse queat. Id si feceritis, & hostes frustra-
 bimini, & amicis solatio eritis, & vestræ denique
 salutis *Reipubl.* quamoptimẽ prospicietis. Hoc
 etiam uti persuassimum sit vobis rogamus, da-
 turos nos esse operam, quoties facultas oblata
 erit, uti nostrum erga *Fæderati Belgii Provin-*
ciæ summum studium benevolentiaque appa-
 reat. Deum proinde assiduis precibus obtesta-
 mur, ut vestram *Remp.* pace, opibus, libertate,
 atque inprimis *Christianæ* fidei amore ac vero
 cultu florentissimam conservare perpetuò velit.

Vestrarum Celsitudinum Potentiam Studios.

OLIVERIUS, Prot.Reip. Angliæ &c.
Ex Palatio nostro Westmon. die Aug. 1656.

OLIVERIUS Protector Reip.
Angliæ, &c.

Serenissimo Principi

J O A N N I

Lusitaniæ, &c Regi.

S. D.

Serenissime Rex.

Die undecimo *Julii* proximi stylo veteri sanctionem pacis à Majestate Vestra jam ratæ, à Legato vestro Extraordinario *Londini* transactæ, nec non arcanorum & præliminarium articulorum per *Thomam Maynardum* accepimus: perque literas à *Philippo Meadow* nostro *Olyssiponi* Internuntio eodem tempore datas, nostram etiam dictæ pacis & articulorum sanctionem, pro iis mandatis quæ à nobis ea de re acceperat, Majestati Vestræ ab ipso redditam intelligimus: cum supradicta sanctionis instrumenta ineunte *Junio* proximo vicissim data acceptaque fuissent, adeo ut nunc inter utramque gentem pax firmissima sancita sit. Qua ex pace nos quidem voluptatem haud mediocrem percipimus; propterea quòd eam & communi utriusque gentis utilitati fore arbitramur, hostiumque communium haud levi detrimento: qui ut prioris fœderis turbandi rationem aliquam

quam primò invenerunt, ita nunc ne idem instaurari fœlus posset, intentarum nihil reliquerunt. Neque dubium nobis est quin suspicionum utrinque offensionumque inter nos materiam creandi occasionem nullam prætermisuri sint. Quas nos quidem, quantum in nobis est, quàm longissimè amovere animo nostra ita constanter decrevimus, immo ut majorem indies mutuam fiduciam hæc nostra pariat necessitudo, tam vehementer cupimus, ut eos pro hostibus habituri simus, qui ullis artibus amicitiam nostram imminuere conabuntur inter nos nostrosque populos hac pace stabilitam; eundemque esse Majestatis Vestræ animum ac voluntatem facile nobis persuademus: Cumque placuerit Majestati Vestræ suis in literis ad nos *quarto & vigesimo Junii stylo novo* datis, & diebus aliquot post instrumentum confirmatæ pacis datum atque acceptum nostro Internuntio traditis, clausuralem quarundam hujus fœderis mentionem facere quas aliquantum immutatas velit, ut quæ huic *Reipublicæ*, quemadmodum Majestas Vestra censet, levis admodum sint momenti, *Portugalliæ* Regno Maximi, peculiari tractatione agere iis de rebus quæ à Majestate Vestra proponuntur, & si quid præterea fœderi stabilendo vel etiam arctiùs obstringendo conducere alterutri parti videbitur, parati erimus: in qua Majestatis Vestræ, sui que populi haud secus atque nostri, ut utrisque æquè satisfiat, rationem habebimus: atque hæc omnia *Olysiponi* an *Londini* agitanda ac transigenda sint, vestra op-

optio erit. Verùm hoc fœdere jam rato, signisque gentis utriusque ritè obsignato, dato denique vicissim atque accepto, immutare partem ejus ullam idem esset atque totum rescindere; quod Majestatem Vestram minimè velle pro certo habemus. Majestati Vestræ fausta omnia ac prospera exoptamus.

Majestatis Vestræ Studiosissimus

OLIVERIUS Protector. Reip.
Angliæ, &c.

*Ex Palatio nostro Westmonasterii.
Augusti die 1656.*

OLIVERIUS Protector Reip.
Angliæ, &c.

Serenissimo Principi.

J O A N N I

Lusitaniæ Regi

S. D.

Serenissime Rex,

PERlatum ad nos est facinus illud inhumanum ac nefarium, quo cædes *Philippi Meadows* Internuntii apud vos nostri, transigendæ pacis causâ à nobis missi attentata est: cujus atrocitas tanta fuit, ut Divino plane Numini atque tutelæ ejus

ejus conservatio attribuenda sit. Nosque ex litteris Majestatis Vestræ *sexto & vigesimo Maii* proximi ad nos datis, perque *Thomam Maynardum* nobis redditis, permotam facti indignitate Majestatem Vestram de authoribus jussisse quæri intelligimus, ut supplicium de iis, pro eo ac meriti sunt, sumatur. Verum comprehensos esse ullos ex iis, aut jussa vestra hac in parte quicquam effecisse nondum accepimus. Quapropter nostrum esse duximus palam significare, tentatum illud facinus barbarum, & partim commissum quàm indignè feramus. atque adeo à Majestate Vestra postulamus, ut ab illius facinoris, authoribus, fociis, ministris supplicium debitum repetatur: Et quo hoc maturiùs fiat, ut honestissimi integerrimique viri, quique gentis utriusque paci quàm maximè student, huic quæstioni præficiantur, quo res penitus investigari, tamque in authoris sceleris quam in ministros severiùs animadverti possit. Id nisi fiat, neque Majestatis Vestræ justitia, neque nostra hujusque Reipub. existimatio vindicari, neque conservandæ inter utramque gentem amicitiae ulla ratio firma esse poterit. Majestati Vestræ foelicia fausta que omnia precamur.

Majestatis Vestræ Studiosissimus

OLIVERIUS protector Reipub.
Anglis, &c.

Ex Palatio nostro Westmonasterii.

Aug. die 1656.

OLIVERIUS Protector Reip.
Angliæ,

Illustrissimo Domino,

COMITI MIRANO

S. D

Illustrissime Domine,

Singulare tuum erga me atque hanc Rempub.
studium haud mediocriter nos demeruit, ti-
bique devinxit: id vestris ex literis 25. Junii
proximi ad me scriptis facile perspexi, tum
etiam ex iis quas ab Internuntio nostro *Philippo*
Meadow conficiendæ pacis causâ ad *Lusitania*
Regem à nobis misso, accepi: quibus is de exi-
mio vestro studio atque opera in hac pace transi-
genda abundè nos docuit: hujus novissimam
sanctionem & accepi libentissimè, mihiq;
persuadeo fore, ut neque collatæ in hanc pacem
operæ tuæ, neque in *Anglos* benevolentia,
neque fidei erga Regem hac in re spectatæ un-
quam te poeniteat: quandoquidem, annuente
Deo, sperandum est, hanc pacem & utrique
genti permagna immolumenta, & hostibus
incommoda haud exigua esse allaturam. Quod
solum in hoc negotio triste atque infaustum ac-
cidit, fuit illud facinus in Internuntium no-
strum *Philippum Meadowes* nefariè susceptum
atque

atque tentatum : Cujus in occultos auctore
 haud segnius inquiri oportuit quam in mani-
 festos sceleris ministros , neque de Regis vestri
 iustitia ac severitate in tanto scelere puniendo
 neque de tuâ cum primis ad eam rem operâ , ut
 qui fas piûmque colas , & pacis inter utramque
 nationem studiosus fueris dubitare possum . quæ
 quidem stare nullo modo potest , si facta hujus-
 modi nefaria impunita atque inulta ibunt. Ve-
 rum tua facinoris illius nota detestatio facit ut
 necesse mihi non sit plura de hac re in præsentia
 dicere. Cum itaque de meâ erga te benevolen-
 tiâ quam & rebus omnibus demonstrare para-
 tissimus ero , certio rem te fecerim , extremum
 illud est , ut te tuaque omnia Divinæ benignitati
 ac tutelæ à me scias esse commendatissima.

Ampli-udinis Vestrae Studiosissimus

OLIVERIUS Prot. Reip. Angliæ, &c.

Ex Palatio nostro Westmon. Aug. die 1656.

OLIVERIUS Protector Reip.
 Angliæ, &c.

Serenissimo Principi

CAROLO GUSTAVO

*Suecorum , Gothorum , Vandalorum-
 que Regi, &c.*

Serenissime Rex , amici ac Fæderate charissime,

Cum eundem nobiscum animum , idem
 consilium in Majestate Vestrâ inesse anim-
 adver

advertam, *Protestantium* fidei defendendæ contra hostes ejus, hoc tempore, si unquam aliàs, infestissimos, unde est quòd tam prosperis successibus vestris victoriamque nuntiis penè quotidie lætemur, tum illud sanè vehementer doleo; quòd unum lætitiæ hanc nostram turbat atque corrumpit, perferri ad nos, inter læta cætera, vestram cum *Fæderatis Belgii Provinciis* amicitiam pristinam non satis constare; remque eo deductam inter vos, in mari præsertim *Baltico*, ut ad discordiam spectare videatur, Cujus causas quidem ignorare me fateor; eventum certe (nisi Deus avertat) *Protestantium* summæ rei periculosissimum fore facile perspicio. Quapropter pro illâ arctissimâ necessitudine quæ cum utriusque vestrum nobis intercedit, proque eo, quo duci omnes imprimis debemus, Religionis Reformatæ studio atque amore, nostrum esse censuimus, quemadmodum *Fæderati Belgii Ordines* ad pacem & æquanimittatem magnopere hortati sumus, ita nunc Majestatem Vestram hortari. Satis superque hostium *Protestantibus* ubique est: nunquam acrioribus odiis inflammati conspirasse in exitium nostrum undique videntur. Testes *Alpinæ Valles* haud ita pridem miserorum cæde ac sanguine redundantes; testis *Austria* edictis nuper & proscriptionibus *Cæsariis* concussa; testis *Helvetia*; quid enim attinet pluribus verbis tot calamitatum recentium memoriam luctumque revocare? Hæc omnia loca quis nescit *Hispanorum* & *Romani Pontificis* consilia incendiis, cladibus, vexationibus

tionibus Orthodoxorum per hoc biennium miscuisse. Si ad hæc tot mala *Protestantium* Fratrum inter se dissensio accesserit, inter vos præsertim quorum in virtute, opibus, constantia præsidium *Ecclesiis Reformatis* constitutum est maximum, quantum humanæ opis est, periclitare Religionem ipsam *Reformatam*, atque in summo discrimine versari necesse erit. Quod contra, si univsum *Protestantium* nomen eâ quâ decet inter se fraterna consensione perpetuam pacem coluerit, nihil omnino erit quod pertimescamus quid hostium vel artes vel vires incommodare nobis possint; quos sola nostra concordia vel propulsabit vel frustrabitur. Quapropter Majestatem Vestram majorem in modum oro atque obsecro, ut ad confirmandam cum *Fæderatis Provinciis* amicitiam pristinam, si qua in parte collapsa est aut imminuta, propensum atque benignum animum afferre velit. Siquid est in quo meâ opera, fides, diligentia ad compositionem usui esse possit, eam omnem vobis profiteor atque deffero: Deus modò aspiret, faustumque esse jubeat, quod cum summâ felicitate cursuque perpetuo rerum prosperum Majestati Vestræ exopto.

Majestatis Vestræ Studiosissimus

OLIVERIUS Protector Reipub.
Angliæ, &c.

Ex Palatio nostro Westmonasterii.
die Aug. 1656.

OLI-

O L I V E R I U S Protector Reip.
Angliæ, &c.

ORDINIBUS HOLLANDIÆ.

*Excelsi & Præpotentes Domini, Amici
charissimi,*

DEmonstratum est nobis à *Gulielmo Coepero* Pastore *Londinensi*, civique nostro, *Joan- nem le Maire Amsterodamensem* Socerum suum, ante annos circiter triginta tres rationem quandam excogitasse, qua *Reip.* vestræ reditus, sine ullo populi onere, multo auctiores fierent; factaque cum *Joanne van den Brook* societate partiendi inter se præmii quod ex illo invento suo reportassent, id autem erat parvi Sigilli in *Provinciis* constitutio, ob hoc *Celsitudines Vestras Præpotentes* supradicto *van den Brook* ejusque posteris tria milla *Geldricorum* (quæ trecentas libras valent) in singulos annos pensitanda spondisse: jam verò, etsi inventa illa parvi sigilli ratio facilis admodum & expedita reperta est, magnosque ex eo tempore reditus *Celsitudinibus Præpotentibus* vestris, nonnullisque vestris *Provinciis* retulit, tamen ad hodiernam usque diem quamvis multâ sollicitatione petitum, illius pacti præmii nihildum adnumeratum esse: unde postquam supradictis *van den Brook* & *le Maire* longarum dilationum pertæsum est, actionem
illam

illam in supradictum *Gulielmum Cooperum* civem nostrum jure esse translata : qui cum fructum industriæ Soceri sui percipere cupiat , ad nos per libellum supplicem se contulit , ut hanc ejus postulationem *Celsitudinibus vestris Præpotentibus* commendare vellemus ; quod ei non esse denegandum censuimus. Quapropter *Celsitudinis Vestras Præpotentes* amicè rogamus , uti petitionem supradicti *Gulielmi Cooperi* ea de re benignè audire velitis , pactumque industriæ præmium atque stipendium tam justum , & pro numero tot annorum præteritorum & annua deinceps pensione solvendum curare. Quod cum non dubitemus quin *Celsitudines Vestre Præpotentes* libenter facturæ sint , utpote & justum & munificentiam vestra dignum , parati & nos vicissim erimus , vestris quoque popularibus in postulatis suis , quoties nobis edentur , æquè propenso animo favere.

Vestrarum Celsitudinum Præpotentium
Studiofissimus

OLIVERIUS Protector Reipub.
 Angliæ , &c.

Ex Palatio nostro Westmonasterii
 die Septemb. An. Dom. 1656.

OLI-

OLIVERIUS Protector Reip.
Angliæ

Serenissimo Principi

L U D O V I C O
Galliæ Regi.

Serenissime Rex, Amice ac Fœderate charissime,

INviti facimus ut Majestatem Vestram de suorum injuriis post pacem instauratum toties interpellemus: verum & vos factas nolle confidimus, & nos nostrorum querimoniis deesse non possumus. Navem *Antonium Diepensem* ante fœlus jure captam, Judicum sententia Curiae nostræ maritimæ præsidentium facile constat. Ejus prædæ partem quatuor millia plus minus coriorum *Robertus Brunus Mercator Londinensis* ab iis qui auctiori præfuerunt, quod & ipsi testantur, coëmit: ex iis circiter ducenta cum *Diepam* advecta post ratam pacem Coriario cuidam *Diepenfi* vendidisset pecuniamque, redigisset, eà pecuniâ in manibus procuratoris sui occupatâ atque retentâ, litem sibi impingi, suumque jus illo in foro se obtinere non posse queritur. Quocirca Majestatem Vestram rogandum censuimus, ut an Consilium suum de re tota referri velit, pecuniamque illam iniquissimâ liti extricari. Etenim si ante pacem facta & judi-

judicata, post pacem rursus in contraversiam
atque iudicium vocabuntur, quis sit fructus fœ-
derum futurus, non videmus. Verùm hujus-
modi querelarum nullus finis erat, nisi in fœdi-
fragos hosce tam frequentes exemplum aliquod
severitatis maturè statuatur. id quod Majestati
Vestræ quamprimùm curæ fore speramus.
Quam Deus interim tutelâ suâ sanctissimâ dig-
netur.

Majestatis Vestræ Studiosissimus

OLIVERIUS Protector Reipub.
Angliæ, &c.

*Ex Palatio nostro Westmonasterii.
die Septemb. An. Dom. 1656.*

OLIVERIUS Protector Reip.
Angliæ, &c.

Serenissimo Principi

J O A N N I
Lusitaniæ Regi.

Serenissime Rex,

TRansactâ jam feliciter inter hanc Rempub.
Lusitaniæque Regnum pace, nec non ad
commercium quod attinet, recte atque ex ordi-
dine cautum atque sancitum cum sit, necessa-
rium esse duximus *Thomam Maynardum*, à quo

hæ literæ perferuntur, ad Majestatem Vestram mittere; qui Consulis munere negotiatorio vestra in ditione, ad mercatorum res rationesque ordinandas fungatur. Cum autem hoc sæpius usu venire possit, ut adeundi Majestatem Vestram fieri sibi copiam, nonnunquam postulet, tam de commercio quam aliis de rebus quæ nostrâ hujusque Reip. interesse possint, à Majestate vestra petimus, ut illi, quoties audito opus sit, benignum velitis aditum atque aurem præbere; id vestræ erga nos benevolentia pro argumento singulari atque indicio habebimus: interim Majestati Vestræ Deum Opt. Max. fortunare omnia volumus.

Majestatis vestræ studiosissimus

OLIVERIUS Protector Reip.
Angliæ, &c.

*Ex Aula nostra Westmonasterii
die Octob. 1656.*

SUECORUM REGI.

Serenissime Potentissimeque Rex,

TAmetsi ea est solita Majestatis vestræ & spontanea in viros bene meritos benevolentia, ut omnis eorum commendatio supervacanea possit videri, tamen nobilem hunc virum *Gulielmum Vavasorem Equitem auratum*, Majestatis Vestræ sub signis merentem, & ad vos jam proficiscentem volumus sine nostris ad Majestatem

statem Vestram literis dimittere, Quod eo libentiùs fecimus, posteaquam significatum nobis est, jampridem eum, Majestatis Vestræ auspicia secutum, multis in præliis vestrâ causâ suum sanguinem profudisse: adeo ut *Suecorum* Reges proximi ob militarem ejus peritiam, operamque sæpe in bello strenuè navatam, cum agro & annuis pensionibus veluti virtutis præmio remuneraverint. Neque verò dubitamus quin Majestati vestræ in hodiernis bellis permagno sit usui futurus, cum sit fide ac bellicarum rerum scientia jamdiu spectatâ. Eum itaque Majestati Vestræ, pro eo ac meritis est, commendatum cupimus: simulque rogamus, ut quæ illi præterita stipendia processerint, solvantur. Hoc nobis erat gratissimum; nec gratificari vicissim Majestati Vestræ, quoties facultas erit, grabimur, cui fausta omnia ac prospera exoptamus.

Majestatis vestræ studiosissimus.

OLIVERIUS Protector Reipublicæ
Angliæ.

*Ex Palatio nostro Westmonasterii.
die Octob. An. Dom. 1656.*

OLIVERIUS Protector Reip.
Angliæ, &c.

Serenissimo Principi

J O A N N I

Lusitaniæ Regi.

S. D.

Serenissime Rex, Amice ac Fœderate charissime,

Exhibuit nobis libellum supplicem *Thomas Ewans Naucerus*, civis noster, in quo ostendit, se An. 1649. & 1650. cum navi sua, cui nomen *Scipioni*, quadringentarum amphorarum, & cui ipse præfuit, societati *Brasiliensi* operam navasse; eam navem cum onere toto & apparatu, Majestatis Vestræ jussu ereptam sibi esse: unde damnum homini factum, præter amissum ex tanta sorte sexenni lucrum, Commissarii ex fœdere ad dicidendas controversias utrinque dati plus septem millibus librarum nostrarum, sive bis totidem *Milreis Lusitanicis* æstimarent; quemadmodum & ad nos retulerunt. Quod detrimentum tam grave cum supradictum *Thomas* vehementer affligerit, coactus ad repetendas ex fœdere res suas, *Olyssipponem* navigare, petiit suppliciter à nobis, ut literas nostras hac dum re ad Majestatem vestram sibi daremus: nos, tamen in communi
causa

causa mercatorum, quibus à Societate *Brasiliensi* debebatur, superiore anno scripsimus, tamen ne cui nostram opem poscenti defuisse videamur, Majestatem vestram pro amicitia rogamus, ut hujus nominatim hominis ratio habeatur, utque velit Majestas vestra suis omnibus ita præcipere, ut ne quid obstatere possit quo minus is in ea urbe, quod sibi à Societate *Brasiliensi* vel aliunde debetur, sine ullo impedimento exigere, & sine morâ possit recuperare. Deus Majestatem vestram perpetua felicitate augeat; nostramque amicitiam faxit quàm diuturnam.

Majestatis Vestræ Studiosissimus

OLIVERIUS Protector Reip.
Angliæ, &c.

*Ex Palatio nostro Westmonasterii.
die Octob. An. Dom. 1656.*

OLIVERIUS Prot. Reip. Angliæ, &c.]

Illustri & Magnifico

Civitatis Hamburgensis Senatui.

S. D

*Amplissimi, magnifici & Spectabiles Viri,
Amici Charissimi,*

GRavem detulerunt ad nos querimoniam
Jacobus & Patricius Hays cives hujus Reip.
G 3 sc,

se, fui fratris *Alexandri*, qui intestatus diem obiit, hæredes legitimum cum sint, atque ita ipsius Curiae vestrae sententiâ ante annos duodecim secundum se lata contra fratris viduam pronuntiati fuissent, bonaque defuncti fratris cum fructibus exceptâ solùm viduæ dote, adjudicata sibi ex eo iudicio essent, non potuisse tamen hætenus, neque pro suo jure, neque literis *Caroli* olim *Regis* eadem de re scriptis ullum laborum suorum ac sumptuum ex ea sententia fructum consequi: obesse sibi scilicet potentiam atque opes *Alberti van Eizen Decurionis* apud vos primarii, apud quem bonorum pars maxima deposita est; cum agere omnia, ne ea bona hæredibus restituantur. Elusi, ac dilationibus confecti, summam denique ad inopiam redacti supplicant nobis ne se negligamus tantis injuriis foederatâ in civitate oppressos. Quod nos cum officii imprimis nostri intelligamus esse, ut ne quis civis noster præsidium suis rebus, atque susceptum patrocinium in nobis requirat, petimus quod à civitate vestra videamur facile impetrare posse, ut sententiam ipsimet vestram hisce fratribus ratam esse velitis; neque per causam provocationis ad *Spirensē Cameram*, vel primò simulatæ vel nunc irritæ, moram justitiæ fieri diutiùs patiamini. Nam de summa ipsius causæ jurisperitorum nostrorum sententias requisivimus; unâque descriptas obsignatasque ad vos misimus. Quod si rogandi nihil proficitur, erit necessariò, idque ex consueto jure gentium, quod tamen minimè vellemus, ad-

(151)

ad reciproca deveniendum : id ne accidat, vos
pro vestra prudentia provisos esse confidimus.

Ampli. udinum Vestrarum Studiosissimus

OLIVERIUS Prot. Reip.
Angliæ, &c.

*Ex Palatio nostro Westmonasterii
die Octob. 16 An. Dom. 1656.*

OLIVERIUS Protector Reip.
Angliæ,

Serenissimo Potentissimoque Principi

LUDOVICO
Galliæ Regi.

S. D.

*Serenissime Potentissimeque Rex, Amici
ac Fæderate charissime,*

Pervenisse ad Majestatem Vestram literas no-
stras arbitramur, Maii quarto decimo supe-
rioris anni datas : in quibus Joannem Dethicum,
eodem anno Londini urbis præfectum, & Gu-
lielmum Wakefield mercatorem per libellum sup-
plicem nobis ostendisse scripsimus, navem Jo-
nam suis mercibus onustam, quæ Ostendam
veheruntur, Dunkirkam, quæ tum temporis in
Gallica ditione erat, à prædone quodam Caroli

Stuarti filii auspiciis piraticam faciente ex ipso *Thamesis* ostio fuisse abreptam: se, cum ex edictis vestris vestrique consilii decretis, quibus erat cautum, nequa navis *Anglorum* ab hostibus *Parlamenti* capta vestris portubus reciperetur, venalisve esset à Domino *Lestrado* illius oppidi præfecto postulassent ut reddi sibi navem suam atque bona juberet, responsum ab eo tulisse, sanè neque viro primario dignum, neque eo qui Regi suo satis dicto audiens videretur, se scilicet ab Rege *Galliae* ob navatam in bello operam hanc præfecturam præmio accepisse; curaturum proinde uti ea quàm maximè quæstui sibi sit: per fas videlicet ac nefas; id enim minime laborare videbatur. Quasi verò hanc præfecturam atque Provinciam Majestatis Vestræ dono accepisset, ut socios juxtà spoliaret, vestraque edicta in eorum gratiam promulgata pro nihilo haberet. Quod enim Rex *Galliae*, se maximè ab hostibus factum contra nos voluisset, facti tamen participes suos esse vetuit, id regius præfectus contra regium interdictum non modo fieri est passus. ut nos vestris in portubus diriperemur, prædæque essemus, verum etiam ipse diripuit, ipsæ prædæ habuit, seque facti authorem palam professus est. Hoc itaque responso mercatores infecto negotio irriti atque elusi discessere: nosque hæc itidem superiore anno Majestati vestræ per literas significavimus successo licet haud multo meliore; nihildum enim responsi ad eas literas habuimus. Quod non habuerimus accidisse id credimus, propterea quòd eo tempore

Præ-

Præfectus ille apud exercitum in *Flandria* fuit; nunc in urbe ipsa *Parisi* degit, vel potius per urbem perque aulam nostrorum spoliis locupletatus impune volitat. A Majestate igitur Vestra nunc denū id petimus quod ipsius Majestatis vestræ interest in primis providere, nequis ad fociorum injurias edictorum regionum contemptionem audeat adjungere: sed neque ad Legatos sive Commissarios de controversiis communibus utrinque dandos rejici propriè hæc causa poterit; quandoquidem hic non fociorum jus duntaxat, sed auctoritas ipsa vestra Regiique nominis reverentia agitur. Illud enim mirum fit, si mercatores damna sua molestius quàm Majestas vestra sui ferat imminutionem. Eam si non ferat, eadem operâ simul perficiet, ut neque amicissimorum de Repub. nostra edictorum poenituisse, neque in suorum injuriis connivisse, neque nostræ postulationi non tribuisse quod par sit videatur.

*Majestati Vestræ voluntate, amicitia,
fœdere devinctissimus*

OLIVERIUS Protector Reip.
Angliæ, &c.

*Ex Aula nostra Westmonasterio
die Novemb. An. 1656.*

OLIVERIUS Prot. Reip. Angliæ, &c.

Serenissimo potentissimoque Principi

F R E D E R I C O I I I.

Daniæ, Norwegiæ, Vandalorum,
Gothorumque Regi; Duci Slesvici,
Holsatiæ, Stormariæ, & Dithmarsici;
Comiti in Oldenburg & Delmenhorst
&c.

S. D

*Serenissime potentissimeque Rex, Amice
ac Fæderate charissime.*

L Iteras Majestatis Vestræ sexto decimo Fe-
bruarii Hufniâ datas ab ornatissimo viro
Simon de Petekum, Oratore apud nos vestro,
accipimus. Iis perlectis, & voluntas erga nos
vestræ præclara significatio, & ipsius rei, de
qua scriptum erat, pondus usque cò nos per-
movit, ut statim ad Majestatem Vestram mit-
tere qui mandatis nostris instructus, nostra con-
silia vobis hac de re plenissime exponeret, in
animo haberemus. Et quanquam idem nobis
etiamnum animus manet, hætenus tamen ido-
neum aliquem cum iis mandatis dimittere, quæ
gravissimum hujusmodi negotium postularet,
non potuimus; quemadmodum jam brevi fa-
cturos nos esse speramus. Interea non omitten-
dum diutiùs existimavimus Majestatem Ve-
stram certiore facere, præsentem rerum in
Ex.

Europa statum haud mediocri nos curâ ac cogitatione sollicitos tenuisse: cum ab aliquot jam annis summo cum dolore videamus *Protestantium* Principes ac civitatem Primores (quos ex communi *Religionis* atque salutis vinculo omnem sese mutuò confirmandi ac defendendi inire rationem oporteret) inter se indies magis magisque infirmè animatos, quid quisque molitur, quidve struat, suspectum habere; metum amicis, spem hostibus præbentes, inimicitias atque dissidia potius hac rerum inclinatione portendi, quam firmum invicem animorum consensum, ad præsidium mutuum ac defensionem. Atque hæc quidem sollicitudo eo altiùs animo nostro infedit, quo magis in Majestate Vestra, Regeque *Sueciæ* adhuc aliquid residere mutux suspicionis videtur; vel saltem non eam existerè voluntatum conjunctionem quam communis nostrum omnium in *Orthodoxam* religionem amor ac studium flagitaret; dum Majestati vestræ injecto forte aliqua suspicio est, fore ut ab Rege *Sueciæ* detrimentum aliquod ditionis vestræ commerciis afferatur; suspicante vicissim *Suecorum* Rege, ne per vos & bellum, quod nunc gerit, difficilius, & contrahendarum societatem ratio impeditior sibi reddatur. Non præterit Majestatem Vestram, pro ea summa prudentia quam adhibere suis omnibus in rebus solet, quantum discriminis *Protestantium* summæ rei impendeat, si istiusmodi suspensiones inter vos diu versentur, quanto magis, quod Deus avertat, si quod hostilitatis

stilitati indicium erumperet. Utcunque hæc se
 habeant, nos, quemadmodum & *Suecorum*
Regem, & *Fæderati Belgii Ordines* ad pacem
 & moderata consilia magnopere hortati sumus
 (adeoque redintegrari inter eos pacem atque
 concordiam vehementer gaudemus, nam &
 capita quoque illius fœderis à *Dominis Ordini-*
bus transmissa ad nos sunt) ita nostras esse par-
 tes duximus, nostræque amicitiae quam maxime
 convenire, ut qui sensus noster his de rebus sit,
 Majestatem Vestram ne celaremus (præsertim
 cum ut ita faciamus, Majestatis Vestræ literis
 amicissimis tam studiose invitemur, id quod
 etiam benevolentiae erga nos vestræ pro argu-
 mento singulari sanè habemus atque amplecti-
 mur) Vestræque Majestati ante oculos ponere-
 mus, quantam nobis necessitatem, qui *Pro-*
testantium Religionem sequimur, Divina provi-
 dentia imposuerit colendi inter nos pacem, idque
 nunc maxime, cum hostes nostri acerrimè, si
 unquam alias, rem gerere, & conjurasse un-
 dique perniciem nostram videntur. *Valles Al-*
pinas miserorum nuper Incolarum cæde ac san-
 guine madentes commemorare nihil attinet,
 nec conquassatam per eosdem dies *Cesareis* pro-
 scriptionibus atque edictis *Austriam*; nec de-
 nique contra *Helvetios Protestantes Helvetiorum*
Papistarum infestos impetus. Quis nescit *His-*
panorum dolos ac machinationes per hosce ali-
 quot annos hæc loca omnia incendiis, ruinis,
 cladibus *Protestantium* permiscuisse; Si ad hæc
 mala *Reformatorum* Fratrum inter se dissensio
 velit

velut cumulus accedat, inter vos presertim qui
 nostrarum virium tanta pars estis & in quibus
 tantum præfidii ac roboris *Protestantium* dubiis
 temporibus comparatum atque repositum est;
 quod ad opem humanam attinet, pessum ire
Proteyantium res, & in extremo discrimine
 atque occasu versari necesse erit. Quod contra,
 si pax constet inter vos vicinos, cæterosque
Orthodoxos Principes, si concordiaæ fraternæ
 omni ex parte studeatur, non erit cur, Deo
 bene juvante, vel vim vel versutiam nostrorum
 hostium pertimescamus; quorum conatus nostra
 Sola consensio vel dissipabit vel frustrabitur.
 Neque vero dubitamus quin Majestas Vestra ad
 hanc pacem beatam impertiri suam operam,
 quam potest maximam, & libens velit & velle
 desitura non sit. Qua in re ipse etiam communi-
 care consilia cum Majestate vestra atque conjun-
 gere paratissimus ero; utpote & veram amici-
 tiam professus, & cui non solum pactam inter
 nos tam auspiciatò servare pacem deliberatum
 omnino sit, verum etiam necessitudinem hanc,
 quæ nunc intercedit, prout Deus facultatem da-
 bit, arctiori vinculo constringere. Idem Deus
 interim Majestati Vestræ secunda ac prospera
 omnia concedat.

*Majestati Vestræ amicitia, fœdere ac
 voluntate conjunctissimus*

OLIVERIUS Prot. Reip. Angliæ, &c.

Dabantur ex Aula Nostra Westmonasterii.

Decembris An. 1656.

(158)

OLIVERIUS Protector Reip.
Angliæ, &c.

*Serenissimo Illustrissimoque Principi
ac Domino, Domino*

G U L I E L M O

*Hassia Lantgravio, Principi Here-
feldia, Comiti in Cattimeliboco;
Decia Ligenhain, Nidda
& Schaumburgo &c.*

Serenissime Princeps,

AD literas Celsitudinis vestræ non sit altero
post anno, quod prope jam pudet, rescrip-
sissimus nisi nos admodum invitos permulta
lane, eaque gravissima, quorum curam, pro
nostro in *Repub.* munere, differre non potui-
mus, interpellassent. Quæ enim literæ debe-
bant esse nobis gratiores, quàm quæ à Principe
Religiosissimo, majoribus quoque Religiosissi-
mis orto; de pace Religionis, deque concordia
Ecclesiarum concilianda sunt scriptæ; quæ etiam
literæ eundem planè animum, idem pacis *Chri-
stianæ* promovendæ studium non solum suo,
verumetiam universi ferè orbis *Christiani* opi-
nione ac iudicio, & ipsæ nobis tribuunt, &
universim attributum esse gratulantur? Et nos
qui-

quidem per tria hæc olim regna quid hoc in parte
 te simus conati, quidque hortando, ferendo,
 præeundo, divino maximè auxilio, effecerimus,
 & norunt nostri plerique, & in summa
 conscientiae tranquillitate sentiunt. Eandem præ-
 fertim *Germaniæ* totius *Ecclesiis*, ubi acrius ferè
 jamque diu nimis diffidetur, pacem optavimus;
 perque nostrum *Duræum* hoc idem multos jam
 annos frustra molientem siquid eam in rem no-
 strâ operâ conferre posset ex animo detulimus.
 In eadem nos etiamnum sententia permane-
 mus; eandem illis *Ecclesiis* fraternam inter se
 charitatem optamus. sed quam sit hoc arduum
 conciliandæ pacis negotium inter ipsos pacis,
 ut præ se ferunt, filios, summo cum dolore
 satis superque intelligimus. Nam ut utrique *Re-*
formati nempe & *Augustani*, in unius Ecclesiæ
 communionem aliquando coalescant, speran-
 dum vix est; suam utrique sententiam ne possit
 vel voce vel scriptis defendere prohiberi sine
 vi non poterunt; vis autem cum pace Ecclesia-
 sticâ consistere non potest: hoc tantum se sinant
 exorari qui dissentiunt, ut humanis saltem &
 moderatius velint dissentire, nihiloque minus
 inter se diligere; utpote non hostes sed fratres
 in levioribus licet dissentientes, in summa tamen
 fidei conjunctissimos. Hæc nos inculcando,
 hæc suadendo nunquam defatigabimur, quod
 ultrà est, humanis neque viribus neque consiliis
 datur: Deus quod suum solius est suo tempore
 perficiet. Tu interim, Serenissime Princeps, præ-
 claram in Ecclesias declarationem animi tui,
 sem-

sempiternum sanè monumentum & majoribus
tuis dignum & omnibus posthac principibus
imitandum reliquisti. Nos *Celsitudini* vestræ,
pro eo ac merita est, felicitatem cæteris in rebus
quantum ipsa cupit, mentem, ea quam nunc
habes, haud meliorem (quid enim potest esse
melius;) à Deo Optimo Maximo præcamur.

Westmonasterio. die Martii

An. Dom. 1656.

O L I V E R I U S Protector Reip.
Angliæ, &c.

Serenissimo Principi

D U C I C U R L A N D I Æ.

Serenissime Princeps.

DE benevolentia Celsitudinis erga nos nostræ
& aliàs, & tum quidem abunde nobis con-
stitit cùm Oratorem nostrum ad *Moscoviæ Ducem*
iter facientem, & in ditione vestra per aliquot
dies commorantem hospitio benignè accepisti:
nunc justitiæ & æquitatis suæ haud leviora indi-
cia daturam esse Celsitudinem vestram & suop-
te ingenio & nostro rogatu confidimus. Cum
enim *Jannes Jamesorus Scotus*, navis cujusdam
vestræ Magister fidelem naucleri operam septen-
nioque cognitam vobis navaverit, seque illam
navem *Balenam* sibi commissam, in ostio flu-
minis,

minis, ut mos est, Gubernatori vestro appellandam in portum tradidisset, eumque imperitæ suo munere fungentem quod solum potuit sæpius monuisse multis testibus probaverit, non ejus profecto culpâ, sed Gubernatoris vel imperitia vel pervicacia fractam esse navem nemini non liquet. Quod cum ita sit, à Celsitudine vestra majorem in modum petimus, ut supradicti Joanni Magistro neque illud naufragium imputare, neque eum idcirco stipendio debito velit privare; cujus spe solâ, jam altero naufragio bonis omnibus amissis, se utcunque in extrema inopia sustinet & solatur.

*Ex Aula nostra, Westmonasterio
die Martii An. Dom. 1657.*

O L I V E R I U S Protector Reip.
Angliæ, &c.

Amplissimis Consulibus ac Senatoribus

R E I P. G E D A N E N S I S

S. P. D.

Amplissimi, Magnifici Viri, Amici Charissimi;

URbem vestram industriâ, opibus & optimarum artium studiis florentem cum nobilissimis quibusque urbibus semper esse duximus conferendam: nunc posteaquam in hoc bello, quod vestris jamdiu in finibus geritur.

Polo.

Polonorum sequi partes quam *Suecorum* maluistis, fanè & Religionis causâ quam colitis & commercii, quod cum *Anglis* vetustum jam habetis, optavimus ut ea vobis maxime consilia placerent, quæ cum Dei gloria urbisque vestræ dignitate ac splendore viderentur esse conjunctissima. Quocirca petimus pro amicitia quæ vobis cum *Anglorum* Gente multo usu firmata jamdiu constat, & si qua in gratia apud vos nostrum quoque nomen est, ut insignem inter primos *Suecorum* Duces *Coningsmarcum*, egregium præsertim bello virum casu & suorum! proditione mati interceptum belli lege, non acerbissimè adhuc gesti, dimittere velitis, sin id minus vestris rationibus convenire arbitramini, ut leniore saltem ac liberiore custodia habendum censeatis. Utrum horum vobis faciendum decreveritis, id protecto in primis quod existimatione urbis vestræ dignum decernetis; deinde ab omnibus præclaris belli ducibus magnam gratiam inibitis; nos denique, quicquid id vestrâ interesse putatis, haud mediocri fanè beneficio devinciatis.

Vestrarum Amplitudinum Studiofissimus.

OLIVERIUS Protector Reipub.
Angliæ, &c.

Ex Aula nostra Westmonasterio.

Aprillis An. Dom 1957.

OLIVERIUS Protector Reip.
Angliæ, Scotiæ, Hiberniæ &c.

*Serenissimo ac Potentissimo Principi,
ac Domino*

IMPERATORI Ducique magno
universæ RUSSIÆ, Soli Domino *Vola-*
domæri, *Moschæ*, *Novogrodi*, Regi
Cazini, & *Astracani*, *Syberia*, Domino
Vobscœ, Magno Duci *Smolenchi*, *Tuers-*
coiæ, & aliarum, Domino ac Magno
Duci *Novogrodæ*, Inferiorum Regio-
nam *Chernigoi*, *Rezanscœ* & aliarum,
Domino omnis *Plagæ Septentrionalis*,
item Domino *Everscœ*, *Cartalinscæ*,
aliarumque permultarum.

S. P. D.

Anglorum Genti cum imperii vestri populis
vetus amicitia, magnusque usus, id quod
nemo nescit, amplissimumque commercium
jamdiu fuit; illa verò virtus singularis, *Impe-*
rator Augustissime, qua majoribus suis Majestas
vestra longè præluet, & quæ de ea est vicino-
rum omnium Principum opinio, Potissimùm
nos movet, ut Majestatem Vestram & eximio
studio colamus, eique communicata cupiamus,
quæ & rei *Christiana* & rationibus vestris haud
parum

parum conducere, nec minus nominis vestri
gloriæ servire posse existimemus. Quapropter
ornatissimum virum Dominum *Richardum*
Bradshaw, summa fide, integritate, pruden-
tia, usuque rerum, ex aliis etiam Legationi-
bus, nobis cognitum, ad Majestatem Vestram
misimus Oratorem; qui & singulare erga vos
nostrum studium, summamque observantiam
vobis exponat; & supradictis de rebus agere
cum Majestate Vestra possit. Eum itaque ut be-
nignè nostro nomine accipiatis, eique ut, quo-
ties commodum crit, liberum aditum, au-
relque benignas, fidem denique in iis omnibus
quæ proposuerit aut transegerit, eandem atque
nobismetipsis, si coràm adfuissemus, præbere
velitis rogamus; adeoque Majestati vestræ atque
Imperio Russico fausta omnia à Deo Opt. Max.
precamur.

Majestatis Vestræ Studiofissimus

OLIVERIUS, Protector. Reip.
Angliæ, &c.

Ex Aula nostra Westmonasterii
die April, An. Dom. 1647.

OLIVERIUS Protector Reip.
Angliæ, &c.

Serenissimo ac Potentissimo Principi

CAROLO GUSTAVO

*Suecorum, Gothorum, Vandalorumque
Regi, Magno Principi Finlandiæ, Duci
Esthoniæ, Careliæ, Bremæ, Verde,
Stetini Pomeraniæ, Cassubiæ & Vanda-
liæ, &c.*

*Serenissime Potentissimeque Rex, Amice,
ac Fœderate Charissime,*

VIr nobilissimus Gulielmus Jepsenus Militum
Tribunus, & Parlamenti nostri Senator, cui
hoc munus honori erit, quòd Majestati Vestræ
hasce literas dabit, certiolem eam faciet quanta
cum perturbatione ac dolore nuntium accepi-
mus belli illius funesti inter Majestatem vestram
Daniæque Regem coorti; quamque nobis cordi
ac studio sit, nullam nostram operam aut offi-
cium prætermittere, quoad Deus facultatem
dederit; ut huic ingruenti malo remedium ali-
quod maturè afferatur, eæque simul calami-
tates avertantur, quas inferri ex hoc bello reli-
gionis causæ communi necesse erit; hoc præ-
sertim tempore, quo adversarii nostri contra-
Or-

Orthodoxæ fidei professionem & professores cum
 confilia perniciosissima tum vires arctissime
 conjungunt. Hæc atque alia nonnulla permagni
 ad utriusque gentis commoda rationesque pu-
 blicas momenti adduxêre nos, ut hunc virum
 ornatissimum Internuntii extraordinarii prædi-
 ctum munere ad Majestatem vestram mittere-
 mus: Quem uti amicè recipiatis, eique, iis in
 rebus quas cum Majestate vestra nostro nomine
 communicaverit, summam fidem adhibeatis
 rogamus, cum is sit cujus fidei atque pruden-
 tiæ nos quoque plurimum tribuamus. Simul
 & illud petimus, ut Majestas vestra nostram
 ergo se resque suas benevolentiam singularem,
 atque studium persuasissimum sibi habeat; cu-
 jus nos argumenta certissima per omnem oc-
 casionem & propenso animo & officiis paratissi-
 mis præbebimus,

*Majestatis Vestræ amicus & Fæderatus
 conjunctissimus*

OLIVIRIUS Protector Reip.
 Angliæ, &c.

*Ex Aula nostra Westmonasterii.
 Aug. An. Dom. 1657.*

*Excellentissimo Domino***DOMINO de BOURDEAUX***Serenissimi***REGIS GALLIARUM****Legato extraordinario.***Excellentissime Domine,*

Mercatores quidam *Londino-derrienses Samuel Dawsonus, Joannes Campsejus, & Joannes Nevinus* per libellum supplicem *Serenissimo Domino Protectori* ediderunt, se, posteaquam fœdus inter hanc *Rempub. Regnumque Galliae* redintegratum intellexerant, An. Dom. 1655. navem quandam cui nomen *Anglicè The Speedwell*/ melioris ominis causâ, quam eventus ferebat, impositum, *Joannes Ker* Magister erat, mercibus quibusdam ex portu *Derriensi Burdegalam* convehendis onerasse; eam navem illic onere exposito, vinoque aliisque mercibus inde impositis, captam in reditu die 25. *Novembris* anni supradicti à duabus *Brestensum* Navibus armatis, quarum alteri *Adrianus Vindmian Swart*, alteri *Jacobus Jonsonus* præfuit, ab iisdem etiam in portum *Briuatem*, vulgo *Brestensem*, fuisse abductam; ibique & jure captam judicatam esse, & auctione venditam, cum mille centumque libras nostras estimatione justâ valuisset, extra damnum mille librarum præterea datum: de quibus recuperandis omni se honesta ratione cum illius loci præfectis egisse;

id

id sibi haëtenus frustra fuisse: se etiã moribus
 edictum curiæ maritimæ consecutos esse, quo
 citarentur in iudiciũ qui navem illam cepis-
 sent, autem jure esse captam defendere statuis-
 sent. Edictum hoc & recte atque ordine pro-
 mulgatum & redditum: idque ab ejusdem cu-
 riæ ministris publicis maturè *Domino Legato Gal-*
lie significatum esse: cum nemo contra compa-
 paruisset, testes aliquot juratos de re judicanda
 interrogatos esse. Quæ res cum à Petitoribus ad
 Cellitudinem Domini *Protektoris* delata sit, ab
 eoque cognitioni atque sententiæ Concilii man-
 data, cumque de facto ex testimoniis juratis
 libello supplici adjunctis abunde constet, Peti-
 toribusque liberum commercium *Burdegala* sit
 datum, mercesque illic emptæ atque impositæ vi-
 sint in reditu ereptæ & occupatæ contra fœderis
 fidem, ut supra demonstratum est, quis non
 videt hoc esse æquissimum, aut navem cum
 onere Petitoribus restitui, aut de damno cum
 captæ navis tum juris persequendi plene satis-
 fieri? Peto igitur ab *Excellentia vestra* atque
 etiã Serenissimi Domini *Protektoris* nomine
 peto omnem velit operam dare, omnique ope-
 ræ authoritatem etiã sui muneris adjungere
 ut primo quoque tempore horum alterutrum
 fiat. Cum neque in causa æquiore laborare
 possit, neque mihi gratiore; qui eo diligen-
 tius curasse quod mandatum mihi est videbor,
 quo *Excellentia vestra* maturius quod suum est
 præstiterit.

Ex Alba Aula Augusti, An. Dom. 1657.

OLIVERIUS Protector Reip.
Angliæ, &c.

Serenissimo Principi

D^O. FREDERICO WILHELMO
*Marchioni Brandenburgensi Sacri
Romani Imperii Archi-Camerario ac
Principi Electori Magdeburgi, Prus-
sia, Julia, Clivia, Montium Stetini,
Pomerania, Cassubiorum Vandalorum-
que, necnon in Silesia Crosna & Car-
novia Duci, Burggravio Norinbergensi,
Principi Halberstadii & Minden, Co-
miti Marca & Ravensbergi, Domino
in Ravenstein.*

S. P. D.

*Serenissime Princeps, Amice ac Fæderate
Charissime,*

CUM ea sit Celsitudinis vestræ singularis vir-
tus & pace & bello terrarum orbe toto jam
clara, ea magnitudo animi atque constantia,
ut amicitiam vestram omnes fere Principes Vi-
cini ambient, amicum & socium nemo fidelio-
rem sibi aut constantiorem cupiat, ut nos
quoque in eorum numero esse intelligatis qui de
H vobis

vobis vestrisque egregiis de *Rep. Christiana* meritis quam optimè quamque præclarè sentiunt, nobilissimum virum *Gulielmum Jepsonum*, *Tribunum Militum*, & *Parlamenti nostri Senatorem* ad vos misimus, qui vobis nostro nomine & plurimam salutem dicat, & rebus vestris felicitatem omnem ominetur atque exoptet; nostram denique benevolentiam summumque studium erga vestram serenitatem verbis amplissimis exponat: eique proinde fidem, iis in rebus de quibus vobiscum egerit, eandem habeatis rogamus, ac si à nobismetipsis testata omnia atque confirmata coram essent.

Ex Aula Westmonasterio. Augusti
An. Dom. 1657.

OLIVERIUS Protector Reip.
 Angliæ &c.

Amplissimis Civitatis

Hamburgensis Consulibus ac
Senatoribus

S. P. D.

Amplissimi, magnifici & spectabiles viri,
amici charissimi,

CUM Vir ornatissimus *Gulielmus Jepsonus*,
Tribunus Militum, & *Parlamenti nostri Se-*
nator, Ad *Suecorum Regem Serenissimum* à no-
 bis

bis missus vestram per urbem iter faciat, in mandatis dedimus, uti vos quoque ne præteriret nostro nomine insalutatos; neque non rogatos, ut si qua in re vestra authoritate consilio aut præsidio opus sibi esse judicaverit, ei quibus rebus potestis præstò esse velitis. Id quo libentius feceritis, eo maiorem à nobis iniisse vos gratiam intelligetis.

*Ex Aula nostra Westmonasterio. die Augusti.
An. Dom. 1657.*

Amplissimis Civitatis
Bremensis Consulibus ac
Senatoribus

S. P. D.

*Amplissimi, magnifici & spectabiles viri,
amici charissimi,*

Qui noster animus erga vestram civitatem, quæque benevolentia cum propter puriorem apud vos Religionis cultum etiam propter urbis celebritatem sit, & sensistis aliàs, & quoties facultas dabitur sentietis. Nunc, cum ornatissimus vir *Gulielmus Jepsenus*, *Tribunus Militum*, & *Parlamenti nostri Senator* ad *Serenissimum Regem Sueciæ* per urbem vestram *Oratoris* munere instructus iter faciat, hoc tantum in præsentia volumus, ut & vos ille peramanter perque amice nostro nomine salutet, & siquid

acciderit in quo vestrâ ope atque amicitia usus sibi esse possit, id uti à vobis pro nostra necessitudine peteret. Quam in re non magis defuturos vos esse confido quam de nostro erga vos amore singulari ac duduo dubitare debetis.

*Westmonasterio ex Aula Nostra. . . . die Aug.
An. Dom. 1657.*

OLIVERIUS Protector Reip.
Angliæ &c.

Amplissimis Civitatis

**Lubecensis Consulibus ac
Senatoribus**

S. P. D.

*Amplissimi, magnifici & spectabiles viri,
amici charissimi,*

Guilielmus Fepsonus vir nobilissimus, Militum
Tribunus, & Parlamenti nostri Senator ad
Serenissimam Suecorum Regem ab urbe vestra
haud longe castra habentem publico Munere
ornatus proficiscitur. Quapropter ei per urbem
vestram aut ditionem iter facienti ut omni ad-
jumento, si opus erit, atque præsidio, pro
nostra amicitia atque commercio, adesse velitis
rogamus. De cætero & salutatos vos esse nostro
nomine peramicè volumus, deque nostro erga
vos

(173)

vos propenso animo ac voluntate esse persuasissimos.

Westmonasterio ex Aula nostra. die Aug.

An. Dom. 1657.

OLIVERIUS Protector Reip.
Angliæ &c.

Amplissimis Civitatis
Hamburgensis Consulibus ac
Senatoribus

S. P. D.

*Amplissimi, magnifici & spectabiles viri,
amici charissimi,*

Qui hæc ad vos literas perfert *Philippus Meadow* Oratoris munere à nobis instructus ad Serenissimum *Dania Regem* per Urbem vestram proficiscitur. Eum, siquid erit, in quo vestram authoritatem adjumento sibi fore aut præsidio existimaverit, commendatum vobis magnopere volumus. Nostraque commendatio quo solet esse apud vos pondere, eodem uti nunc sit rogamus; vobis vicissim, siquid ejusmodi occurrit non defuturi.

Ex Aula Nostra Westmonasterio. die Aug.

An. Dom. 1657.

OLIVERIUS Protector Reip.
Angliæ &c.

Serenissimo Principi

F R E D E R I C O

*Heredi Norvegia, Duci Slesvici,
Holsatia, Stormaria, Ditmarsia,
Comiti in Oldenburg &
Delmenhorst.*

Serenissime Princeps, amice Charissime,

Missus à nobis Vir Domi nobilis Gulielmus
Jepsonus, Militum Tribunus, & Parlamenti
nostri Senator ad Serenissimum Suecorum Regem,
quod paci communi, Reique Christiane felix
faustumque sit, Legationem obit. Ei inter alia
negotium dedimus, ut cum in itinere salutem
plurimam Serenitati Vestræ nostro nomine
dixisset, pristinamque nostram benevolentiam
& constantissima studia significasset, ab ea
quoque peteret, ut autoritate vestrâ munitus
iter tutum atque commodum habere per ve-
stram ditionem possit. Quo beneficio Celsitudo
vestra nos nostraque vicissim officia majorem
in modum demerebitur.

Westmonasterio ex Aula nostra. die Aug.

An. Dom. 1657.

OLIVERIUS Protector Reip.
Angliæ.

Serenissimo Principi.

F E R D I N A N D O

Magno Duci Hetruriæ.

Serenissime Dux magne, amice charissime;

Ostendit nobis per libellum supplicem Societas Mercatorum nostrorum qui ad oras *Mediterranei Maris Orientales* negotiantur, Præfectum quendam navis *Lodoviculi*, sive *Anglicè The Little Lewis*, nomine *Gulielmum Ellum*, cum *Alexandriæ* in *Egypto* esset, conductum à Satrapa *Memphitico* ut *Oryzam*, *Saccharum* & *caphiam*, ipsius *Turcarum* Principis in usum *Constantinopolim* aut *Smyrnam* comportaret, classi se *Otomanicæ* in itinere subduxisse, &, contra datam fidem, navis totum onus *Liburnum* avertisse: ibi prædâ potitum nunc agere. Quod facinus, pessimi sanè exempli, cum *Christianum* nomen probro, Mercatorum fortunas degentium sub *Turca* direptionis periculo objiciat, petimus à Celsitudine Vestra, ut illum hominem comprehendi, & in custodiam tradi, navemque & bona retineri jubeat, quoad significatum à nobis erit curasse nos res illas *Turcarum* principi reddendas. Vestræ Celsitudini sicubi

H 4

nostris

(176)

nostris officiis usus vicissim erit , paratissima
omni tempore fore profitemur.

Celsitudinis Vestrae Studiosissimus

OLIVERIUS Protector Reipub.
Angliæ, &c.

Westmonasterio ex Aula nostra. die Sept.

An. Dom. 1657.

OLIVERIUS Protector Reip.
Angliæ, &c.

Serenissimo Principi ac Domino

D^o. FREDERICO WILHELMO

Marchioni Brandenburgensi, Sacri Ro-
mani Imperii *Arch-Camerario*, ac Prin-
cipi Electori Magdeburgi, Prussiae, Juliae,
Cliviae, Montium, Stetini, Pomeraniae,
Cassubiorum, Vandalorumque, nec non in
Silesia, Crosnae & Carnoviae Duci, Burg-
gravio, Norinbergensi, Principi Halber-
stadii & Mindæ, Comiti Marce & Ra-
vensbergi, Domino in Ravenstein.

*Serenissime Princeps, amice ac Fæderate
charissime,*

Alteris ad Celsitudinem Vestram literis per
Oratorem nostrum Gulielmum Jephsonum
aut redditis aut brevi reddendis Legationis ipsi
à nobis mandatæ fidem fecimus; idque sine

ve-

vestrarum virtutem aliqua mentione, nostræque
 erga vos benevolentia, significatione facere non
 potuimus. Verum nequis vestra de rebus Pro-
 testantium egregiè merita, quæ summa om-
 nium prædicatione celebrantur, nos obiter te-
 tigisse tantum videamur, resumendum nobis
 nunc idem argumentum, nostræque officia non
 libentiùs quidam aut animo propensiore, ali-
 quanto tamen prolixius deferenda Serenitati ve-
 stræ censuimus. Et meritò sanè, cum ad aures
 nostras quotidie perferatur, fidem vestram atque
 constantiam omnibus tentatam machinis, Sol-
 llicitatam technis, labefactari tamen, & ab
 amicitia fortissimi Regis ac socii, nullo modo
 posse dimoveri: idque cum eo loco Suecorum
 res nunc sint, ut in retinenda eorum societate
 Celsitudinem vestram Reformatæ potius Reli-
 gionis causa communi, quam suis commodis
 duci manifestum sit: cumque hostibus vel oc-
 cultis, vel jam prope imminentibus cincta un-
 dique & penè obsessa sit, copiae ut sint validæ
 non tamen sint maximæ, ea tamen firmitate
 animi ac robore esse, eo consilio ac virtute im-
 peratoria, ut una vestra voluntate niti totius
 rei summa ac moles; bellicque hujus maximi
 exitus pendere videatur. Quapropter nihil est
 quod dubitet Celsitudo vestra quin de amicitia
 nostra summoque studio polliceri omnia sibi
 possit; qui vel ipsi ab omni laude derelicti nobis
 videremur, si præclara ista fide atque constan-
 tia, cæterisque vestris laudibus minùs delecta-
 remur, aut vobisipsis communi Religionis no-

mine minus deberemus. Quòd si rebus ab ornatissimo Viro *Joanne Frederico Schelzer* Consiliario & Oratore apud nos vestro propositis respondere, pro eo ac studemus, hætenus non possumus (quanquam is omni assiduitate ac diligentia id aget atque contendit) conditioni rerum nostrarum hoc velit imputare Celsitudo vestra rogamus; sibi que imprimis persuadere nihil nobis esse antiquius aut optatius, quam ut vestris rationibus cum Religionis causa tam conjunctis usui quam plurimum atque subsidio esse possimus. Interim tam clara virtus ac fortitudo ne ullo tempore deficiat aut opprimatur, dignæ laude aut fructu careat Deum Opt. Max. precamur.

Celsitudini Vestræ Studiosissimus

OLIVERIUS Protector Reip.
Angliæ, &c.

*Ex Aula Nostra Westmonasterio. . . . die Sept.
An. Dom. 1657.*

Excellentissimo Domino, Domino de Bordeaux Serenissimi Galliarum Regis Legato extraordinario.

Excellentissime Domine,

Postulavit à Serenissimo Domino *Protectore, Lucas Lycius Mercator Londinensis* de sua quadam

dam navi , cui nomen *Maria* , quæ cum ab *Hibernia Bajonam* peteret , vi tempestatis ad *sanctum divi Joannis de Luz* , appulsa , ibi retenta & occupata est actione *Martini* cujusdam *De Laxon* ; nec restituta donec à procuratoribus Mercatoribus illius satisficeretur , se de illa navi atque onere cum *Martino* lege experturos. Tulit enim præ se *Martinus* deberi sibi grandem à *Parlamento Angliæ* pecuniam , mercium quarundam suarum nomine quæ in navi quadam *Sancta Clara* anno 1642. *Parlamenti* Auctoritate sunt retentæ. Verum cum satis constaret , *Martinum* illum earum mercium verum dominum non esse , sed cum *Antonio* quodam *Fernandez* verorum dominorum *Richaldi & Iriati* jus persequi , dissidentibusque inter se *Martino & Antonio* , decreverit *Parlamentum* uti merces illæ retinerentur quoad lege esset decisum utri eorum reddendæ essent , paratusque fuerit semper *Antonius* lege agere ; contrà , neque *Martinus* neque pro eo quisque in judicio hætenus comparuerit , quæ omnia ex *Luæ* Petitoris libellis libello supplici annexis liquent ; iniquissimum sanè est , ut is , qui jus suum suppositum cum *Antonio* collegâ suo de alienis bonis experiri apud nos recusât , cogeret nostros homines verosque dominos de suis bonis in aliena ditione contendere : Quin idem æquitati vestræ atque prudentiæ videatur , non dubitat Serenissimus Dominus *Protektor* ; à quo sum jussus hanc *Luæ Lucii* causam æquissimam *Excellentiæ Vestræ* singularem in modum commendare : ne *Martino* , qui jus

alienum apud nos persequi negligit , eo obtentu
aliis eripiendi jus suum apud vos potestas detur.

Excellentiæ Vestræ Studiosissimus.

Westmonasterio. die Octob.

An. Dom. 1657.

OLIVERIUS Protector Reip.

Angliæ, &c.

Serenissimo

Duci ac Senatui Reip. Venetæ.

Serenissime Dux atque Senatus, amici charissimi,

Nuntii rerum vestrarum contra *Turcas* felicissimè gestarum tam crebri ad nos perferuntur, ut nobis non sæpius ulla de re ad vos scribendum, quam de insigni aliqua victoria gratulandum sit. Hanc recentissimam, & Reip. vestræ quam maxime lætam atque opportunam cupimus. &, quod gloriosissimum est, *Christianorum* omnium sub *Turca* servientium quam maxime liberatricem. Nominatim *Thomam Galileum* navis, cui nomen, *The Relief*, olim præfectum, *Serenitati vestræ ac Senatûs*, tametsi non nunc primum, nunc tamen eo libentiùs, quo latiori tempore, quinquennalem captivum commendamus. Ei cum à vobis imperatum esset, ut cum navi sua Reip. vestræ operam navaret, solus cum multis hostium triremibus

con-

congressus, nonnullas depressit, magnamque stragem edidit; tandem combusta navi captus vir fortis, deque *Veneta Rep.* tam benè meritus, quintum jam annum in misera servitute *Barbarorum* degit. Unde se redimat facultatum nihil est; nam quicquid erat, id à *Celsitudine vestra & Senatu*, vel Navis vel bonorum vel stipendii nomine deberi sibi ostendit. Verùm ut facultates non deessent; hostes tamen non aliâ lege dimissuros se cum profitentur, quam si suorum aliquis, qui illis in pretio æquè sit, permute-
tur. Petimus itaque magnopere à *Vestra* atque *Senatus Celsitudine Serenissima*, petit per nos senex miserimus, captivi pater, mœroris & lachrymarum plenus, quæ nos quidem permoverunt; ut primùm quoniam ex tot prosperis præliis *Turcarum* tanta copia captorum vobis est, unum aliquem ex eo numero, quem illi accipiant, hostem vestro milite fortissimo, nostro cive, senis mœstissimi filio unico commutare velitis. Deinde, ut quod stipendii, vel aliis nominibus ipsi à *Rep.* debetur, id quam primùm velitis patri aut procuratori ipsius annumerandum curare. Priori quidem rogat nostro, vel potius æquitate vestrâ effectum est, ut statim re cognitâ, putatisque rationibus constitutum esset quid debeatur: verum illum supplicationem, urgentibus fortasse aliis negotiis, nulla solutio secuta est. Nunc miseri conditio dilationem salutis diutiùs non fert: eum, si omnino salvum vultis, danda opera est, ut squalore illo carceris teterrimo quamprimùm liberetur.

Id sine mora, sine hortatu etiam nostro humanissimâ voluntate vestrâ facturos vos esse confidimus: quandoquidem iustitiâ, moderatione, atque prudentiâ non minus quam belli gloriâ victoriisque floretis: Atque ut diutissimè floreatis, devicto hoste potentissimo, Deum Opt. Max. precamur.

Celsitudinum Vestrarum Studiosissimus

OLIVERIUS Protector Reipub.
Angliæ &c.

*Westmonasterio ex Aulâ nostrâ. . . die Octob.
An. Dom. 1657.*

OLIVERIUS Protector Reip.
Angliæ &c.

Excelsis & Præpotentibus Dominis
FOEDERATI BELGII
Ordinibus

S. P. D.

*Excelsi & Præpotentes Domini; Amici ac
Fœderati charissimi,*

R Edit ad vos Vir illustrissimus Gulielmus Aupart Legatus vester annis jam aliquot apud nos extraordinarius: sed ita redit, petito ad tempus duntaxat à vobis cômmeatu, ut eum brevi reversurum speremus. Eâ enim est fide, vigilantia,

gilantiâ, prudentiâ, æquitate apud nos in suo munere verſatus, ut majorem in unoquoque genere virtutem ac probitatem neque nos deſiderare in Legato, viroque optimo neque vos poſſitis; eo animo ac ſtudio ad pacem inter nos & amicitiam ſine fūco & fraude conſervandam, ut illo hanc Legationem obeunte quid inter nos offenſionis aut ſcrupuli ſuboriri queat, aut pullulare, non videamus. Et diſceſſum ſanè ejus moleſtiore animo ferremus, hac præſertim rerum ac temporum inclinatione, niſi perſuaſiſſimum nobis hoc eſſet, neminem melius poſſe aut fidelius vel rerum utrobique ſtatum, vel noſtram erga *Ceſtitudines veſtras* benevolentiam ſtudioſumque integrum coram exponere. Quapropter hunc ut Virum undiquaque præſtantiſſimum, deque Rep. & ſua & noſtra optime meritum accipere redeuntem velitis rogamus; ſicuti & nos veriſſimo noſtrarum laudum teſtimonio ornatum abeuntem dimiſimus prope inviti. Deus ad ipſius gloriam eccleſiæque præſidium *Orthodoxæ veſtris* rebus felicitatem, noſtræ amicitiae perpetuitatem concedat.

Ceſtitudinum Veſtrarum Studioſ.

*Westmonaſterio ex Aula noſtra. . . . die Novemb.
An. Dom. 1657.*

OLIVERIUS Protector Reip.
Angliae, &c.

Excelsis & Præpotentibus Dominis
F O E D E R A T I B E L G I I
Ordinibus

S. P. D.

Excelsi & Præpotentes Domini, Amici Nostri
ac Fœderati Charissimi,

Georgius Duningus Vir nobilis, nobis est multis ac variis negotiis summâ fide, probitate ac solertiâ perspectus jamdiu & cognitus. Eum, ut apud vos Oratoris munere fungatur, mittendum censuimus, mandatisque nostris amplissimè instruximus. Eum itaque amico, ut consuevistis, animo recipiatis rogamus; & quoties habere se significaverit, quod nostro nomine vestrum cum *Excelsis Ordinibus* agat, amicè audire, fidemque adhibere; & quæ vos vicissim communicanda nobis censebitis, ea omnia, sicuti rectè potestis, perinde ac si nos ipsi coram essemus, ei committere velitis. De cætero vobis vestræque Reip. ad Dei gloriam Ecclesiæque præsidium secundas res omnes ex animo præcamur.

Celsitudinum Vestrarum Studiofissimus

OLIVERIUS &c.

Westmonasterio ex Aula nostra. . . die Decemb.

An. Dom. 1657.

OR

ORDINIBUS HOLLANDIÆ.

Cum ea nostræ Reip. cum vestra intecedat necessitudo, ea sint utrinque negotia, ut sine Oratore atque interprete vel hinc vel inde missores tantæ ad utilitatem utriusque gentis constitui commodè vix possint, ex usu communi fore arbitrati sumus, ut *Georgium Dunningum* Virum nobilem, multis ac variis negotiis summâ fide, probitate ac solertia spectatum jam diu nobis & cognitum eo munere instructum mitteremus: qui nostro nomine apud vos maneat, iis maxime officiis intentus, quibus nostra amicitia facta tecta conservari posse quam diutissimè videatur. Hac de re cum ad Excelsos & Præpotentes Ordines scripsimus, tum vos quoque qui in Provincia vestra summæ rei præsidetis & Fœderati Belgii tanta pars estis certiores faciendos per litteras duximus; ut & nostrum Oratorem ea ratione qua convenit accipiatis, & quæ ille cum *Excelsis Dôminis Ordinibus* transfegerit, ea vobis persuadeatis peræque firma ac rata nos esse habituros, ac si ipsi rebus transactis coràm interfuissemus. Deus consilia vestra & facta omnia ad gloriam suam & Ecclesiæ pacem dirigat.

Westmonasterio &c. Decemb. 1657.

OLIVERIUS Protector Reip.

Angliæ &c.

Serenissimo Principi

F E R D I N A N D O

Magno Duci Hetruvia.

*Serenissime Dux Magne, amice noster
plurimum colende,*

PERMagnam nobis attulere voluptatem literarum
Celsitudinis Vestrae decimo Novemb. Florentia
datae; in quibus benevolentiam erga nos
Vestram eo vidimus perspectiorem, quanto
res ipsae verbis, facta promissis certiora bene-
volentis animi indica sunt: quae nempe rogavi-
mus Celsitudinem vestram, juberet illum navis
Lodovici parvi praefectum Gulielmum Ellum,
qui fidem Turcis datam turpissimè fregerat, &
ipsum comprehendi, & navem cum mercibus
in portu retineri, quoad Turcarum quae essent
redderentur, ne nomen Christianum per istius-
modi furta labem aliquam susciperet, ea omnia,
& summo quidem studio, quod satis intelli-
gimus, scripsit Celsitudo Vestra se praestitisse. Nos
itaque cum pro accepto beneficio gratias agi-
mus, tum hoc porro nunc petimus, quando-
quidem satisfactum iri Turcis Mercatores in se
receperunt, ut & Praefectus ille custodia libere-
tur,

tur, & navis cum mercibus quamprimum dimittatur; ne Turcarum forte rationem potiorrem, quam nostrorum civium habuisse videamur. Interim *Celsitudinis Vestrae* spectata voluntate erga nos singulari, & sanè gratissima sic libenter fruimur, ut ingratitude notam non recusamus, nisi pari promptitudine vobis vicissim gratificandi occasionem quam primum dari nobis exoptamus, ex qua nostrum quoque in reddendis officiis promptitudinem animi rebus ipsis erga vos demonstrare possimus.

Celsitudinis Vestrae Studiosissimus

OLIVERIUS &c.

Westmonasterio ex Aula nostra

Decemb. An. Dom. 1657.

OLIVERIUS Protector Reip.
Angliæ &c.

Serenissimo ac Potentissimo Principi

CAROLO GUSTAVO

*Suecorum, Gothorum, Vandalo-
rumque Regi.*

*Serenissime Potentissimeque Rex, Amice ac
Fæderate invictissime,*

Multa simul attulere nobis literæ *Majestatis
Vestrae* 21. Feb. in *Castris Selandicis* datæ,
cur, & privatim nostra, & totius reipub. *Chri-
stiana*

Stianæ causâ , lætitiâ haud mediocri afficeremur : primum quod Rex *Daniæ* , non suâ credo voluntate aut rationibus , sed hostium communium artibus factus hostis , repentino vestro in intimum ejus regnum adventu , sine multo sanguine , eò sit redactus , ut , quod res erat , utiliorum sibi pacem bello contra vos suscepto tandem judicaverit : deinde cum is eam nullâ se ratione citius posse consequi existimaret , quàm si delata sibi jamdiu ad conciliandam pacem nostrâ operâ uteretur , quòd *Majestas Vestra* foliis Internuntii nostri literis exorata , tam facili pacis concessione ostenderit , quantum nostrâ amicitia atque gratiâ interpositâ apud se valeret : meumque inprimis in hoc tum pio negotio officium esse voluerit , ut pacis tam salutaris *Protestantium* rebus , uti spero , mox futuræ ipse potissimum unus conciliator atque auctor propemodum essem. Cum enim Religionis hostes conjunctas opes vestras alio pacto frangere se posse desperarent , quàm si vos inter vos commisissent , habebunt nunc , profectò quod per timeſcant , ne armorum animorumque , ut spero , vestrorum hæc inopinata conjunctio ipsis belli hujus conflatoribus in perniciem vertat. Tu interim , Rex fortissime , mactæ tuâ egregiâ virtute ; & quam felicitatem in rebus tuis gestis victoriarumque cursu contra Regem nunc socium hostes Ecclesiæ nuper admirati sunt , eandem in suâ rursus clade , Deo benè juvante , fac sentiant.

Westmonasterio ex Palatio Nostro.

30. die Martii 1658.

OLIVERIUS Protector Reip.
Angliæ, &c.

Serenissimo Principi

F E R D I N A N D O
Magno Duci Hetruriæ.

Serenissimi Princeps,

Q Uod satisfacturum arbitramus, *Celsitudini*
Vestræ de nostro classis præfecto qui ad por-
tus vestros nuper est delatus, vestro apud nos
Oratori respondimus: Interim per libellum
supplicem nobis ostendit *Joannes Hosierus Lon-*
dinensis, cujusdam navis, cui *Domina* nomen:
Magister, se, cum anno 1656. mense Aprili,
navem suam ex syngrapha (chartam partitam
Jus nostrum vocat) *Josepho Armano Italo* cuidam
locasset, isque factas in syngrapha pactiones ter-
apertè fregisset, coactum esse demùm, ne na-
vem suam, totumque onus ejus, sortem denique
totam amitteret, more mercatorio declarata
publicè ejus fraude, & in tabulas publicas rela-
ta, *Liburni* in jus eum vocare: cum autem,
ut fraudem fraude tueretur, adhibitis in socie-
tatem duobus aliis negotiatoribus litigiosis, de
pecunia *Thomæ* cujusdam *Clutterbuxi* sex mille
pætonos, conficito quodam obtentu, petitoris
hujus nomine occupasse: se, post multas im-
pensas consumptumque tempus, jus suum *Li-*
burni

burni obtinere non posse ; ne audere quidem, propter adversariorum minas atque insidias, in iudicio illic comparere. Petimus itaque à *Celsitudine vestra*, ut cùm huic homini oppresso subvenire, tum hujus adversarii insolentiam pro consuetâ suâ justitiâ velit coercere: frustrâ enim auctoritate Principum leges essent civitatibus latæ, si vis atque injuria, cùm, ne omnino sint leges, efficere non possint, possint efficere terrore ac minis, ne quid ad eas audeat confugere. Verum in hujusmodi audaciam quin maturè animadversura sit *Celsitudo Vestra*, non dubitamus; cui pacem prosperaque omnia à Deo Opt. Max. precamur.

*Westmonasterio ex Aula Nostra. die
7. April. An. Dom. 1658.*

Serenissimo Potentissimoque Principi.

LUDOVICO
Galliarum Regi.

*Serenissime Potentissimæque Rex, Amicæ ac
Fæderatæ augustissime,*

M Eminisse potest *Majestas Vestra* quo tempore inter nos de renovando fœdere agebatur, quod optimis auspiciis initum multa utriusque populi commoda, multa hostium communium exinde mala testantur, accidisse miseram illam *Conuallensium* occisionem, quorum

rum causam undique desertam atque afflictam
 vestrae misericordiae, atque tutelae summo cum
 ardore animi ac miseratione commendavimus.
 Nec defuisse per se arbitramur *Majestatem Ve-*
stram officio tam pio, immo verò tam huma-
 no, pro eâ quâ apud *Ducem Sabaudiae* valere
 debuit vel auctoritate vel gratiâ: nos certè
 aliique multi Principes ac Civitates, Legationi-
 bus, Literis, Precibus interpositis, non de-
 fuimus. Post cruentissimam utriusque sexus
 omnis ætatis trucidationem, pax tandem data
 est, vel potius inducta pacis nomine hostilitas
 quædam tectior: conditiones pacis vestro in
 oppido *Pinarolii* sunt latæ; duræ quidem illæ,
 sed quibus miseri atque in opus dira omnia atque
 immania perpeffi faciliè acquiescerent, modo-
 iis, duræ & iniquæ ut sint, staretur; non sta-
 tur; sed enim earum quoque singularum falsâ
 interpretatione variisque diverticulis fides eludi-
 tur ac violatur; antiquis sedibus multi dejiciun-
 tur, religio patria multis interdicitur, tributa
 nova exiguntur, arx nova cervicibus imponi-
 tur, unde milites crebro erumpentes obvios
 quosque vel diripiunt vel trucidant: ad hæc nu-
 per novæ copiae clanculum contra eos paruntur;
 quique inter eos *Romanam Religionem* colunt,
 migrare ad tempus jubentur; ut omnia nunc
 rursus videantur ad illorum internecionem mi-
 ferrimorum spectare, quos illa prior laniena
 Reliquos fecit. Quod ego per dextram tuam,
Rex Christianissime, quæ foedus nobiscum &
 amicitiam percussit, obsecro atque obtestor,
 per

per illud *Christianismi* Tituli decus sanctissimum, fieri ne siveris : nec tantam sæviendi licentiam non dico principi cuiquam (neque enim in ullum Principem, multo minus in ætatem illius principis teneram, aut in muliebrem matris animum tanta sævitia cadere potest) sed sacerdotibus illis ficariis ne permiseris; qui cum Christi Servatoris nostri servos atque imitatores sese profiteantur, qui venit in hunc mundum ut peccatores servaret, ejus mitissimo nomine atque institutis ad innocentium crudelissimas cædes abutuntur : eripe qui potes, quique in tanto fastigio dignus es posse, tot supplices tuos homicidarum ex manibus, qui cruore nuper ebrii, sanguinem rursus sitiunt; suæque invidiam crudelitatis in Principes derivare consultissimum sibi ducunt. Tu verò nec titulos tuos aut Regni fines ista invidiâ, nec Euangelium Christi pacatissimum istâ crudelitate foedari te regnante petiaris. Memineris hos ipsos avi tui HENRICI *Praestantibus* amicissimi dedititios fuisse; cum *Dignus* per ea loca, qua etiam commodissimum in *Italiam* transitus est, *Sabaudum* trans *Alpes* cedentem victor infecutus : dedititionis illius instrumentum in actis regni vestri publicis etiam nunc extat; in quo exceptum atque cautum inter alia est, Ne cui postea *Convallenses* traderentur, nisi iisdem conditionibus quibus eos avus tuus invictissimus in fidem recepit. Hanc fidem nunc implorant, avitam abs te Nepote Supplices requirunt : tui esse, quàm cujus nunc sunt, vel permutatione aliquâ, si fieri possit, malint

malint atque optarint : id si non licet , patrocini-
 nio saltem , miseratione atque perfugio. Sunt
 & rationes regni quæ hortari possint ut *Conval-*
lenses ad te confugientes ne rejicias ; sed nolim
 te , *Rex* tantus cum sis , aliis rationibus ad de-
 fensionem calamitosorum quàm fide à majori-
 bus data , pietate , regiaque animi benignitate
 ac magnitudine permoveri. Ita pulcherrimi facti
 laus atque gloria illibata atque integrata tua erit ,
 & ipse Patrem misericordiæ ejusque filium
Christum Regem , cujus nomen atque doctrinam
 ab immanitate nefaria vindicaveris , eo magis
 faventem tibi atque propitium per omnem vi-
 tam experieris. Deus Opt. Max. ad gloriam
 suam , tot innocentissimorum hominum *Chri-*
stianorum tutandam salutem , vestrumque ve-
 rum decus *Majestati Vestra* hanc mentem inji-
 ciat.

Westmonasterio. Maii

An. Dom. 1658.

Civitatibus

HELVETIORUM

Euangelicis.

Illustres atque Amplissimi Domini ,

Amici Charissimi ,

DE *Convallensibus* Vicinis Vestris afflictissi-
 mis , quàm sint à Principe suo gravia &
 intollerauda religionis causâ passi , cum propter
 I ipsam

ipsam rerum atrocitatem horret prope animus recordari, tum ad vos ea scribere quibus notiora multo sunt, supervacuum duximus. Exemplum etiam literarum vidimus quas Legati vestri pacis jamdudum *Pinaroliana* hortatores atque testes ad *Allobrogum* Ducem illiusque *Taurinensis* consilii Præsidem scripserunt; in quibus ruptas esse omnes pacis conditiones, illisque miseris fraudi potius quam securitati fuisse singulatim, ostendunt atque avincunt. Quarum violationem ab ipsâ statim pace datâ in hunc usque diem continuatam, & indies graviolem nisi æquo animo patiuntur, nisi se conculcandos planè & perfumdandos prosternunt atque abjiciunt, religione etiam ejuratâ, impendet eadem calamitas, eadem strages, quæ ipsos cum conjugibus ac liberis tertio ab hinc anno sic miserabilem in modum attrivit atque afflixit, & subeunda iterum si est, funditus eradicabit. Quid agant miseri? quibus nulla deprecatio, nulla respiratio, nullum adhuc certum perfugium patuit; res est cum feris aut cum furiis, quibus priorum cedium recordatio nullam poenitentiam, aut suorum civium miserationem, nullum sensum humanitati aut fundendi sanguinis satietatem attulit. Hæc ferenda planè non sunt, si ve fratres nostros *Convallenses Orthodoxæ Religionis* cultores antiquissimo, si ve ipsam Religionem salvam volumus. Et nos quidem locorum intervallo plurimum disjuncti, quod opis aut facultatis nostræ prout & præstitimus ex animo, & præstare non desinemus. Vos qui non modo fratrum cruci-

tibus ac penè clamoribus, verum etiam eorundem furori hostium proximi estis, prospicite per Deum immortalem idque mature quid vestrarum nunc partium sit; quid auxilii, quid præsidii vicinis ac fratribus alioqui mox perituris ferre possitis ac debeatis, prudentiam vestram ac pietatem, fortitudinem etiam vestram consulite. Causa certè eadem est Religio, cur iidem hostes vos quoque perditos velint, immo cur eodem tempore, eodem superiore anno, foederatorum vestrorum intestino Marte perditos voluerint. Vestra duntaxat in manu post opem divinam videtur esse, ne purioris ipsa stirps Religionis vetutissima in illis priscorum fidelium reliquiis excindatur: quorum salutem in extremum jam discrimen adductam si negligitis, videte ne vosmetipsos paulo post proximæ vices urgeant. Hæc dum fraternè ac liberè hortamur, ipsi interea non langueſcimus: quod solum nobis conceditur tam longinquis, cum ad procurandam periclitantium incolumitatem tum ad sublevandam egentium inopiam, omnem operam nostram & contulimus & conferemus. Deus det utrisque nobis eam domi tranquillitatem ac pacem, eum rerum ac temporum statum, ut omnes nostras opes atque vires, omne studium ad defendendam ecclesiam suam contra hostium suorum furorem ac rabiem, convetere possimus.

*Westmonasterio ex Aula nostra. Maii
die An. Dom. 1658.*

Eminentissimo Domino

CARDINALI MAZARINO

SALUTEM.

Eminentissime Domine,

Illatæ nuper *Protestantibus*, qui *Valles* quasdam *Alpinas* in ditione *Ducis Sabaudie* incolunt, gravissimæ calamitates cædesque cruentissimæ fecêre ut inclusas has literas ad Majestatem Regiam, hasque alteras ad *Eminentiam Vestram* Scripserim. Et quemadmodum de Rege Serenissimo dubitare non possum quin hæc tanta crudelitas, quâ in homines innoxios atque inopes tam barbarè sævitum est, vehementer ei displiceat atque offensa sit; ita mihi facile persuadeo quæ ego à Majestate Regia illorum causâ miserorum peto, ad ea impetranda vestram quoque operam atque gratiam, velut cumulum, accessuram. Cum nihil planè sit quod *Francorum Genti* benevolentiam apud suos omnes vicinos *Reformatæ Religionis* cultores majorem conciliaverit, quam libertas illa ac privilegia quæ ex edictis suis atque actis publicis permixta *Protestantibus* atque concessa sunt. Et hæc quidem *Respublica* cum propter alias tum hanc potissimum ob causam *Gallorum* amicitiam ac necessitudinem majorem in modum expetivit.

De

De qua constituenda jamdiu cum *Legato Regio* apud nos agitur ejusque tractatio jam penè ad exitum perducta est. Quid ! quòd etiam singularis benignitas *Eminentiae Vestrae*, ac moderatio, quam in summis Regni rebus gerendis erga *Protestantes Galliae* semper testata est, à prudentiâ vestrâ & magnitudine animi ut hoc sperem atque expectem, facit ? qua ex re & fundamenta arctioris etiam necessitudinis inter hanc *Rempublicam*, *Regnumque Gallicum* *Eminentia vestra* jecerit, meque sibi privatim ad officia omnia humanitatis ac benevolentiae vicissim reddenda obligaverit: adeoque hoc velim *Eminentia vestra* sibi persuasissimum habeat.

Eminentiae Vestrae Studiosissimus.

OLIVERIUS Protector Reip.
Angliae

Serenissimo ac Potentissimo Principi

LUDOVICO

Galliarum Regi.

*Serenissime Potentissimeque Rex, Amice
ac Fæderate Augustissime,*

T Homam Vice-Comitem Falconbrigium Generum meum in Galliam proficiscentem, & ad testificandum obsequium suum & observantiam,

vantiam, qua *Majestatem Vestram* colit, venire in conspectum vestram, *Regiamque Manum* osculari cupientem, tametsi propter consuetudinem ejus jucundissimam invitus dimitto, tamen cum non dubitem quin ab aula tanti Regis, in qua tot viri prudentissimi fortissimique versantur, multo instructior ad res quasque laudatissimas, & quasi consummatus ad nos brevi sit reversurus, obsistendum esse ejus animo ac voluntati non sum arbitratus. Et quanquam is est, nisi Ego fallor, qui per se satis commendatus, quocunque accesserit, videri possit, tamen si se mea gratia *Majestati Vestrae* aliquanto commendatiorem fuisse senserit, eodem me quoque beneficio affectum atque devinctum arbitrabor. Deus *Majestatem Vestram* incolumem, nostramque amicitiam firmissimam communi orbis *Christiani* bono quam diutissime conservet.

*Westmonasterio ex Aula nostra. Maii
die An. Dom. 1658.*

OLIVERIUS Protector Reip.
Angliæ, &c.

Eminentissimo Domino
CARDINALI MAZARINO:

Eminentissime Domine,

CUM Thomam Vicecomitem Falconbrigium
Generum meum proficiscentem in Galliam
Serenissimo Regi commendaverim, non potui
quin ea de re *Eminentiam Vestram* certiore facerem,
nec non vobis etiam eundem commendarem:
id quantum ponderis atque momenti ad
superiorem quoque commendationem allaturum
sit non nescius. Quem certè fructum
commorationes apud vos suæ, sperat autem
non mediocrem hunc fore, percepturus est,
ejus maximam partem favori vestro ac benevolentiae
non poterit non debere; cujus prope sola
mens ac vigilantia res tantas eo in regno sustinet
ac tuctur. Quidquid ei gratum *Eminentia Vestra*
fecerit, id mihi fecisse se existimet; id ego in
multis vestris erga me humaniter & amicè factis
numerabo.

Westmonasterio. Maii
An. Dom. 1658.

OLIVERIUS Protector Reip.
Angliæ, &c.

Eminentissimo Domino
CARDINALI MAZARINO.

Eminentissime Domine,

CUm illustrissimum virum *Thomam Bellas-*
sisum Vicecomitem *Falconbrigium* Gene-
rum meum *Serenissimi* Regis adventum in ca-
stra ad *Dunkirkam* gratulatum mitterem, eidem
præcepi ut *Vestram* quoque *Eminentiam* adiret,
meoque nomine & plurimam salutem dicat, &
gratias vobis agat, cujus potissimum fide, pru-
dentiâ, vigilantia perfectum est, ut res Gallica
tam diversis in partibus, & præsertim in vicina
Flandria contra Hispanum hostem communem
tam prosperè geratur: à quo nunc celeriter, uti
spero, fraudum & insidiarum, quibus se maxi-
mè tuetur, aperta atque armata virtus poenas
reposcet: quod uti fiat quàm citissimè, nos
certe neque copiis, quantum possumus, neque
votis deerimus.

Westmonasterio ex Aulâ nostrâ.

... Maii An. Dom. 1658

OLIVERIUS Protector Reip.
Angliæ, &c.

Serenissimo ac Potentissimo Principi

L U D O V I C O

Galliæ Regi.

*Serenissime Potentissimeque Rex, amice
ac Fæderate Augustissime,*

U T nuntiatum est venisse in castra *Majestatem vestram*, tantisque copiis infame illud oppidum piratarum atque asylum *Dunkirkam* obsedisse, & magnam cepi voluptatem, & spem certam, fore nunc brevi, Deo bene juvante, ut infestum minùs posthac latrociniiis mare tutiùs navigetur; fore ut *Hispanicas* fraudes, ducem alterum ad *Hesdenæ* proditionem auro corruptum, alterum ad *Ostendam* dolo captum virtute bellicâ *Majestas vestra* nunc brevi vindicet. Mitto itaque nobilissimum virum *Thomam Vicecomitem Falconbrigium* generum meum, qui & adventum vestrum in tam propinqua nobis castra gratularetur, & coràm exponat quanto nos studio *Majestatis vestræ* res gestas non junctis solum viribus nostris, sed votis etiam omnibus prosequamur, uti Deus Opt. Max. & ipsam incolumem, & nostram

amicitiā firmissimā communi orbis *Christi-*
ani bono quam diutissimè conservet.

Westmonasterio ex Aula nostra. Maii
An. Dom. 1658.

Serenissimo Principi

F E R D I N A N D O,
Duci Magno *Hetruriæ,*

Serenissime Dux Magne,

CUM Celsitudo vestra in omnibus quidem
literis suis summam erga nos benevolentiam
suam nobis semper significaverit, dolemus id
præfectis vestris ac ministris aut tam obscure
significatum, aut tam malè esse intellectum,
ut in Portu *Liburnensi*, ubi maxime quæ vestra
sit erga nos benevolentia intelligi oporteret, nos
nullam ejus fructum aut indicium percipere
queamus; immo alienum potius & hostilem
vestrorum in nos animum indies experiamur.
Quàm enim non amicis nostra classis *Libur-*
nensibus usā nuperrime sit, quàm nullis adjuta
rebus, quàm hostiliter denique accepta bis ab
illo oppido discedere coacta sit, cum ex eo ipso
loco multis testibus fide dignis, tum ex ipso
Navarcho nostro; cui cum classē credamus,
narrandi fidem derogare non possumus, satis
videmur nobis nimisque certò cognovisse. Prio-
re ejus adventu *Cal. Jan.* post redditas Celsitu-
dini

dini vestrae literas nostras, vestraque omnia humanitatis officia nostris hominibus ultro delata, petentibus ut portus *Ferrarii* commoditate uti liceret, responsum est, id concedi non posse, ne *Rex Hispaniae* scilicet noster hostis offenderetur. Et tamen quid est quod princeps amicus amico praeberere communius possit, quam littoris ac portus aditum? quid est quod nos expectare ab huiusmodi amicitia possimus quae hostium nostrorum animum ne offendant, incommodare nobis quam commodare, aut vel minimis rebus subvenire paratior sit. Et primo quidem ex singulis navibus duobus vel tribus nautis duntaxat excensus in terram, sive commercium (quam vos *Practicam* vocatis) est datum: mox ut auditum est in oppido, navem quandam *Belgicam*, quae frumentum in *Hispaniam* portabat, à nostris esse interceptam, quod erat antea commercii statim adimitur; *Longlandius* qui nostris illic Mercatoribus praesidet, classem adire non permittitur; aquaticae quae omnibus non planè hostibus libera est, non nisi sub armatis custodibus in quo pretio, & quidem egerrimè praebetur: tot nostris Mercatoribus qui non sine maximo vestrorum emolumento illic versantur, suos ne invisant populares aut ulla re adjuvent interdicitur. Posteriore ejus adventu sub exitum mensis *Martii*, egressus ex navibus nemini datur: quinto post die cum naviculam quandam *Neapolitanam* praetoria navis nostra incidentem in nos fortè excepisset ducenta plus minus tormenta ab oppido

classẽm versus disploduntur quorum nullum ictu nos læsit ne attigit quidem : quod argumento esse potest quàm longè hæc à Portu atque castelli ditione in alto gererentur, quæ vestros quasi portu violato sic sine causa irritarunt : confestim aquatorum nostrorum scaphæ intra portum oppugnantur ; una capitur, detinetur ; reposcentibus neque scapham neque homines redditum iri respondetur, nisi capta illa navis *Neapolitana* reddatur quam constant libero mari captam, ubi capi licuit. Ita nostri multis modis incommodati sine illo comeatu, quem numeratâ pecuniâ coëmerant, abire denuo coguntur. Hæc si *Celsitudinis Vestræ* voluntate ac jussu quod speramus non fiunt, petimus id ostendat præfecti illius supplicio, qui amicitias Domini sui violare tam facile in animum induxit : sin est ut sciente ac volente vestrâ Celsitudine commissâ hæc sint, cogitet nos, ut benevolentiam vestram plurimi semper fecimus, ita apertas injurias à benevolentia dignoscere didicisse.

Vester quoad licet bonus amicus

OLIVERIUS Protector Reip.
Angliæ &c.

*Westmonasterio ex Aula nostra. Maii.
die An. Dom. 1658.*

OLIVERIUS Protector Reip.

Angliæ, &c.

Serenissimo ac Potentissimo Principi

LUDOVICO

Galliæ Regi.

*Serenissime potentissimeque Rex, Amice
ac Fœderate Augustissime,*

QUòd tam celeriter illustri missa Legatione
Majestas Vestra meum officium cumulo
rependit, cùm singularem benignitatem, ani-
mique magnitudinem testata est suam, tum
meo etiam honori ac dignitati quantopere fa-
veat, non mihi solùm declaravit, verum etiam
universo populo Anglicano: quo nomîne Ma-
jestati Vestræ, pro eo ac de me merita est,
gratias & ago & habeo maximas. De victoria
quam conjunctis nostris copiis Deus contra ho-
stes felicissimam dedit, vobiscum unà lætor;
nostrosque in eo prælio neque subsidiis vestris,
neque majorum suorum bellicæ gloriæ, neque
sue denique virtuti pristinæ defuisse perquam
etiam gratum est. De *Dunkirka*, quam dedi-
tioni proximam *Majestas Vestra* sperare se scri-
bit, eam nunc deditam tam citò posse me rescri-
bere insuper gaudeo: neque unius Urbis jactura
duplicem perfidiam *Hispanum* propediem esse

Iuiturum spero ; quod captâ urbe altera effectum esse , velim *Majestas* etiam *Vestra* tam citò possit rescribere. Quod reliquum pollicetur meas rationes curæ sibi fore , de eo regi optimo atque amicissimo pollicenti , ejusque Legato excellentissimo atque ornatissimo viro *Duci Crequiensi* idem confirmanti , non diffido ; Deumque Opt. Max. *Majestati vestræ Reique Gallicæ* domi bellicque propitium exopto.

Westmonasterio die Junii

An. Dom. 1658.

OLIVERIUS Protector Reip.
Angliæ , &c.

Eminentissimo Domino

CARDINALI MAZARINO.

Eminentissime Domine ,

C Um Regi Serenissimo per literas gratias agam qui honoris & gratulationis reddendæ causâ , suæque lætitiæ de nobilissima recenti victoria mecum communicandæ Legationem Splendidissimam misit , ingratus tamen sim , nisi *Eminentia* quoque *vestra* debitas simul gratias per literas persolvam ; quæ ad testandam suam erga me benevolentiam , meiquæ rebus omnibus quibus potest ornandi studium , nepotem suum præstantissimum atque ornatissimum adolescentem unâ misit , & siquem haberet apud

se propinquiorem aut quem pluris faceret, eum potissimum fuisse missurum scribit: addita etiam ratione, quæ ab iudicio tanti Viri profecta ad meam haud mediocrem laudem atque ornamentum pertinere existimo; nempe ut qui sanguine conjunctissimi sibi sunt in me honorando atque colendo *Eminentiam suam* imitarentur. Et humanitati quidem, candoris, amicitiae vestrum in me diligendo exemplum haud postremum fortasse habuerint; summæ virtutis summæque prudentiæ alia in vobis longe clario-
ra; quibus regnaresque maximas summa cum gloria administrare discant. Qua res uti possit *Eminentia vestra* quam diutissime quamque felicissimè gerere ad totius *Regni Gallici*, immo totius *Reip. Christianæ* commune bonum, vestrumque proprium decus, non defutura mea vota polliceor.

Eminentie Vestrae Studiosissimus.

*Westmonasterio ex Aula nostra. die
Junii An. Dom. 1658.*

OLF

OLIVERIUS Protector Reip.
Angliæ, &c.

Serenissimo Potentissimo Principi

CAROLO GUSTAVO

Suecorum, Gothorum, Vandalorumque
Regi &c.

Serenissime Potentissimeque Rex, Amice ac
Fœderate Charissime,

Q Uoties communium Religionis hostium importuna consilia variasque artes intuemur, toties nobiscum reputamus, quàm necessarium orbi *Christiano*, quamque salutare sit futurum, quo faciliùs adversariorum conatibus iri obviam possit, Protestantium Principes inter se, & potissimum *Majestatem vestram* cum *Repub.* nostra arctissimo fœdere conjungi. Id à nobis quantopere sit, quantoque studio expectitum, quàm denique gratum nobis accidisset, si *Suecorum* nostræque res ea conditione ac loco fuissent, ut fœdus illud ex utriusque animi sententia sanciri, alterque alteri opportunissimo auxilio esse potuisset, Oratoribus vestris, ex quo primùm illi hoc apud nos egerunt, testatum reddidimus. Neque vero illi suo muneri defuerunt; sed quam cæteris in rebus consueverunt, eandem hac quoque in parte prudentiam

tiam ac diligentiam adhibuerunt. Verùm ea nos domi improborum civium perfidia exercuit qui in fidem sæpius recepti, res novas tamen moliri, & cum exulibus, etiam cum hostibus *Hispanis* discussa jam sæpe & profligata consilia repetere non desinunt, ut in propulsandis periculis propriis occupati, neque curam omnem, neque integras opes quod in votis erat, ad communem *Religionis* causam tuendam convertere hætenus potuerimus. Quod licuit tamen, quantumque in nobis situm erat, & antea studiosè præstitimus, & siquid in posterum *Majestatis vestre* rationibus conducere videbitur, id non velle solùm, verùm etiam summâ ope vobiscum unâ agere per occasiones non desistemus. Interca *Majestatis vestre* rebus prudentissimè fortissimèque gestis gratulamur atque ex animo lætamur: eundemque uti velit Deus felicitatis atque victoriæ cursum esse quam diuturnum ad sui numinis gloriam assiduis precibus exoptamus.

Westmonasterio ex Aula nostra. Junii
.... die An. Dom. 1658.

OLIVERIUS Protector Reip.
Angliæ &c.

Serenissimo Principi

Lusitaniæ Regi.

S. P. D.

Serenissimo Rex, Amice ac Fæderate,

Ostendit nobis per libellum supplicem *Joannes Buffield* Mercator *Londinensis*, se anno 1649. merces quasdam *Antonio Joanni & Manueli Ferdinando Castaneo Tamirensibus* tradidisse, uti iis divenditis earum rationem mercatorum more sibi redderent: tum in *Angliam* dum navigaret, in piratas incidisse, spoliatumque ab iis damnum haud mediocre accepisse: hoc audito, *Antonium & Manuelem* eò quod hunc interfecitum credebant, traditas sibi merces statim pro suis habuisse, adhuc etiam retinere, rationemque omnem de iis recusare; atque huic fraudi subsecutam paulo post *Anglicarum* mercium proscriptionem obtendere; coactum se demum superiore anno, hyeme mediâ in *Lusitaniam* redire, sua repetere; sed frustra; hoc enim neque bona neque rationem ut reddant adduci posse; & quod mirum sanè videatur, privatam illarum mercium possessionem proscriptione

scriptione publicâ defendere : cùm videret se hominem longinquum deteriore conditione cùm *Tamirensibus* in sua patria contendere, ad *Majestatem Vestram* se confugisse ; Conservatoris judicium, qui judicandis Anglorum causis constitutus est, supplicem poposcisse ; à *Majestate Vestra* rursus ad forenseni illam cognitionem, unde confugerat, rejectum esse. Quod etsi per se iniquum non est, tamen cùm perspicuum sit *Tamirenses* istos vestro edicto publico ad suam privatam fraudem abuti, à *Majestate Vestra* majorem in modum petimus, ut causam hujus multis casibus afflicti, ad inopiam que redacti ad Conservatorem potius judicem proprium velit pro sua clementia integram remittere : quo possit inops fortunarum suarum quod superest ab illorum hominum infida societate recuperare : id, re cognitâ, quin *Majestati vestræ* nobiscum unâ maximè placeat non dubitamus.

Westmonasterio ex Aula nostra.

die Augusti 1658.

Sere-

Serenissimo Principi

L E O P O L D O

*Austriæ Archiduci, Provin-
ciarum in Belgio sub Phi-
lippo Hispaniarum Regi
Præsidi.*

Serenissime Domine,

C*arolus Harbordus*, vir *Equestris* apud nos *Ordinis*, per libellum supplicem ad nos detulit, se bona quædam & supellectilem cum ex *Hollandiâ Brugas* in ditionem vestram asportasset, de iis, ne sibi per vim atque injuriam eripiantur, inopinatò periclitari. Ea nempe, cum à *Comite Suffolchiensi* pro quo se grandi ære alieno obstrinxerat, ex *Angliâ* Anno 1643. missa ad se idcirco fuissent, ut habeat, quo sibi satisfaceret, siquid pro illo dissolvere cogeretur, à *Richardo Grenvillo*, qui & ipse *Equestris Ordinis* esse fertur, occupari, & quo in loco custodiebantur, Effractis foribus atque articulis possideri: hoc solo titulo, deberi sibi nescio quid à *Theophilo Suffolchiensi Comite* defuncto, ex quodam nostræ *Curie Cancellariæ* decreto, eaque proinde bona quasi *Theophili Comitæ* essent, eique decreto obnoxia, se referenda

ferenda in tabulas curasse: cum ex nostris legibus neque ipse Comes, qui nunc est, & cujus hæc bona sunt eo decreto teneatur, neque bona ejus occupari aut retineri debeant: id quod ex sententiâ ejusdem Curiaë unâ cum hisce literis ad vos missâ, declaratur, quas quidem literas supradictus *Carolus Harbordus* à nobis petiit, uti per eas *Celsitudinem vestram* rogatam vellemus, ut bona illa & recentione omni, & iniquâ istâ *Richardi Grenvilli* Actione, primo quoque tempore liberentur: cum hoc contra morem jusque Gentium planè sit, at cuiquam in aliena ditione eâde re Actio detur, quæ in ea Regione, ubi causa Actionis orta est, legitimè dari non possit. Hanc causam ut *Celsitudini vestræ* commendaremus, & ipsa justitiæ ratio, & prædicata Passim vestra æquanimitas promovit. Quod si quo tempore usus venerit, ut de jure aut commodis vestrorum apud nos agatur, haud remissa profecto nostra studia, immo omni tempore propensissima experturos vos esse polliceor.

Celsitudinis Vestræ Studiosissimus

OLIVERIUS Protector Recip.
Angliæ, &c.

Westmonasterio.

Supremæ Curie Parlamenti Parisiensis.

N Os Commissarii Magni Sigilli *Angliæ &c.*
 Supremam Curiam Parlamenti Parisiensis
 rogatam volumus curare velit uti Miles, Guliel-
 mus, & Maria Sandys defuncti nuper Gulielmi
 Sandys & Elisabethæ Soamæ Uxoris ejus liberi,
 natione *Angli*, ætate nondum adultâ, *Parisiis*,
 ubi nunc in supradictæ Curie tutela sunt, ad nos
 quamprimum redire possint; eosque liberos
 Jacobo Mowato Scoto, Viro probè atque honesto
 velit committere, cui nos hanc curam delega-
 vimus, ut eos & inde acciperet, & ad nos huc
 adduceret: recipimusque, occasione hujus-
 modi oblatâ, jus idem atque æquum subditis
Galliæ quibuscunque ab hac Curia redditum iri.

L I T E R Æ
RICHARDI Protectoris
Nomine conscriptæ

RICHARDUS Protector Reip.
Angliæ &c.

Serenissimo ac Potentissimo Principi

LUDOVICO
Galliarum Regi.

*Serenissime ac Potentissime Rex, Amice ac
Fæderate,*

C Um Serenissimus Pater meus gloriosæ memoriae Oliverius Reip. Angliæ Protector, omnipotente Deo sic volente, supremum jam diem tertio Septembris obierit, Ego Successor ejus in hoc magistratu legitimè declaratus, tametsi in summo mœrore ac luctu, non potui tamen quin de re tanta primo quoque tempore *Majestatem Vestram* per literas certiores facerem, quam & mei patris & hujus Reip. amicissimam hoc nuntio repentino haud lætaturam esse confido. Meum nunc est à *Vestra Majestate*
pa-

petere, de me sic velit existimare, ut qui nihil deliberatius in animo habeam, quam societatem & amicitiam quæ gloriosissimo meo parenti vestra cum Majestate fuit, summâ fide atque constantiâ colere; ejusque fœdera, consilia, rationis vobiscum institutas eodem studio ac benevolentiam observare rataque habere: Legatum proinde apud vos nostrum eadem qua prius potestate præditum volo: quicquid id nostro nomine vobiscum egerit, ita accipere velitis rogo quâ à me ipso actum id esset. *Vestra* denique *Majestati* comprecor fausta omnia.

Westmonasterio ex Aula Nostra
5. Septemb. 1658.

Eminentissimo Domino

CARDINALI MAZARINO.

Eminentissimè Domine,

Quanquam nihil mihi acerbius accidere potuit, quàm de Serenissimi & præclarissimi Patris mei obitu scribere, tamen cum sciam quanti ille fecerit *Eminentiam Vestram*, quanti vos illum, neque dubitem quin *Eminentia Vestra*, cui summa *Rei Galicæ* commissa est amici ac fœderati tam constantis tamque conjuncti mortem molestissime latura sit, permagni referre arbitratus sum, ut eam quoque, simul cum Rege, de hoc casu gravissimo per literas mone-
rem;

rem ; vobisque etiam , quoniam id æquum est , confirmarem , me ea omnia sanctissimè præstaturum ad quæ præstanda vobis , rataque habenda Serenissimæ memoriæ Pater meus tædere tenebatur : perficiamque ut illum , utpote vobis amicissimum omnique laude florentem , cum amissum meritò doletis , quàm minimè tamen quod ad servandam societatis fidem attinet , desideretis : cui etiam ad utriusque Gentis commune bonum vestra quoque ex parte servandæ Deus *Eminentiam Vestram* quàm diutissimè conservet.

Westmonasterio. Septemb. 1658.

RICHARDUS Protector Reip.
Angliæ &c.

Serenissimo ac Potentissimo Principi

CAROLO GUSTAVO

*Suecorum , Gothorum , Vandalo-
rumque Regi &c.*

*Serenissime Potentissimeque Rex , Amice ac
Fæderate ,*

CUm videar mihi Paternam virtutem vix
satis posse imitari , nisi easdem quoque ami-
citas colam & retinere cupiam , quas ipse &
virtute sibi quæsit & sibi esse maxime colen-
da.

das ac retinendas iudicio singulari duxit, non est quod dubitet *Majestas vestra* quin eodem se prosequi studio ac benevolentia debeam quā Pater meus memoriæ serenissimæ est prosecutus. Tametsi igitur in hoc magistratus ac Dignitatis initio non eo loco res nostras reperiam ut in præsentia possim ad quædam capita respondere, quæ Oratores vestri in medium protulerunt, tamen & institutam à patre foedus cum *Majestate vestra* continuare & arctium etiam conjungere mihi quidem magnoperè placet; rerumque utrinque statum simulac plenius intellexero, ad ea transigenda quæ cum utriusque reip. commodis potissimum conjuncta esse videbuntur, ero equidem semper, ad me quod attinet, promptissimus. Deus interim *Majestatem vestram* ad gloriam suam & *Orthodoxæ Ecclesiæ* tutelam atque præsidium quam diutissimè conservet.

Westmonasterio ex Aula nostra.

Octob. 1658.

Ri

RICHARDUS Protector Reip.
Angliæ , &c.

Serenissimo ac Potentissimo Principi

CAROLO GUSTAVO

*Suecorum , Gothorum , Vandalarum Regi ,
Magno Principi Finlandiæ , Duci Scaniæ ,
Esthoniæ , Careliæ , Brehmæ , Verde , Ste-
tini-Pomeraniæ , Cassubiæ & Vandaliciæ ,
Principi Rugiæ , Domino Ingriæ & Wis-
mariciæ ; nec non Comiti Palatino Rheni ,
Bavariæ , Juliaci , Cliviæ & Montium
Duci.*

*Serenissime , Potentissime Rex , Amice ac
Fæderate ,*

Binas accepi à *Majestâte Vestra* literas ; alteras
per nuntium suum , alteras Legato nostro
D. Philippo Meadow ad me transmissas. Ex qui-
bus non solum dolorem suum de obitu Patris
mei *Serenissimi* veris animi sensibus expressum ,
deque ipso *Majestas Vestra* quàm præclarè sen-
ferit , verum etiam de me quoque ejus in locum
suspecto quantam spem ceperit cognovi. Et ad
paternæ quidem laudis cumulum nihil posthac
amplius aut illustrius tanto authore accedere
potest meis certe in capeffenda *Repub.* auspiciis
nihil felicius tanto Gratulatore , ad virtutes de-
nique

nique patrias tanquam hæreditatem optimam
adeundas nihil quod accendat vehementius tan-
to hortatore potuit accidere. Ad rationes *Ma-
jestatis Vestræ* de communi *Protestantium* causa
nobiscum initas quod spectat, sic velim existi-
met, me quidem ex quo ad hæc gubernacula
accessi, quanquam eo loco res nostræ sunt, ut
summan diligentiam, curam, vigilantiam do-
mi potissimum requirant, nihil tamen antiquius
aut deliberatius habuisse aut habere quam pater-
no foederi cum *Majestate Vestra* percusso quan-
tum in me erit non deesse. Classem itaque in
mare *Balticum* mittendam cum iis mandatis
curavi quæ internuncius noster quem ad hoc
totum negotium amplissimè instruximus, *Ma-
jestati Vestræ* communicabit. Quam Deus Opt.
Max. incolumem prosperisque rerum successi-
bus fortunatissimam ad *Orthodoxam fidem* tuen-
dam diutissime conservet.

Westmonasterio ex Aula nostra.
die 13. Octob.

RICHARDUS Protector •

Serenissimo ac Potentissimo Principi

CAROLO GUSTAVO,

*Suecorum, Gothorum, Vandalo-
rumque Regi, &c.*

*Serenissime, Potentissimeque Rex, Amice
ac Fæderate,*

Mitto ad Majestatem vestram, quo nihil dignius aut præstantius possum mittere, Virum verè egregium, vereque Nobilem Georgium Asceum, Equitem auratum, non solum belli, & navalis præsertim scientiâ multis ex rebus fortiter gestis cognitum jam sæpe atque spectatum, verumetiam probitate, modestiâ, ingenio, doctrinâ præditum, moribus suavissimis nemini non charum, &, quod nunc caput rei est, sub signis *Majestatis Vestre* virtute bellicâ toto orbe terrarum florentissimæ jam diu mereri cupientem. Velinque sic habeat *Majestas Vestra*, quicquid huic Viro muneris commiserit, in quo fides, fortitudo, experientia constarit vel etiam prælucere possit, neque fideliori neque fortiori, nec facile peritiori posse se quicquam committere. Quæ autem Ego illi negotia dedero communicanda *Vestre Majestati*, in iis expeditum aditum, aurem benignam velit rogo præbere, eamque fidem, quam nobis

bismetipsis coram fuisset habitura ; eum denique honorem , quem tali viro & suis meritis & nostrâ commendatione ornatissimo convenire judicaverit. Deus res vestras ad gloriam suam & *Orthodoxæ Ecclesiæ* præfidium felici exitu fortunet.

*Westmonasterio ex Aula nostra.
die Octob. 1658.*

RICHARDUS Protector Reip.
Angliæ , &c.

Serenissimo Potentissimoqæ Principi
CAROLO GUSTAVO,
*Suecorum , Gothorum , Vandalo-
rumque Regi &c.*

*Serenissime Potentissimeque Rex , amice ac
Fœderate Charissime ,*

D Etulit ad nos per libellum supplicem *Samuel Piggottus* , Londinensis Mercator , se nuper naves duas , (quarum alteri nomen *Postæ* , Magister , *Tiddeus Jacobus* ; alteri *The Water Dog* / magister *Gerbrand Peters*) Londino in Galliam negotiandi causa misisse ; eas inde sale onustas *Amsterdamum* petisse ; *Amsterdamo* alteram saburrâ tantum , alteram halece impositas cujus cum *Petro* quodam *Heinsbergo* Societas erat in mare *Balticum* *Stetinum* usque *Pomeraniæ* ,
quæ

quæ in vestra ditione est, ad exponendam illic
 halecem navigasse; verùm utraq̃ue hæc naves
 accepisse se alicubi maris *Baltici* à copiis qui-
 busdam vestris detineri; tametsi ut huic malo
 occurreret cum utraque nave syngrapham sigil-
 lo curiæ maritimæ obsignatam una curaverit
 mittendam, qua & navium harum & mer-
 cium, exceptâ halecis parte supradictâ, unum
 se esse ac legitimum dominum demonstraret.
 Cujus rei cùm fidem apud nos plenam fecerit,
 peto magnopere à *Majestate Vestra* (quando-
 quidem duarum navium jactura sine summo
 hominis detrimento fortunarumque forte om-
 nium naufragio vix posse accidere videtur) uti
 mandet suis atque imperet illarum navium libe-
 ram primo quoque tempore dimissionem. Deus
 Majestatem Vestram ad gloriam suam, Eccle-
 siæque Orthodoxæ præsidium quàm diutissimè
 servet incolumem.

Westmonasterio ex Aula Nostra,

Jan. 27. An. Dom. 1658.

RICHARDUS Protector Reip.
Angliæ &c.

Celsis & Potentibus Dominis

OCCIDENTALIS FRISIÆ
Potestatibus

S. D.

*Celsi & Potentes Domini, amici ac
Fæderati Charissimi,*

GRavem ad me detulit querelam per libellum supplicem *Maria Grindaria* vidua, cum sibi à *Thoma Killigræo* vestro milite pecunia bene magna ante annos octodecim debeatur, se eum ne nullo modo adducere per Procuratorem posse, neque ut debitum solvat, neque ut de jure suo, si quid sit, velit lege experiri; id ne à procuratore viduæ cogi possit, petisse eum à Celsitudinibus Vestris per libellum supplicem ne cui liceat eum lege persequi ullius pecuniæ ab se in *Angliæ* debitæ. Ego verò si Celsitudinibus vestris hoc tantum significavero, viduam esse, egenam esse, multorum matrem parvulorum, cujus iste omnes prope fortunas avertere conatur, non committam ut apud vos, quibus divina præcepta atque adeo de viduis pupillisque non opprimendis notissima esse confido, graviore ullâ utendum cohortatione putem, ne
hoc

hoc fraudandi privilegium petitioni istius concedere velitis : id quod nunquam concessuros vos esse mihi persuadeo.

Westmonasterio ex Aula nostra.

Jan. 27. 1658.

RICHARDUS Protector Reip.
Angliæ, &c.

Serenissimo potentissimoque Principi

L U D O V I C O
Galliæ Regi.

*Serenissime potentissimeque Rex, Amice
ac Fæderate Augustissime,*

A Ccepimus, idque non sine dolore, quædam in *Provincia Protestantes* Ecclesias ab homine quodam male feriato ita indignè fuisse in sacris concionibus interpellatas, ut ea res magistratibus, ad quos hujus causæ cognitio *Gratianopoli* ex lege pertinebat, gravi animadversione digna censeretur : sed Coventum Cleri, qui iis in locis proximè habebatur, à *Majestate Vestra* impetrasse, ut res integra *Parisiis* ad Concilium Regium revocaretur : A quo dum nihil hætenus decernitur, Ecclesias illas & præsertim *Aquariensem*, convenire ad colendum Deum prohiberi. Vehementer itaque à *Majestate Vestra*

K f

etiam

etiam atque etiam peto, primùm, ut quorum preces ad DEUM pro salute sua rebusque Regni prosperis non interdicat, eorum coitus publicos ad præcandum interdicere ne velit: deinde ut in illum hominem rei divinæ interpellatorem ex sententia illorum judicum, quibus hujusmodi causarum legitima atque consueta cognitio *Gratianopoli* data est, animadvertatur. Deus *Majestatem Vestram* quàm diuturnam atque incolumem conservet; ut si hæc nostra vota vobis accepta sunt, Deoque grata esse existimatis, eadem ab illis etiam *Protestantibus Ecclesiis* quibus nunc interdicatur, pro vobis publice fieri, sublato illo interdicto, quàm primum velitis.

Westmonasterio. 18. Feb.

Anno 1658.

Eminentissimo Domino

CARDINALI MAZARINO.

Eminentissime Domine Cardinalis,

Proficiscitur in Galliam, ibique ad tempus commorari cogitat Illustrissima Domina defuncti nuper *Ducis Richmondiae* Uxor cum *Duce Filio* Adolescentulo. *Eminentiam* itaque *Vestram* magnopere rogo, ut siquid acciderit in quo iis vestra auctoritate, favore, patrocinio, utpote peregrinis, usus esse possit, ita eorum dignitatem tueri, vobisque haud vulgariter commenda-

data

datam rebus omnibus habere velitis, ut ad vestram humanitatem erga omnes, præsertim tam illustri genere oriundos, eximiam, sentiant nostris literis quod accedere potuit cumuli accisisse: simul & hoc sibi persuadeat *Eminetia Vestra* commendationem suam, si quid à me hujusmodi postulabit, apud me non minus valituram.

Westmonasterio. 29. Feb. 1658.

RICHARDUS Protector Reip.
Angliæ, &c.

Serenissimo ac Potentissimo Principi

J O A N N I

Portugalliæ Regi.

*Serenissime Potentissimeque Rex, Amice
ac Fæderate,*

T Ametsi multa sunt quæ ad Regem amicum & Reip. nostræ conjunctissimum necessario scribam, nihil est tamen quod faciam libentius quàm quod nunc facio, ut *Majestati vestræ, Regnoque Portugalliæ* insignem hanc proximam de communi hoste *Hispano* victoriam gratuler: qua non ad vestram tantummodo, verum etiam ad *Europæ* totius pacem ac respirationem, permagnum, atque in multos fortasse annos, allatum esse momentum nemo est quin intelligat.

K 6

Alte.

Alterum est in quo victoriarum certissimum pignus justitiam *Majestatis vestrae* agnoscam, qua ex articulo foederis 24. per arbitros *Londini* datos, mercatoribus nostris est satisfactum, quorum naves onerarias *Brasiliensis Societas* conduxit. Unus est *Alexander Benicus*, Mercator *Londinensis*, cui, cum navis ejus, quæ *Tres fratres* vulgo nominatur, magistro *Joanne Wilkio*, duas navigationes conductæ onerataque navaverit, pactum stipendium persolvere Societas recusat: cum cæteris qui semel tantum navigarunt, jampridem persolutum sit. Quod cur sit factum non intelligo nisi si eorum judicio mercede dignior est, qui semel quàm qui bis meruerit. Vehementer itaque peto à *Majestate Vestra*, ut huic uni *Alexandro* cui duplum debetur, debita navatæ operæ satisfactio ne defiat; velitque pro autoritate sua quàm brevissimum solationis diem damnique simul sarcienti Sociis *Brasiliensibus* constituere: quorum dilationibus effectum est ut datum inde mercatori damnum mercedem ipsam jam pene superet. Deus *Majestatem Vestram* lætis rerum successibus contra hostem augere indies & fortunare pergat.

Westmonasterio ex Aula nostra. 23. Feb.

An. 1658.

RICHARDUS Protector Reip.

Angliæ &c.

Eminentissimo Domino

CARDINALI MAZARINO

Eminentissime Domine,

PER literas ad *Eminentiam vestram* octo circiter ab hinc mensibus Jun. 13. datas, causam Petri Petti, viri & singulari probitate præditi & ægregiis artibus in re navali nobis Reique publicæ utilissimi, commendavimus. Ejus nave *Edwardo* anno 1646. à quodam Gallo, cui nomen *Basconi*, *Thamesis* in ostio ut scripsimus, captâ, & in portu *Bononiensi* venditâ, quam Rex in *Consilio Regio* 4. *Novemb.* anno 1647. decreverat, ut quam censuisset *Consilium* pecuniæ summam damni accepti loco dandam, satisfactioni daretur, is tamen ex eo decreto nihildum se fructûs percepisse ostendit. Cùm autem dubium mihi non sit, quin *Eminentia vestra* meo rogatu id omne mandaverit quod ad decretum illud primo quoque tempore exequendum pertineret, denuo nunc majoremque in modum peto, ut videre velit quid impedimento sit, cujusve negligentia aut contumacia factum, ut decreto *Regio* post annos jam decem non obtemperetur; velitque pro
sua

sua auctoritate instare, ut decreta illa pecunia, quam irrogatam jamdiu existimamus, & exigatur quamprimum, & petitori nostro solvatur. Ita rem justitiæ imprimis gratam *Eminentia vestra* fecerit, & à me singularem prætereà gratiam inierit.

Westmonasterio ex Aula nostra,
22. Feb. 1658.

Duæ sequentes Literæ, *Richardo* abdicato, Restituti Parlamenti nomine Scripti sunt.

Parlamentum Reipub. Angliæ

Serenissimo Potentissimoque Principi

C A R O L O G U S T A V O

Suecorum, Gothorum, Vandolorumque Regi &c.

*Serenissime Potentissimeque Rex, Amice
Charissime,*

CUm visum sit Deo. optimo atque omnipotenti, penes quem solum conversiones omnes Regnorum, Rerumque publicarum sunt, Nos pristinae auctoritati summæque *Rerum Anglicarum* administrandæ restituere, & *Majestatem Vestram* eâ de re certiore esse faciendam inprimis duximus, & vobis porto significandum, nos cum *Majestatis vestræ* utpote *Protestantium Principis* potentissimi tum pacis inter vos *Daniæque Regem*, & ipsum quoque *Protestantium Principem* præpotentem, non

non sine nostra opera atque officio benevolentissimo reconciliandæ, quantum in nobis situm est, esse studiosissimos. Volumus itaque ut Internuntio nostro extraordinario, *Philippo Meadows*, quo munere ab hac Repub. apud *Majestatem Vestram* hætenus fungitur, idem omnino munus nostro nunc nomine prorogetur: eique adeo his nostris literis potestatem proponendi, agendi, transigendi cum *Majestate Vestra* facimus planè eandem quæ ei proximis literis commendatitiis facta est: quicquid ab eo transactum nostro nomine atque conclusum erit, id omne ratum nos esse habituros, Deo bene favente, nostra fide spondemus. Deus ille *Majestatem Vestram* quam diutissime conservet, rebus *Protestantium* columnen atque præsidium.

GUIL. LENTHALL,
Prolocutor Parliament
Reipub. Angliæ.

Westmonasterio. Maii 15.

An. 1659.

Parlamentum Reipub. Angliæ

Serenissimo Principi

F R E D E R I C O

Daniæ Regi.

Serenissime Rex, Amice Charissime,

CUM voluntate ac nutu summi rerum omnium moderatoris Dei Opt. Max. factum fit ut nos demùm restituti, pristinum locum atque munus in *Republica* gerenda obtineamus, placuit imprimis ea de re nec *Majestatem Vestram*, utpote Vicinum nobis & Amicum Regem, esse celandam, & quem ex adversis rebus vestris capiamus dolorem simul esse significandum: id quod ex eo studio eaque diligentia nostrâ facile perspicietis quam ad pacem inter *Majestatem Vestram* Regemque *Sueciæ* reconciliandam & adhibemus nunc, &, quoad opus erit, adhibebimus. Quapropter Internuntio nostro ad Serenissimum *Suecorum* Regem Extraordinario *Philippo Meadows* negotium dedimus, ut *Majestatem Vestram* his de rebus nostro deinceps nomine adeat, ea communicet, proponat, agat atque transigat, quæ commissa sibi à nobis & mandata esse ostendet. Quam ei fidem *Majestas Vestra* hoc in munere habuerit, eam nobismetipsis habere se credat, rogamus.

Deus

(234)

Deus *Majestati Vestrae* ex istis omnibus rerum
suarum difficultatibus, in quibus tamen forti
& magno animo versatur, felicem lætuniquē
exitum primo quoque tempore concedat.

GUIL. LENTHALL,
Prolocutor Parlamenti
Reipub. Angliæ.

Westmonasterio. Maii 15.
An. 1659.



m
ti
e

ti